

మత్తయి రాస్తి సువార్త

నెల్వ కిబిసినిక

దేవుణు మాటెజ్ రాస్తిమన్ని పుస్తకమాతి బయ్బిలుదు పడాయ్ బపుమానం, కొత్త బపుమానం ఇజి రుండి ముక్కెజ్ మన్నె. పడాయ్ బపుమానమ్దు యేసుప్రబు వందిజ్ వెప్తిమన్ని సజతిజ్, ఎలాగ పూర్తి ఆతె ఇజి కొత్త బపుమానం జాగర్త సద్విజి సుడఃతిజ నెస్తిజానాద్. కొత్త బపుమానమ్దు మన్ని మొదోహి పుస్తకమ్నె మత్తయి రాస్తి సువార్త. యేసు ప్రబు సిసుర్ లొఇ మన్ని పన్ను పెర్నికానాతి మహి మత్తయి ఇనికాండె ఇక్క రాస్తమనాన్. (మత్తయి 9:9-13) యేసు ప్రబుజ్ సిలువ పొక్తి వెనుక, ఇంజుముంజు 25-35 పంటెజ్ వెనుక ఇక రాసె ఆత మనాద్. ఇజి యా సజతిజ్ వందిజ్ నెస్తికార్ వెహ్సినార్. దేవుణు వన్ని ప్రవక్తరు వెట వర్గితిమహి క్రిస్తు ఇనికాన్ యేసుప్రబునె ఇజి యూదుర్ ఆతికార్ నెస్తిజ్ ఇజినె ఇక్క రాస్త మనాద్. యేసుప్రబు పుట్టి వందిజ్, మరి దని వెనుక జర్గితి సజతిజ్ వందిజ్ దేవుణు ముజాల వన్ని ప్రవక్తరు వెట వర్గితిక ఎలాగ అయాలెకెండెనె పూర్తి ఆతె ఇజి పడాయ్ బపుమానమ్దాన్ దన్ని వందిజ్ మన్ని మాటెజ్ లాగ్గి రుజుప్ కిజి తొరిసినాన్. దేవుణు ప్రవక్తరు వెట వర్గితి సజతిజ్ యేసుప్రబు బత్కుదు అయాలెకెండె పూర్తి ఆతె (మత్తయి 1:23, 2:6, 14, 18, 23) ఇస్రాఏలు లోకుర్ రాజు ఆతిమహి దావీదు తెగాదు పుట్టికాన్ ఇజి రుజుప్ కిదెజ్, వన్ని తెగాదు పుట్టివరి పేరుకుబా మజి తొరిసినాన్. మరి దేవుణు ఏలుబడిః కిని వందిజ్ యా పుస్తకమ్దు నండొ సుట్కు రాస్త మనాద్. దేవుణు ఏలుబడిః కిని వందిజ్ యేసుప్రబు లోకురిజ్ నెస్తిస్తి కతెజ్ యా పుస్తకమ్దు 13-14 అద్యయమ్కాజ్ రాస్త మనాద్. యేసు, దేవుణు మరిసి ఆతికాండె ఇజి యా సువార్తదాన్ డటం వెహ్సినాన్.

యాక యేసు తెగ

1 అబ్రహాం తెగాదికాతి దావీదు రాజు* తెగదు పుట్టి యేసు క్రీస్తు తెగ యాక.

2 అబ్రాహాము మరిసి ఇస్సాకు, ఇస్సాకు మరిసి యాకోబు, యాకోబు మరిసిర్ యూదాని వన్ని దాద్నిర్, తంబేర్సీర్.

3 యూదా మరిసిర్ పెరెసుని జెరహు, వరి యాయ పేరు తామారు. పెరెసు మరిసి ఎస్రోము, ఎస్రోము మరిసి అరాము,

4 అరాము మరిసి అమ్మినాదాబు, అమ్మినాదాబు మరిసి నయస్సోను, నయస్సోను మరిసి సాల్మాను.

5 సాల్మాను మరిసి బోయజు, బోయజు యాయ పేరు రాహాబు, బోయజు మరిసి ఓబేదు, ఒబేదు యాయ పేరు రూతు. ఓబేదు మరిసి యెసయ.

6 యెసయ మరిసి రాజు ఆతి దావీదు. దావీదు రాజు మరిసి సొలోమోను, సొలోమోను అయ్సి, ముజాల ఊరియెజ్ అల్ని ఆతి మహికాద్.

7 సొలోమోను మరిసి రెహాబాము. రెహాబాము మరిసి అబీయా, అబీయా మరిసి ఆసా.

8 ఆసా మరిసి యెహోసపాతు. యెహోసపాతు మరిసి యెహోరాము, యెహోరాము మరిసి ఉజ్జియా.

9 ఉజ్జియా మరిసి యోతాము, యోతాము మరిసి ఆహాబు, ఆహాబు మరిసి హిజ్కియా.

10 హిజ్కియా మరిసి మనసె, మనసె మరిసి ఆమోను, ఆమోను మరిసి యోసీయా.

11 యోసీయా మరిసిర్ యెకొనియని వన్ని దాద్నిర్, తంబేర్సీర్. వరి కాలమ్దు బబులోను దేసెమ్ది రాజు యూదురిజ్ వెట్టివణి కినివరిలెకెండ్ అసి తొష్టా ఒత్తాన్.

12 బబులోను దేసెమ్దు సొహి వెనుక అబె యెకొనియెజ్ మరిన్ పుట్టాన్. వన్ని పేరు నయల్తియెలు, నయల్తియెలు మరిసి జెరుబాబెలు.

* **1:1 1:1** దావీదు ఇస్రాయేలు లోకుర్ వందిజ్ దేవుణు ఏర్పాటు కితి రాజు. వాంత్రు ఇస్రాయేలుది రుండి రాజు వన్ని ముజాల నవులు ఇనికాన్ ఏలుబడిః కిజి మహాన్. ✱ **1:6 1:6** 2నము 11:1-27.

13 జెరుబాబెలు మరిసి అబీహూదు, అబీహూదు మరిసి ఎలియాకీము, ఎలియాకీము మరిసి అజోరు.

14 అజోరు మరిసి సాదోకు, సాదోకు మరిసి ఆకీము, ఆకీము మరిసి ఎలీహూదు.

15 ఎలీహూదు మరిసి ఎలియాజరు, ఎలియాజరు మరిసి మత్తాను, మత్తాను మరిసి యాకోబు.

16 యాకోబు మరిసి యోసేపు, వన్ని ఆల్ని ఆతి మరియు పొటాదు క్రీస్తు ఇజి కూకె ఆతి యేసు పుట్టాన్.

17 యా లెకెండ్ అబ్రాహము బాణిజ్ అసి దావీదు రాజు దాక మొత్తం పద్నాల్గి తరమ్కు, దావీదు రాజు బాణిజ్ అసి యూదురిజ్ బబులోను దేసమ్దు వెట్టి పణి కిని వరిలెకెండ్ తొప్పిబతి కాలమ్దాక పద్నాల్గి తరమ్కు. యూదురు బబులోను దేసమ్దు సాహి బాణిజ్ అసి యేసు క్రీస్తు దాక పద్నాల్గి తరమ్కు.

యా లెకెండ్ యేసు క్రీస్తు పుట్టాన్. కసెలిజాణిజ్

18 యేసు క్రీస్తు యా లెకెండ్ పుట్టాన్. వన్ని అయ్సి ఆతి మరియెజ్ యోసేపు వందిజ్ వెన్బాత మహాద్. గాని వారు రిఎర్ ఉండ్రె బానె గూర్విండ ముందాల్నె అది దేవుణు ఆత్మ సత్తుదాన్ పాత డిస్తాద్.

19 గాని దనిజ్ పేరు కితికాన్ ఆతి యోసేపు దేవుణు రూలుజ్ లోజిజి మనికాన్ కక, విజేరిజ్ ఎర్దు సిగు కిబిన్వండ, ఎయెర్బా నెన్వండ, దన్నిజ్ డిసి సిదెజ్ ఇజి ఒడఃబితాన్.

20 యోసేపు యా సజతిజు వందిజ్ ఆలోసనం కిజి మహివలె దేవుణు దూత కలాదు వన్నిజ్ తోరె ఆజి ఈహు వెప్తాన, “దావీదు రాజు తెగ్గతికాన్ ఆతి యోసేపు, నిజి పేరుకితి మని మరియెజ్ డగ్గుకిదెజ్ అనుమానం ఆమ. ఎందనిజ్ ఇహిజు దేవుణు ఆత్మ సత్తుదాన్ అది పాత డిస్తా మనాద్.

21 అది ఒరెన్ కొడెః ఇడ్నాద్లె. వన్ని లోకాజ్ వరి పాపమ్కాణిజ్ వాండ్రు రక్సిస్నాన్లె. అందెజె వన్నిజ్ యేసు† ఇజి పేరు ఇడ్దెజ్వలె”,

† 1:21 1:21 యేసు ఇని మాటదిజ్ అర్థం, యెహోవ దేవుణు రక్సిస్నాన్ సిల్లిజు సాయం కిజినాన్.

22-23 “ఉండ్రీ విడిః బోదెలి పాత డిఃసి ఒరెన్ మరిన్ ఇడ్నాద్లె. వాండ్రు ఇమ్మానుయెలు ఇజి కూకె ఆనాన్లె☆”, ఇమ్మానుయెలు ఇహిజ దేవుణు మా వెట తోడుః మనాన్ ఇజి అర్దం. ముందాల దేవుణు ప్రవక్త వెట వర్గితి యా మాటెజ్ నిజం పూర్తి ఆదెజ్ యాకెజ్ విజు యా లెకెండే జర్గితె.

24 యోసేపు నిద్రదాన్ తెలిఆతిజ్ దేవుణు దూత వన్నిజ్ వెహ్తి వజనె మరియెజ్ ఆల్ని లెకెండే వన్ని ఇండ్రో కూక్త ఒతాన్.

25 గాని మరియ మరిన్ ఇడ్మిదాక వాండ్రు దని డగ్రు సాన్వితాన్. మరిన్ పుట్టిజ్ వాండ్రు వన్నిజ్ యెసు ఇజి పేరు ఇట్టాన్.

2

తూర్పుదాన్ గ్నానురు వాజినార్

1 హేరోదు రాజు ఏలుబడిః కిజి మహివలె యూదయ దేసమ్దుమ్మని బెత్తెహేము ఇని నాటో యెసు పుట్టాన్. వాండ్రు పుట్టి వెన్కా తూర్పు దరోటాన్ గ్నానురు* యెరూసలేం ఇని పట్నమ్దు వాతార్

2 పట్నమ్దు వాతారె, “యూదురిజ్ రాజు ఆదెజ్ ఇజి పట్టి కొడెః ఎంబె మనాన్? వాండ్రు పుట్టిదన్నిజ్ గుర్తు తొరిసిని సుక్క, మాపు తూర్పుదరోటు సుడ్తాప్. వన్నిజ్ పొగ్డిఃజి మాడిఃస్తెజ్ ఇజి వాత మనాప్”, ఇజి వెహ్తార్.

3 యా మాటెజ్ విహారె హేరోదు రాజుని వన్నివెట యెరూసలేమ్దికార్ విజేరె నండో గాబ్ర ఆతార్.

4 హేరోదు రాజు, పెరి పుజెరిజ్ విజెరిజ్ని యూదురి రూలుజ్ నెస్సిస్సి వరిజ్ విజేరిజ్ కూక్పిస్తాండ్రె, “క్రిస్తు ఆతికాన్ ఎంబె పుట్టాన్?”, ఇజి వెన్బాతాన్.

5 “యూదయ దేసమ్దుమని బెత్తెహేముదు”, ఇజి వారు వెహ్తార్, “ఎందనిజ్ ఇహిజ, యా లెకెండే దేవుణు ముజాల ఒరెన్ ప్రవక్త వెట వర్గిత మహాన్.”

☆ 1:22-23 1:22-23 యెసయ 7:14. * 2:1 2:1 సుక్కిజ వందిజ్ నదువు నెస్తికార్.

6 “యూదయ దేసమ్దు మని బేత్లెహెమా, నీను యూదయ నాహ్కాల్ లోఇ ఇజిరికి ఆఇ. ఎందనిజ్ ఇహిజ, నీ లోఇహాన్ ఒరెన్ రాజు లెకెండ్† ఏలుబడిః కినికాన్ పుట్నాన్లె. వాండ్రు నా లోకుర్ ఆతి ఇస్త్రాయేలు లోకురిజ్ గపుడుఎన్ లెకెండ్ మంజినాన్లె.”

7 నస్తవలె హేరోదు రాజు, మరి ఎయెర్బా నెస్ఏండ గ్వాసురుజ్ కూక్పిస్తాండ్రై సుక్క తోరె ఆత్తి సరియాతి టయం వరిజ్ వెన్బాజి నెస్తాన్.

8 వరిజ్ బేత్లెహెమ్దు పొక్తాండ్రై, “మీరు సొన్ని నెగ్రెండ అయా కొడొఃదిజ్ రెబాజి సుడొఃజి వాండ్రు ఎంబె మనాన్ ఇజి నజిబా కబ్బురు తగ్అ. అయావలె నానుబా సొన్ని వన్నిజ్ పొగ్డిఃజి మాడిఃన్న”, ఇజి వరిజ్ వెప్తాన్.

9 వారు రాజు వెప్తా మాట విహారె సొతార్. సొన్ని మహివలె, వారు తూర్పు దరోటు సుడొఃతిమహి సుక్క, వరి ముందాల నడిఃజి మహాద్. కొడొః మహి బాడ్డి ముస్సు అందితిజ్ అయా సుక్క అబ్బై నిహాద్.

10 సుక్క సుడొఃతిజ్ వారు గొప్ప సర్ల ఆతార్.

11 ఇండ్రొ సొహారె అయ్సి ఆత్తి మరియ వెట మన్ని కొడొఃదిజ్ సుడిఃతారె ముణుకుజ్ ఊర్జి వన్నిజ్ పొగ్డిఃజి మాడిఃస్తార్. నస్తవలె వారు ఒత్తిమహి పెటెజ్ రేతారె బజారం, సాంబ్రాణి, బోలాం‡ ఇనికెజ్ వన్నిజ్ నొడిత సితార్.

12 “హేరోదు రాజు డగ్రు మర్జి సొన్మాట్”, ఇజి దేవుణు దూత కలాదు వరిజ్ వెప్తా వజ, వారు మరి ఉండ్రై సరిదాన్ వరి దేసెం సొహార్.

అయ్గుప్తు దేసమ్దు సొన్నినార్

13 గ్వాసురు మర్జి సొహి వెనుక ఒరెన్ దేవుణు దూత యోసేపుజ్ కలాదు తోరె ఆజి, “నీను నిజ్అ, హేరోదు రాజు కొడొఃదిజ్ సప్తెజ్ సుడొఃజినాన్. అందెజె వెటనె కొడొఃదిజ్ని అయ్సిజ్ అసి అయ్గుప్తు

† 2:6 2:6 మికా 5:2. ‡ 2:11 2:11 సాంబ్రాణిసాంబ్రాణి ఇని మరాన్దాన్ దోహ్క్సి నెగ్గి వాసనం మన్ని గొప్ప విలువతి ఒస్తు బోలంబోలం ఇని మరాన్దాన్ నెగ్గి వాసనం మన్ని ఒస్తు మాయమ్కు లెకెండ్బా పణి కినాద్.

దేసమ్దు సాన్అ. మరి ఇనిక కిదెజ్ ఇజి నాను నిజి వెహ్పిదాక అబెనె మన్అ”, ఇజి వెహ్సాన్.

14 నస్తివలె వాండ్రు నిజితండ్రె, కొడొడిజ్ని అయ్సిజ్ అస్తాండ్రె అయా పొదొయ్నె అయ్గుప్తు దేసమ్దు సాండ్రెజ్ సోతాన్.

15 హేరోదు సానిదాక అబెనె మహాన్. “అయ్గుప్తు దేసమ్దాన్ నా మరిసిజ్ నాను కూక్”, ఇజి దేవుణు ముందాల ప్రవక్త వెట☆ వర్గితి మాట యా లెకెండే పూర్తి ఆతాద్.

16 గ్వానురు వన్నిజ్మోసం కితార్ ఇజి నెస్తాండ్రె హేరోదు రాజు నండొ కోపం ఆతాన్. వారు వెహ్పి టయ్మదిజ్లెక కితాండ్రె బేల్లెహేమ్దుని, మరి డగ్రు మని ప్రాంతమ్కాజ్ మన్నినాహ్కాజ్ మన్ని రుండి పంటెజ్ని దన్ని అడిగి వయ్సు మని కొడొడిజ్ విజెరిజ్ సప్తెజ్ ఆడ్ర సితాన్.

17-18 “రామా నారుదాన్ ఉండ్రీ పెరి జాటు వెహద్. గుండె కొత్తె ఆజి అడఃబాజిని జాటునె. రాహేలున్ దన్ని కొడొడిజ్ వందిజ్ అడఃబాజినాద్. కొడొడిజ్ సాతిజ్ అది ఒరిసైజ్ అట్ఏతాద్.” యిరిమ్మ్య ప్రవక్తవెట దేవుణు ముజాల వర్గితిమహి యా మాట యాలెకెండే పూర్తి ఆతాద్.

నజరేతుదు మర్జి వాజినార్

19 హేరోదు సాతి వెనుక అయ్గుప్తు దేసమ్దు మహి యోసేపుజ్ ఒరెన్ దేవుణు దూత కలాదు తోరె ఆతాండ్రె,

20 “నీను నిజ్అ, కొడొడిజ్ని అయ్సిజ్ అసి ఇస్రాయేలు దేసమ్దు సాన్అ. ఎందనిజ్ ఇహిజు, కొడొడిజ్ సప్తెజ్ సుడఃజి మహికార్ సాత సాహార్”, ఇజి వెహ్సాన్.

21 అందెజె యోసేపు నిజితాండ్రె కొడొడిజ్ని అయ్సిజ్ అస్తాండ్రె ఇస్రాయేలు దేసమ్దు మర్జి సాండ్రెజ్ సోతాన్.

☆ 2:15 2:15 హోసెయ 11:1. § 2:17-18 2:17-18 ఇస్రాయేలు (యూదురి) లోకురిజ్ అనిగొగొ ఆతి ఇస్సాకు మరిసియాతి యాకోబు ఆల్సినె రాహేలు. నెబుక్కద్నెసర్ బబులోనుదు ఏలుబడిః కిజి మహివలె ఎప్రయెన్ది యూదురిజ్ అస్త ఒత్తాన్. వరి లోఇ నండొడార్ బానె నప్ప ఆతార్.

22 గాని హేరోదు సాతి వెనుక వన్ని మరిసి ఆతి అర్కెలాయు యూదయ దేసమ్దు ఏలుబడిః కిజినాన్ ఇజి నెస్తాండ్రె అబ్బె సొండ్రెజ్ తియెలాతాన్. కలాదు వెప్తా లెకెండ్రె యూదయ దేసం సొన్విండ గలీలయ ముటాదు సొహాన్.

23 అబ్బె నజరేతు ఇని పట్నమ్దు సొహాండ్రె బత్తితాన్. “నజరేతుదికాన్ ఇజి వాండ్రు కూకె ఆనాన్లె”, ఇజి దేవుణు ప్రవక్తరు వెట క్రీస్తు వందిజ్ వర్గతిమహి మాటెజ్ యా లెకెండ్రె పూర్తి ఆతె.

3

బాప్తిసం సీని యోహాను యేసువందిజ్ సరి తయార్ కిజినాన్.

1-2 అయ దినమ్కాజ్ బాప్తిసం సీని యోహాను వాతండ్రె, “దేవుణు ఏలుబడిః కిని కాలం డగ్గు ఆత మనాద్. అందెజె మీరు పాపమ్కు ఒప్పుకొడిఃజి డిఃసి సీదు”, ఇజి యూదయ బిడిఃజ్ బూమి ప్రాంతమ్కాజ్ సాటిసి మహాన్.

3 “ప్రబు లోకుడగ్గు వాదెజ్ సరి తయార్ కిదు, వన్ని వందిజ్ సరి తినాజ్ కిదు”, ఇజి బిడిఃజ్ బూమిదాన్ ఒరెన్ డేల్ని వెప్సిని కంటం వాజినాద్* ఇజి యెసయ ప్రవక్త వెట దేవుణు ముందాల వర్గతిక విని వందిజె.

4 యోహాను ఒంటె బులుస్కాణిజ్ తయార్ కితి సొకెజ్ తోడిఃగితాండ్రె, నడుముదు తోలు బెల్లు తోహె ఆజి మహాన్. వాండ్రు మేపిలెక్ని అడిఃవి తేనె, తింజి బత్తిజి మహాన్.

5 యెరుసలేమ్దికార్ని, యూదయ దేసమ్దికార్ విజెరె, మరి యొర్దాను గడ్డ డగ్గు మని నాహ్కాణికార్ విజెరె సొతారె యోహాను వెప్సికెజ్ వెండ్రెజ్ వన్నిడగ్గు వాతార్.

6 వారు, కితి పాపమ్కు ఒప్పుకొడిఃజి యొర్దాను గడ్డదు వన్ని కియుదాన్ బాప్తిసం లాగె ఆజి మహాన్.

7 పరిసయరు, మరి సదుకయరు నండొండార్ యోహాను బాప్తిసం సీజి మహిబాన్ వాతార్. వరిజ్ సుడఃజి వాండ్రు ఈహు వెప్తాన్,

* 3:3 3:3 యెసయ 40:3.

“మీరు వినం మన్ని సరాస్ లెకెండ్ మన్నికిదెర్. దేవుణుబాణిజ్ కోపం వాజినాద్ ఇజి నమ్మిజి మీరు వాతిదెరా? సిల్లెద్. వన్ని కోపమ్దాన్ తప్రె ఆదెజ్ ఇజి మీరు వాతిదెరా? నిజమె అయలెకెండ్ ఇజి నాను ఒడిదెజ్ సిల్లెద్.

8 మీ పాపమ్కు ఒప్పుకొడిఃజి డిఃసి సీజి దనిజ్ తగితి పణిజ్కిజి తోరిస్తు.

9 ‘మాపు అబ్రాహము తెగ్గాతికాప్, అందెజె మాపు సిక్సదాన్ తప్రె ఆనాప్లె’ ఇజి మీ మన్నుదు మీరు ఒడిఃబిమాట్. ఎందనిజ్ ఇహిజు, యా పణకాణిజ్ అబహముజ్ కొడొఃర్ పుటిస్తెజ్ దేవుణు అట్టికాన్ ఇజి నాను మిజి వెహ్సిన.

10 దేవుణు మరెక మొదొల్ కత్తి విసీర్దెజ్ కియుదు గొడెలి అస్తి వన్నిజ్ పొలిత మనాన్. నెగ్గి పట్టు అన్ఇ మరెకాజ్ విజు కత్తి సిసుద్ విసీర్వాన్లె.

11 మీరు పాపమ్కు ఒప్పుకొడిఃజి డిఃస్తి సీతి వందిజ్. నాను మిజి ఏరుదాన్ బాప్తినం సీజిన. నా వెనుక వానికాన్ నజి మిస్తి అతికారం మనికాన్. వన్ని జోడ్కు పిండెదెజ్బా నాను తగ్గిక ఆవ. వాండ్రు దేవుణు ఆత్మదాన్ని, సిసుదాన్ మిజి బాప్తినం సీనాన్లె.

12 వాండ్రు గాలి ఇట్టి సేహి కీదు అస్తి వన్నిజ్ పొలిత మనాన్. వాండ్రు వన్ని కలమ్దిజ్ సుబారం కిజి గాలి ఇట్టి కూలిజ్ కొటు ఇండ్రొ ఒసి వాక్వాన్లె. పొటుదిజ్ నంబిఇ సిసుదు సుర్నాన్లె.”

యేసు బాప్తినం లాగె ఆజినాన్.

13 నస్తివలె యోహను కీదాన్ బాప్తినం లాగె ఆదెజ్, గలిలయదాన్ యేసు యొర్దాను గడ్డదు వాతాన్.

14 “నీ కియుదాన్ బాప్తినం లాగె ఆదెజ్, నజి అవ్సరం గాని నీను బాప్తినం లాగె ఆదెజ్ నా డగ్రు వాతిదా?”, ఇజి యోహను వన్నిజ్ అడ్డు కిదెజ్ సుడ్తాన్.

15 “ఏలు యా లెకెండ్ జర్గిపిద్. విజు యా లెకెండ్ దేవుణుదిజ్ ఇస్టమాతివజ పూర్తి కినిక మజి తగ్నె”, ఇజి యేసు వెప్టాన్. నస్తివలె యోహాను ఒప్పుకొటాన్.

16 బాప్తీసం లాగె ఆతి వెటనె యేసు ఏరుదాన్ వెల్లి వాతాన్. అయావలెనె ఆగాసం రే ఆతాద్. దేవుణు ఆత్మ పావురపొటి లెకెండ్ యేసు ముస్కు డిగ్జి వానిక యోహాను సుడ్ఃతాన్.

17 “పీండ్రు నా ఇస్టమాతి మరిన్, విని ముస్కు నాను సంఠో సర్దద ఆజిన”, ఇజి దేవుణు మంజిని బాడిఃదాన్ వెప్పిని ఉండ్డి జాటు వాతాద్.

4

యేసుజ్ సయ్తాన్ పరిస కిత్తిక.

1 వెనుక దేవుణు ఆత్మ యేసుజ్ బిడిఃజ్ బూమి ప్రాంతమ్దు నడ్ఃపిస్తాన్. అబె సయ్తాన్ యేసుజ్ తపు కిబిస్తాజ్ పరిస కిజి సుడ్ఃతాన్.

2 నలపయి రోస్కు రెయు పొకల్ఉపాస్మహి వెనుక వన్నిజ్బజ కట్టాద్.

3 సయ్తాన్ వన్ని డగ్గు వాతండ్రె, “నీను దేవుణు మరిసి ఇహిజ, యా పణకుజ తిండి ఆఅ ఇజి వెహాఅ”, ఇజి వెప్టాన్.

4 నస్తివలె యేసు “లోకు బత్కిజినిక తిండిదానె ఆఎద్, గాని దేవుణు వెయుదాన్వాని విజు మాటెజాణిజ్బా బత్కిజినాన్ ఇజి దేవుణు మాటదు రాస్త మనాద్”[☆], ఇజి వన్నిజ్ వెప్టాన్.

5 వెనుక సయ్తాను యేసుజ్ దేవుణు పట్నం ఆతి యెరూసలేముదు కూక్త ఒతండ్రె, అబె మని దేవుణు గుడిః కొసాదు నిల్ప్టాన్.

6 అబె నిల్ప్టాండ్ర “నీను దేవుణు మరిసి ఇహిజ, ఇబ్బెణిజ్ అడిఃగి డాట్అ. ‘నీ వందిజ్ వన్ని దూతరిజ్ దేవుణు ఆడ్ర సీనాన్. నీ కాల్కు

☆ 4:4 4:4 ద్విత్తి 8:3.

పణకుజ తగ్గలివిండ వారు నిజి వరి కికాణిజ్ పెర్న అస్సార్' ✱ ఇజి దేవుణు మాటదు రాస్త మనాద్", ఇజి వెహ్వాన్.

7 యేసు వన్నిజ్, "నీ ప్రబు ఆతి దేవుణుదిజ్ పరిస కిదెజ్ ఆవిద్' ✱ ఇజిబా రాస్త మనాద్", ఇజి వెహ్వాన్.

8 మరి ఉండ్రీ సుటు, సయ్తాను యేసుజ్ నండో ఎత్తు మని ఉండ్రీ గొరోన్ ముస్కు ఎకిస్తాండ్రె యా లోకమ్దు మని విజు దేసెమ్కాజ్, మరి వన్కాజ్ ముస్కు ఏలుబడిః కినివరి అతికారమ్ని వరిజ్ కలిగితి మనికెజ్ విజు తోరిస్తాన్.

9 అక్కెజ్ తోరిస్తాండ్రె, "నీను నా ఎద్రు ముణుకుజ్ ఊర్జి నజీ పొగ్డిఃజి మాడిఃస్సిజి యాకెజ్ విజు నాను నిజి సీన", ఇజి వెహ్వాన్.

10 యేసు వన్ని వెట, సయ్తానా, నా బాణిజ్ సొన్అ, "నీ ప్రబు ఆతి దేవుణుదిజ్ పొగ్డిఃజి మాడిఃసి, వన్నిజె సేవ కిదెజ్ ఇజి దేవుణు మాటదు రాస్త మనాద్", ఇజి వెహ్వాన్.

11 అయావలె సయ్తాను వన్నిజ్ డిఃసి సొహాన్. దేవుణు దూతార్ వాజి వన్నిజ్ నెగెణ్ సుడఃతార్.

యేసు సువార్త సాటిస్తెజ్ మొదొల్సినాన్

12 యోహాను కయ్ది మహాన్ ఇజి విహండ్రె యేసు గలిలయదు మని నజరేతు ఇని పట్టమ్దు మర్జి వాతాన్.

13 వెనుక యేసు నజరేతు పట్టం డిఃసి జెబులూను, నప్తాలి ప్రాంతమ్కాజ్ డగ్రు, గలిలయ సందారం పడఃకాదు మని కపెర్నహమ ఇని పట్టమ్దు వాతండ్రె బత్తితాన్.

14-16 "జెబులూను ప్రాంతమా, నప్తాలి ప్రాంతమా, యోర్దాన్ అతాహ పడక సమ్దరం డగ్రు మని యూదురు ఆఇకార్ బత్తిజిని గలిలయ ప్రాంతమా, సీకటిదు బత్కిజి మహికార్ గొప్ప జాయ్ సుడఃతార్. సావు ఉండ్రీ నీడ లెకెండ మని దేసమ్దు బత్కిజి మహి లోకుర్ ముస్కు జాయ్పుట్టాద్" ✱. ఇజి దేవుణు ముజాల యెసయ ప్రవక్త వెట వర్గితి మాట యా లెకెండ యేసు వాతిజ్ పూర్తి ఆతాద్.

✱ 4:6 4:6 క్రిస్త 91:11,12. ✱ 4:7 4:7 ద్విత్తి 6:16. ✱ 4:14-16 4:14-16 యెసయ 9:1-2.

17 అయా వలెహాన్ అసి యేసు, “దేవుణు ఏలుబడిః కిని కాలం డగ్రు ఆత మనాద్. అందెజె మీ పాపమ్కు ఒప్పుకొడిఃజి డిఃసి సీదు”, ఇజి సాటిస్తైజ్ మొదోల్స్తాన్.

యేసు సిసూరిజ్ కూక్సినాన్

18 యేసు గలిలయ సమ్దరం ఒడుదాన్నడిసి మహివలె, పేతురు ఇజి కూకె ఆతిసీమోనుజ్ని, మరి వన్ని తంబెర్సి ఆతి అంద్రెయెజ్ సుడఃతాన్. వారు జాలెరిజు. వీరు రిపర్ సమ్దరమ్దు వల పొక్సి మొయెజ్అసి మహోర్.

19 “నా వెట రదు. నా వెట వాదెజ్ లోకురిజ్ నెస్సిస్సివరి లెకెండ్ నాను మిజి తయార్ కినాలె”, ఇజి యేసు వరిజ్ వెహ్హాన్.

20 వారు వెటనె వరి వలెజ్డిఃస్తారె వన్ని వెనుక సాహోర్.

21 అబెణిజ్ సొన్ని మహిజ్యేసు జెబెదాయి మరిసి ఆతి యాకోబుజ్ని, వన్ని తంబెర్సి ఆతి యోహానుజ్ సుడఃతాన్. వారు రిపెర్వరి బుబ్బు ఆతి జెబెదాయి వెట డోణిదు వలెజ్ నెగెణ్కిజి మహివలె యేసు వరిజ్ కూక్సాన్.

22 వెటనె వారు వరి డోణిని వరి బుబ్బెజ్డిఃస్తారె వన్ని వెనుక సాహోర్.

యేసు జబ్బుది వరిజ్ నెగెండ్ కిజినాన్.

23 యేసు గలిలయ దేసెం విజు బూలాజి యూదురు మీటిజ్ కిజిని ఇల్కాజ్ వరిజ్ నేస్సిసి, దేవుణు ఏలుబడిః కిని కాలం వందిజ్ సువార్త సాటిసి మహాన్. విజు రకమ్ది జబుది వరిజ్ని బాదదాన్ఇజ్ మహివరిజ్ నెగెండ్ కితాన్.

24 యేస్సు పేరు సిరియ దేసమ్దు విజు సారితాద్. రకరకమ్ది జబుదివరిజ్లోకుర్వన్ని డగ్రు తతార్. సంఢో నొపిదాన్బాద ఆజి మహి వరిజ్, దెయం అస్తి వరిజ్, మూర్స జబు మహి వరిజ్, కిక్కుకాల్కు సాతివరిజ్వన్ని డగ్రు తతిజ్వాంధ్రు వరిజ్ నెగెండ్ కితాన్.

25 గలిలయ, దెకసొలి*, యెరూసలేము, యూదయ, యెర్దాను అతాహి పడఃకదాన్ మంద లోకుర్ వాజి వన్ని వెట సాహోర్.

* 4:25 4:25 దెక్కుపొలి ఇహిజ పది పట్టుమ్కు ఇక్కెజ్ గలిలయ సమ్దరం అతాహి పడక మహి.

5

గొరొన్ ముస్సు కిత్తి బోద.

1 యేసు మంద లోకురిజ్ సుడఃతాండ్రె ఉండ్రె గొరొత్ ఎక్టాన్. అబె బసిమహిజ్, వన్ని సిసూర్ వన్ని డగ్రు వాతార్.

2 అయావలె వాండ్రు వరిజ్ యా లెకెండ్ వెప్పి బోదిస్తజ్ మొదోల్స్తాన్.

3 “దేవుణుదిజ్ సెందితిలెకెండ్ బత్తిజి దన్నిలోఇ మాపు తకుదికాప్” ఇజి నెసి మజీ మరి మండ్రెజ్ ఎయెర్బా ఇజి కోరిజినరో, దేవుణు సీజిని దీవనమ్కు మంజినె. ఎందనిజ్ ఇహిజ, వారు దేవుణు కిని ఏలుబడిఃదు మంజినార్.

4 ఏలు దుకమ్దాన్ అడఃబాజి మన్నికార్ దేవుణు సీని దీవనమ్కు మంజనికార్ ఆనార్లె, ఎందనిజ్ ఇహిజ దేవుణు వరిజ్ ఓదరిస్తాన్.

5 నిపాతి గుణం మనికార్ దేవుణు సీని దీవనంకు మంజనికార్ ఆనార్లె ఎందనిజ్ ఇహిజ యా లోకం విజు వరి సొంతం ఆనాద్.

6 దేవుణు వెప్పి వజ నీతినిజొయ్దుదాన్ మండ్రెజ్ ఇజి నండో ఆస మనికార్ దేవుణు సీని దీవనమ్కు మంజనికార్ ఆనార్లె, ఎందనిజ్ ఇహిజ వరి మన్ను నిండ్రు ఆనిలెకెండ్ వరి ఆసెజ్ దేవుణు తీరిస్తాన్లె.

7 కనికారం తోరిస్సికార్ దేవుణు సీని దీవనమ్కు మంజనికార్ ఆనార్లె, ఎందనిజ్ ఇహిజ దేవుణు వరి ముస్సు కనికారం తోరిస్తాన్లె.

8 నెగ్గి మన్ను మనికార్ దేవుణు సీని దీవనమ్కు మంజనికార్ ఆనార్లె, ఎందనిజ్ ఇహిజ వారు దేవుణుదిజ్ సూణార్లె.

9 లోకుర్ సమాదనమ్దాన్ మండ్రెజ్ ఇజి పణి కినికార్ దేవుణు సీని దీవనమ్కు మంజనికార్ ఆనార్లె, ఎందనిజ్ ఇహిజ వారు దేవుణు కొణ్ణోర్ ఇజి కూకె ఆనార్లె.

10 దేవుణు వెప్పి వజ నాయం వందిజ్ మల్లెజ్జిజ్ ఓరిస్సికార్ దేవుణు సీని దీవనమ్కు మంజనికార్ ఆనార్లె, ఎందనిజ్ ఇహిజ వారు దేవుణు కిని ఏలుబడిఃదు మంజినార్లె.

11 నా ముస్కు నమకం ఇట్టి వందిజ్ లోకుర్ మీ ముస్కు నిందెజ్ మోప్పి మిజి మల్లెజ్ కిజి, మరి మీ ముస్కు అబద్ధమాతి సెఇ మాటెజ్ విజు వెప్పి వెలె మీరు దేవుణు సీని దీవనమ్కు మంజినికార్.

12 అయావలె నండొ సర్ద ఆజి మండ్రు. ఎందనిజ్ ఇహిజ పరలోకామ్దు* మిజి నండొ పలం దోహ్కాద్లె. మీ ముందాల బత్తిజి మహి దేవుణు ప్రవక్తరుజు వెటబా వారు యాలెకెండ మల్లెజ్ కితార్.

సోరు - జాయ్

13 మీరు యా లోకమ్దు సోరు ననికిదెర్. గాని, సోరుదిజ్† రుసి సోహిజ, ఎలాగ దనిజ్ రుసి మర్జి తప్పిస్తెజ్ ఆనాద్? అక వెల్లి విసీర్జి లోకుర్ మట్టెజ్ నె ఆఎండ మరి ఇని పణిదిజ్ బా రఇక.

14 మీరు యా లోకమ్దు మనివ్రిజ్ జాయ్ ననికిదెర్. గొఱొన్ ముస్కు మని పట్ను డాజ్ జి మండ్రెజ్ అట్విద్.

15 ఎయెర్బా ఉండ్రీ దీవ కసిసి తూముదాన్ ముసి ఇడ్ఎర్. గాని ఇండ్రొణిపరిజ్ విజేరిజ్ జాయ్ సినివజ దీవ కంతూదునె ఇడ్నార్.

16 అయాలెకెండనె, మీ బత్తు విజేరిజ్ జాయి సినివజ మండ్రెజ్. నస్తీవలె మీరు కిని నెగ్గి పణిజ సుడెజి లోకుర్ విజెర్ దేవుణు మంజిని బాడిడు మని మీ బుబాతి దేవుణుదిజ్ పొగిడినార్.

దేవుణు సీతి రూలుజు వందిజ్

17 దేవుణు సీతి రూలుజ్ గాని, దేవుణు ప్రవక్తరు వెప్తి మాటెజ్ గాని డెయ్ జి పొక్తెజ్ నాను వాత మన్న ఇజి మీరు ఒడ్బిమాట్. వనకాజ్ డెయ్ జిపొక్తెజ్ ఇజి సిల్లెద్, గాని అయాలెకెండనె పూర్తి కిదెజ్ నె నాను వాత మన్న.

18 ఏలుహన్ అసి బూమి ఆగాసం సిల్లెండ ఆతిజ్ బా దేవుణు మాటదు మని ఉండ్రీ ఇజిరి అక్కరం గాని, సున్న గాని, రాస్తీ మని లెకెండ పూర్తి ఆవిండ సొన్ ఉ ఇజి నాను మిజి నిజం వెప్పిన.

* 5:12 5:12 దేవుణు మంజినిమబాడ్డి † 5:13 5:13 యేసుప్రబు కాలమ్దు ఏలు దోహ్కొ లెకెండ మన్ని సోరు సిల్లెతాద్. అయాలె సోరువెట తెల్లని ఇన్కూబా కూడిత మహా తడి కిత్తిజు సోరు విజు కరిగిజి సొనాద్, ఇన్కూ మిగిలినాద్. అయాలె లోకుర్ సోరు రుసి సిల్లిక ఇజి వెప్పి మహార్.

19 ఎయెన్బా దేవుణు మాటదు మని ఇజిరి ఆగ్నెజ్ లోఇ ఉండ్రీ దనిజ్ లోజిజి మన్ఏండ, అయాలెకెండ్ లోజిఏండ మండ్రెజ్ ఇజి లోకురిజ్ నెస్సిస్తిజి వన్నిజ్, దేవుణు ఏలుబడిః కినివరి లోఇ లావ్ ఇజిరికాన్ లెకెండ్ వాండ్రు ఇడ్నాన్లె. గాని ఎయెర్బా దేవుణు మాటదు రాస్తిమని లెకెండ్ లోకురిజ్ నెస్సిసి అయాలెకెండ్నె కిజి మహిజ దేవుణు ఏలుబడిః కినివరి లోఇ వారు గొప్ప పెరికార్ ఆనాన్లె.

20 మీరు కిని పణిజ్, పరిసయరుజుని యూదురి రూలుజ్ నెస్సిస్తికార్ కిని పణిజ ముస్కు, దేవుణు ముందాల ఒదె సరి ఆతికెజ్ ఇహిజనె, మీరు దేవుణు కిని ఏలుబడిఃదు మంజినిదెర్లె ఇజి నాను మిజి వెహ్సిన.

సప్తిక ఆవద్

21 “లోకాజ్ సప్తెజ్ ఆవద్”* ఎయెన్బా ఒరెన్ వన్నిజ్ సప్తిజ, వన్నిజ్ తవ్వెండ తీర్పు వానాద్లె ఇజి ముందాహాన్ అసి వెహ్తి మని మాట మీరు వెహిమనిదెర్ గదె?

22 గాని ఏలు నాను మిజి వెహ్సిక ఇనిక ఇహిజ ఎయెన్బా, మరి ఒరెన్ వన్ని ముస్కు కోపం ఆతిజి వన్నిజ్ తీర్పు వానాద్. ఎయెన్బా మరి ఒరెన్ వన్నిజ్ “పణిదిజ్ రెఇకి”, ఇజి వెహ్తిజి వాండ్రు సన్హద్రి సజం ఎద్రు దన్ని వందిజ్ సమాదనం వెహ్తెజ్వలె. ఎయెన్బా మరి ఒరెన్ వన్నిజ్ “బుద్ధి సిలికి”, ఇజి వెహ్తిజి, వాండ్రు ఎలాకాలం సిసు కసి మంజిని బాడిఃదు అర్న మంజినాన్.

23-24 నీను దేవుణుదిజ్ సంద సుర్ని మాలి పీటాదు సంద సిదెజ్ సొనివెలె, మరి ఒరెన్ వన్నిజ్ నీ ముస్కు ఇనికాదొ కోపం మనాద్ ఇజి అబె నిజి ఎతు వాతిజ, సంద సిదెజ్తతి వన్కాజ్ అబె ఇడ్ఃజి వెటనె సంద సుర్ని మాలిపీట డిఃసి సొన్సి, ముందాల నీను వనివెట రాజినం ఆఅ. వెనుక మర్జి వాజి దేవుణుదిజ్ సంద సుర్ని సిఅ.

25 నిజి కోర్టు కిదెజ్అకు మని వన్ని వెట బేగి రాజినం ఆఅ. టయం మనివెలెనె ఆక కిఅ. సిలిజి వాండ్రు నిజి తీర్పు కిని వరిజ్ ఒపజెప్పాన్.

* 5:21 5:21 నిర్గమ 20:13.

తీర్పు కినికార్ నిజి జెలిదు ఇడదెజ్ అతికారిజ్ ఒవజెప్పార్. వాండ్రు నిజి జెలిదు ఇడ్నాన్.

26 ఉండ్రీ పయ్యబా సిల్లెండ అపు మనిక విజు సీనిదాక నీను వెల్లి వాదెజ్ అట్ఇ, ఇజి నాను నిజి నిజం వెప్పిన.

27 “రంకు బూలాదెజ్ ఆవద్” ఇజి వెప్పై మనిక మీరు వెహి మనిదెర్ గదె.

28 గాని నాను మిజి వెప్పొక ఇనిక ఇహిజ ఎయెన్బా మన్నుదు సెఇ అనదాన్ ఉండ్రీ అయ్లి కొడొడిజ్ బేస్తిజ వాండ్రు అయావలెనె దనివెట వన్ని మన్నుదు పాపం కితికాన్ ఆజినాన్.

29 నీ ఉణెర్ కణక నిజి తపు కిబిస్తిజ దనిజ్ లాగ్గి విసీర్అ. నీనె ఎల్ల కాలం సిను మంజిని బాడిడు సొన్ని అర్ఎండ, మీ ఒడొల్దాన్ ఉండ్రీ ముక సొహిజ అక్కాదె నెగెద్.

30 మరి నీ ఉణెర్ కియు నిజి తపు కిబిస్తిజ, దనిజ్ కత్తి విసీర్అ. నీనె ఎలాకాలం సిను మంజిని బాడిడు సొన్ని అర్ఎండ, నీ ఒడొల్దాన్ ఉండ్రీ ముక సొనికదె నెగెద్.

31 ఎయెన్బా వన్ని ఆల్నిజ్ డిసి సీదెజ్ ఇహిజ ఇబ్బెణిజ్ అసి నీను నా ఆల్ని ఆవద్ ఇజి దనిజ్ ఉండ్రీ విడిఱకు రాసి సీదెజ్ ఇజి వెప్పొక మీరు వెహి మనిదెర్గదె?

32 గాని నాను మీ వెట వెప్పొక ఇనిక ఇహిజ, రంకు బూలాఇదనిజ్ మాసి డిఱిసితిజ, వాండ్రు దనిజ్ రంకు బూలాదెజ్ కిబిస్తికాన్ ఆజినాన్. మరి ఎయెన్బా దనిజ్ పెండొలి కితిజ వాండ్రు దనివెట రంకు బూలానికాన్ ఆజినాన్.

ప్రమాణమ్కాజ్ వందిజ్

33 మరి ఇనిక ఇహిజ, “ ‘నీను కితి ఒట్టు పొక్తిక అయాలెకెండ్ కివండ తప్పెజ్ ఆవద్, దేవుణు ముందాల కితి ఒట్టుదిజ్ అయావజనె కిదెజ్’ ఇజి వెప్పొక ముందాహాన్ అసి మీరు వెహిమనిదెర్ గదె.

34 నాను మీ వెట వెప్పొక ఇనిక ఇహిజ ఇనిదనిజ్ బా ప్రమాణం కిమాట్. ఆకాసం తోడుః ఇజి వెహ్మాట్, అక దేవుణు బసిని సింహాసనం.

35 సిలిజ బూమి తోడు: ఇజి వెహ్మామాట్, అక దేవుణు వన్ని కాల్యు-
ఇడ్చి పీట. మరి యెరూసలేం తోడు: ఇజి వెహ్మామాట్, రాజు ఆతి
దేవుణుదిజ్ సెందితి పట్టం.

36 నీ బుర్ర తోడు: ఇజిబా వెహ్మామ, ఎందనిజ్ ఇహిజ నీ బుర్రది
కొప్పవెంటి ఉండ్రీబా తెలాజ్ గాని కరిజ్ గాని కిదెజ్ నీను అట్ఇ.

37 మీ మాటెజ్ 'ఒఒ ఇహిజ ఒఒ', ఇజి మండ్రెజ్. 'ఆఎద్
ఇహిజ ఆఎద్', ఇజినె మండ్రెజ్. వనకాజ్ మిస్తికెజ్ సెఇ వన్నిబాణిజ్
వానికెజ్".

కణకాదిజ్ బదులు కణక.

38 " 'కణకాదిజ్ బదులు కణక, పలుదిజ్ బదులు పలు'
ఇజి దేవుణు మోసేజ్ సీత్తి మన్ని రూలుదు వెహ్తా మహిక మీరు
వెహ్మామనిదెర్ గదె?

39 నాను మిజి వెహ్మాన, సెఇ పణిజ్ కిని వరిజ్ అడ్డు కిమ. మరి
నీను వన్ని ముస్కు కోపమాజి వాండ్రు నిజి కిత్తిదన్నిజ్ మర్జి కిదెజ్
ఆఎద్. ఎయెన్బా ఉణెర్ లెపాదు డెయ్తిజ, డేబ్ర లెపబా వన్నిజ్
తోరిన్అ.

40 ఎయెన్బా నిజి కోర్టు కిజి నీ సొక లాగ్దెజ్ సుడెతిజ, నీ
కండువాబా వన్నిజ్ సీజి మన్అ.

41 మరి, ఒరెన్ రోమ సయనమ్దికాన్ వన్ని ఒస్తుజ్ పిండిజి వన్ని
వెట 'ఉండ్రీ మయిలు దూరం రఅ' ఇజి నిజి బలవంతం కితిజ
వన్నివెట రుండి మయిలుజ్ దూరం ఇడ్డి సొన్అ.

42 నిజి లొస్సివన్నిజ్ సీఅ, మరి నిజి అపు లొస్సివరిబాణిజ్ మొకొ
మహ్మ".

నీ పగ్గతి వరిజ్ ప్రేమిన్అ.

43 " 'నీ పడకాతి వన్నిజ్ ప్రేమిన్అ, పగాతి వరిజ్ ఇస్టం ఆఎండ
మన్అ.ముస్కు కోపమ్దాన్ మన్అ', ఇజి వెహ్తామహిక మీరు
వెహ్మామనిదెర్ గదె?

44 గాని నాను మిజి వెహ్మాక ఇనిక ఇహిజ, మీ పగ్గతి వరిజ్ ప్రేమిస్తు,
మిజి హిమ్స కిజిని వరి వందిజ్ పార్దనం కిదు.

45 అహిజ మీరు పరలోకామ్ముడు మన్ని మీ బుబ్బతి దేవుణుది నిజమాతి కొడొఱ్ ఇజి తోరె ఆనిదెర్లె. దేవుణు సెఇవరి ముస్సుబా నెగ్గివరి ముస్సుబా వన్ని పొదు జాయ్ సిబిసినాన్. నాయం మని వరి ముస్సుబా నాయం సిలివరి ముస్సుబా పిరు పోక్సినాన్.

46 మిజి ప్రేమిస్సివరిజె మీరు ప్రేమిస్తిజ దేవుణు మిజి పలం సీనాన్ ఇజి మీరు ఒడిఱిబిజినిదెరా? పన్ను పెర్నికార్బా ఆహె కిజినార్ గదె?

47 మీరు మీ కూల వరిజె మీరు మాడిఱిసినిదెర్ ఇహిజ మీరు ఆఇకార్ కినిదనిజ్ ఇంక మిస్తిక ఇనిక కిజినిదెర్? యూదురు ఆఇకార్బా అయాలెకెండ్ కిజినార్ గదె?

48 పరలోకామ్ముడు మన్ని మీ బుబ్బతి దేవుణు ఇని కల్తి సిలికాన్. అందెజె మీరుబా అయాలెకెండ్నె మండ్లు.”

6

జాగర్త మండ్లు

1 మీరు కిని నెగ్గి పణిజ్ లోకుర్ సుడెదెజ్ ఇజి వరి ముందాల కివిండ జాగర్త మండ్లు. ఎందనిజ్ఇహిజ ఆహె కితిజి వరలోకామ్ముడు మని బుబ్బతి దేవుణు బాణిజ్ మిజి ఇని పలంబా దొహ్కావద్.

2 అందెజె అవ్సరం మని వరిజ్ ఇనికబా సితిజి, వేసం కినికార్ కిని లెకెండ్ అక విజేరిజ్ తెలిని లెకెండ్ జోడుఱిబాంక ఊక్పిసి డేల్లి వెహ్కాట్. విజెరి ముందాల మజి గొప్ప పేరు వాదెజ్ ఇని ఆసదాన్ వారు యూదురు మీటిజ్ కిని ఇల్కాజ్, మరి సర్దు ఆహె కిబిస్సార్. వరిజ్ అయావలెనె పూర్తి పలం దొహ్కా మనాద్ ఇజి నాను మిజి నిజం వెహ్కాన్.

3 గాని నీను అవ్సరమ్ముడు మనివరిజ్ సాయం కినివెలె, నీ ఉణెర్ కియు కినిక నీ డేబ్బె కియు నెస్టెజ్ ఆవద్.

4 అహిజ నీను సితిక ఎయెర్బా నెన్ఎండ మంజినాద్. అయావలె ఎయెర్బా నెన్ఎండ నీను కితిక సుడెఱిబి నీ బుబ్బతి దేవుణు నిజి పలం సీనాన్లె.

5 మీరు పార్దనం కినివెలె వేసం కిని వరి లెకెండ్ మన్మాట్. లోకుర్ విజేరె సూణి లెకెండ్ యూదురు మీటిజ్ కిని ఇల్కాజ్, మరి సర్దు నిల్లి

పార్లనం కిడెజ్ వరిజ్ ఇస్టం. వరిజ్ పూర్తి పలం దొహ్క మనాద్ ఇజి నాను మిజి నిజం వెప్పిన.

6 గాని నీను పార్లనం కినివెలె. నీను గదిదు సొన్ని సేష్టా కెప్పి, ఎయెర్బా తొఇ నీ బుబ్బాతి దేవుణు వెట పార్లనం కిఅ. అహిజ ఎయెర్బా నెస్ఎండ నీను కితిక సుడెజిని ఎయెరిజ్బా తొరె ఆఇ నీ బుబ్బాతి దేవుణు నిజి పలం సీనాన్.

7 మరి మీరు పార్లనం కినివెలె యూదురు ఆఇ వరి లెకెండ్ పణిదిజ్ రెఇ మాటెజ్ వెహ్మోట్. అయాలెకెండ్ లావ్ వర్ గితిజానె దేవుణు వినాన్ ఇజి వారు ఒడెబిజినార్.

8 మీరు వరిలెకెండ్ మండ్రెజ్ ఆవద్. ఎండనిజ్ ఇహిజ మిజి అవ్ నరం ఆతిక ఇనిక ఇజి మీరు లొన్ని ముందాల్నె మీ బుబ్బాతి దేవుణు నెసినాన్.

9 “అందెజె మీరు యా లెకెండ్ పార్లనం కిడెజ్. ‘వరలోకామ్దు మని మా బుబ్బాతి దేవుణు, లోకుర్ విజెరె నీ పేరు గొప్పు నెగ్గి ఇజి గవరం సిప్పిర్.

10 నీ ఏలుబడిః లోకుర్ విజెరి ముస్కు మనీద్. వరలోకామ్దు నిజి ఇస్టమాతికెజ్ జర్గిని లెకెండ్ నె బూమి ముస్కుబా జర్గిపిద్.

11 రోజురోజుదిజ్ మజి కావాలిస్తి తిండి అయ రోజు మజి సీజి మన్అ.

12 వేరెదికార్ మా వెట కితి తపుజ్ మాపు వరిజ్ సెమిస్తి లెకెండ్ నె, మాపు కితి తపుజ్ మజిబా సెమిన్అ.

13 పాపం కిబిన్ని సెఇ ఆసెజ్ మా లొఇ రెఎండ, సయ్తూను బాణిజ్ మజి తప్పిన్అ’.

14 లోకుర్ మిజి కిని తపుజ్ మీరు వరిజ్ సెమిస్తిజి, వరలోకామ్దు మన్ని మీ బుబ్బాతి దేవుణుబా మీరు కిని తపుజ్ మిజి సెమిస్నాన్.

15 గాని, మీరు లోకుర్ మీ వెట కిని తపుజ్ మీరు వరిజ్ సెమిస్ఎండ మహిజ, వరలోకామ్దు మన్ని మీ బుబ్బాతి దేవుణుబా మీరు కిని తపుజ్ మిజి సెమిన్ఎన్.”

ఉపాస్

16 “మీరు ఉపాస్ కినివలె, వేసం కిని వరిలెకెండ్ మండ్రెజ్ ఆవద్. ‘మాప్ ఉపాస్ మంజినాప్’ ఇజి విజేరె నెస్సెజ్ ఇజి వారు మొకొ నీర్సం కిజి మంజినార్. అయావలెనె వరిజ్ పూర్తి పలం దొహ్క మనాద్ ఇజి నాను మిజీ నిజం వెహ్సిన.

17-18 గాని మీరు ఉపాస్ కినివెలె బురాద్దు నూనె రాసె ఆజి మొకొం ఊర్పాజి మండ్రు. అహిజ మీరు ఉపాస్ కనిక లోకుర్ ఎయెర్బా నెన్ ఎర్. గాని ఎయెర్బా తొఇ మీ బుబ్బాతి దేవుణు ఒరేండ్రె నెస్సాన్. ఎయెర్బా నెన్ ఎండ మీరు కినిక సుడఃజిని మీ బుబ్బాతి దేవుణు మిజీ పలం సీనాన్.”

సమ్సారం

19 డొజారి డుఃగ్జి ఒతెజ్ అక్కు మని, మరి సెదని కరి తిండ్రెజ్ అకుమని యా బూమి ముస్కు మీ వందిజ్ సమ్సారం గణన్ మాట్.

20 గాని డొజారిబు డుఃగ్జి ఒతెజ్ అట్ ఇ, మరి సెద గాని కరి గాని పాడః కిడెజ్ అట్ ఇ దేవుణు మంజిని బాడిఃదు మీ వందిజ్ సమ్సారం గణస్సు.

21 ఎందనిజ్ ఇహిజ నీ సమ్సారం ఎంబె మనాదొ అబెనె నీ మస్సుబా మంజినాద్.

22 కణక ఒడొల్ దిజ్ దీవ లెకెండ్ నె మనాద్. నీ కణక నెగ్గిక ఇహిజ నీ ఒడొల్ దిజ్ విజు నెగ్గికెజ్ తసి మంజినాద్.

23 నీ సెఇ ఉదెసమ్ దాన్ నీ కణకెజాణిజ్ సుడిఃజి మహిజ, నీ మస్సు విజు సీకటి మంజినాద్. నీ ఒడొల్ విజుబా సీకటి ఆజి మంజినాద్. నిజి మనాద్ ఇజినీను ఒడొల్ బిజిని జాయ్ సీకటి ఆతిజ, అయ్ సీకటి ఎస్సోనో సీకటి.

24 ఎయెన్ బా రిఎర్ ఎజుమానిరు వందిజ్ ఉండ్రె లెకెండ్ పణి కిడెజ్ అట్ ఎన్. ఒరెన్ వన్నిజ్ ప్రేమిసి మరి ఒరెన్ ముస్కు ఇస్టం సిల్లెండ్ర మంజినాన్. సిల్లిజ ఒరెన్ వన్నిజ్ లొజిజి నమ్మకమాతి వనిలెకెండ్ మంజినాన్. మహివన్ని ముస్కు సెఇ మాట్ ఇ వర్గిజి మంజినాన్. అయ్ లెకెండ్ నె దేవుణుదిజ్ ని డబ్బుదిజ్ ఉండ్రె లెకెండ్ ప్రేమిస్టెజ్ మీరు అట్ ఇదెర్.

విసారిన్ మాట్

25 అందెజె నాను మిజి వెప్పిక ఇనిక ఇహిజ, ఇనిక తినాప్లె, ఇనిక ఉణాప్లె ఇజి మీ బత్తు వందిజ్విసారం ఆమాల్. మరి మా ఒడొల్వందిజ్ ఇనిక పొరపానాప్లె ఇజి ఒడిబిమాల్. మీ పాణం తిండిదిజ్మిస్తిక ఆఎదా? మీ ఒడొల్ సొక్క పాతెజ మిస్తిక ఆఎదా?

26 ఆగాసమ్దు ఎగ్రిజిని పొటిజ సుడెదు. అవి విత్తెఉ, కొయ్తెఉ, ఒసి కొటుదు వాక్తెఉ గాని పరలోకామ్దు మని మీ బుబ్బాతి దేవుణు వనకాజ్ పొస కిజినాన్. మీరు వన్నా మిస్తి విలువ మనికిదెర్ ఆఇదెరా?

27 మీ లోఇ ఎయెన్బా విసారిస వన్ని బత్తుదిజ్ ఉండ్రీ గంట కుడుఃపైజ్ అట్నాండ్రా?

28 మరి ఎండనిజ్ సొకెజ వందిజ్ మీరు విసారిసినిదెర్? మడిజు మని పూజు సుడెదు, అవి కస్తబాడెఉ, సొక కిదెజ్ నూలుజ్ తయార్ కిఉ.

29 అహిజ్బా విజు ఆస్తి కలిగితి మన్ని సొలోమోను రాజు యా ఉండ్రీ పూజు అకెండ్ర సొకు మన్ని ఉండ్రీ సొక్క తొడిగివితాన్, ఇజి నాను మిజి వెప్పిన.

30 నేడ్రు మంజి విగెహిజ్ సినుద్ సురె ఆని మడిజు మని యా గడిదిజ్ దేవుణు యా లెకెండ్ర సొకు సిత్తాన్. అహిజ, ఇజిరి నమకం మనికిదెరా మరి ఒదె నగెండ్రమిజి సొకెజ్ తొడిగిన్ఎతాండ్రా?

31 అందెజె మీరు, “ఇనిక తినాప్లె, మరి ఇనిక ఉణాప్లె, సిలిజ ఇనిక పొర్పానాప్లె”, ఇజి ఒడిబిజి బాద ఆమాల్.

32 ఎండనిజ్ ఇహిజ దేవుణుదిజ్ నెన్ఇకార్నె వినక వందిజ్ రెబాజినార్. యాకెజ్ విజు మిజి అవ్నరం ఇజి పరలోకామ్దు మని మీ బుబ్బాతి దేవుణు నెసినాన్.

33 గాని విజు దనిజ్ ఇంక దేవుణు ఏలుబడిః కిని వందిజ్ని మరి వన్ని ఎద్రు మీరు నీతినిజయ్తిదాన్ మండ్రెజ్ ఇజి ఆస ఆజి మండ్రు. నస్తివలె మిజి కావాలిస్తికెజ్ విజు మిజి దోహ్తె.

34 విగెహిజ్ వందిజ్ విసారిస్మాట్. విగెహిజ్ జర్గిని వన్నా వందిజ్ విగెహిజ్ విసారిస్తు. ఎమెణి రోజుదిజ్ తగితి కస్తం అయ రోజుదు మంజినె.

7

తీర్పు కిమాట్

1 “మహి వరి ముస్కు తీర్పు కిమాట్. అహిజ దేవుణు మిజిబా తీర్పు కినాన్లె.

2 మీరు మహివరిజ్ ఎలాగ తీర్పు కినిదెరో అయలెకెండ్నె దేవుణు మిజిబా తీర్పు వానాద్లె. మీరు ఇని కొల్తదానె దేవుణు మిజిబా తీర్పు సీనాన్లె.

3 నీ కణకాదు ఉండ్రీ తూలం ననిక మహివలె, దనిజ్ సుడ్ఎండ, నీను, నీ తంబెరి కణకాదు మని ఇజిరి కసరాదిజ్ ఎండనిజ్ బేసిని?

4 ‘నీ కణకాదు తూలం ననిక మనివెలె అక లాగ్ఎండ, నీ తంబెరి కణకాదు మని ఇజిరి కసరాదిజ్ నాసు లాగ్గి విసీర్న్’ ఇజి నీను ఎలాగ వెప్పిని?

5 వేసం కినికెదెరా, ముందాల నీ కణకాదు మని తూలం ననిక లాగ్అ. అయావలె నీ తంబెరి కణకాదు మని ఇజిరి కసరాదిజ్ నెగెండ్ సుడఃజి లాగ్దెజ్ అట్టి.

6 దేవుణుదిజ్ సెందితి సజతిజ్ అక్కెజ్ ఇస్టం కిఇ వరిజ్ నెస్పిస్టెజ్ ఇజి సుడఃమట్. అయలెకెండ్ కితిజ, వారు తిండి సీని వరిజ్ కట్టి సెఇ నుకుడిజ్ లెకెండ్ వారు కొపం ఆజి మర్జి మీ ముస్కు వాజి అర్నార్. గొప్ప విలువ మనికెజ్ పండ్రీజ్ ముందాల ఇట్టిజ అక్కెజ్ వన్కాజ్ కాల్యాణిజ్ మట్టి లెకెండ్ వారుబా కినార్లె.

7 మీరు ఇనిక లొస్సిదెరో అక మిజి దేవును సీనాన్. ఇనిక మీరు రెబాజనిదెరో అక దేవుణు మిజి సీనాన్. కొతు మీ వందిజ్ దేవుణు సెప్లా రే ఆనాన్లె.

8 లొస్సివరిజ్ విజేరిజ్ దొహ్కె, రెబానివన్నిజ్ తోరె ఆజినాద్. కొత్తిని వన్నివందిజ్ సేప్లా రే ఆనాద్.

9 మీ మరిన్ మిజి తిండి లొస్సిజ, మీరు ఎయదెర్బా వన్నిజ్ పణుకు సీనిదెరా?

10 మరి వాండ్రు మొయ లొస్సిజ, సరాస్సీనిదెరా?

11 మీరు సెఇకిదెర్ ఆతిజ్బా మీ కొణ్ఱొరిజ్ నెగ్గి ఇనామ్కునె సీదెజ్ ఇజి నెస్సిదెర్. అహిజ పరలోకామ్దు మని మీ బుబ్బాతి దేవుణు, వన్నిజ్ లొస్సివరిజ్ దినిజ్ ఇంక మరి ఒదె నెగ్గి ఇనామ్కు సీవ్ండ్రా?

12 అందెజె విజు సజతిజ లోఇ, మహికార్ మిజి ఇనిక కిదెజ్ ఇజి మీరు కొరిజినిదెరొ అయలెకెండెనే మీరు వరిజ్ కిదు. దేవుణు మోసెజ్ సీతి రూలుజ్ని దేవుణు ప్రవక్తరు వర్గితి మాటెజ అర్లం యాకాదె.”

ఒసార్ సరిని ఇహ్కు సరి

13 ఇహ్కు సరి గవ్నిదాన్ సొండ్రు. ఎందనిజ్ ఇహిజ నాసనమ్దు సొని సరి ఒసార్దిక. అయ గవునిబా ఒసార్దిక. అయ సర్దు సొనికార్ నండొండార్ మనార్.

14 ఎలాకాలం మంజిని బత్తు సీని సరి ఇహ్కుదికాదె, దని గవునిబా ఇహ్కుదిక. అయ సరిదాన్ నడిఱినికార్ కొకొండారె.

మరాన్ని దని పట్టు

15 నెగ్గికాప్ ఇజి నాటిసినికార్ గాని తపు నెస్సిస్సి ప్రవక్తరు వందిజ్ జాగర్త మండ్రు. వారు ప్రమాదమాతి మూర్కతం మని కార్నుకుడిజ్ లెకెండె మనికార్. గాని వెల్లిహాన్ గొరె లెకెండె ప్రమాదం సిలికార్ ఇజి తోరె ఆజినార్.

16 వరి పణిజాణిజ్ మీరు వరిజ్ నెస్సిదెర్లె. ఎయెర్బా సాప్పుతువెజాణిజ్ ద్రాసపట్టు కొయ్విర్. సాప్పు మరెకాజ్ బొడె పట్టు కొయ్విర్.

17 అయలెకెండెనే విజు నెగ్గి మరెకాజ్, నెగ్గి పట్టునె అస్సె, మరి సెఇ మరాతు సెఇ పట్టునె అస్సె.

18 ఉండ్రె నెగ్గి మరాతు సెఇ పట్టు అస్ఉ, మరి సెఇ మరాతు నెగ్గి పట్టు అస్ఉ.

19 నెగ్గి పట్టు అస్ఇ మరెక్ విజు కత్తి సిసుద్ విసీరె ఆనెలె.

20 అయలెకెండెనే వరి పణిజాణిజ్ మీరు వరిజ్ నెస్సిదెర్.

21 ప్రబువా, ప్రబువా ఇజి నజీ కూక్కికార్ విజెరె దేవుణు ఏలుబడిఁదు మన్ఎర్, గాని పరలోకామ్దు మని నా బుబెజ్ ఇష్టమాతి వజ కినికాండ్రె దేవుణు ఏలుబడిఁదు మంజినాన్.

22 తీర్పు తీరిసిని దినమ్దు నండొండొర్ నా డగ్గు వాజి, “ప్రబువా, ప్రబువా మాపు నీ పేరుదాన్ దేవుణు ప్రవక్తరు వజ వర్గిఎతాపా? నీ పేరుదాన్ దెయమ్కాజ్ పెర్వతాపా? నీ పేరుదాన్ నండొ బమ్మాతి పణిజ్ కిఎతాపా?”, ఇజి వెహ్సార్.

23 అయావలె, “నాను మిజీ ఎసెజ్బా నెన్ఎత. సెఇ పణిజ్ కినికిరెరా, నా డగ్గుహన్ సొండ్రు ఇజి వరిజ్ తినాజ్ వెహ్సా.

బుద్ది మనికాన్ని బుద్ది సిలికాన్

24 అందెజె, యా నా మాటెజ్ వెంజి అయా వజ కినికాన్ ఎయెన్బా, సటు ముస్కు వన్ని ఇలు తొహ్తి బుద్ది మనివన్నిజ్ పోలిత మనాన్.

25 పిరు వాతాద్. గడ్డెజ్ నిండ్రెజి సొహె. గాలి వాజి అయ ఇలు ముస్కు డెఃతూద్ గాని అయ ఇలు పునాది సటు ముస్కు మనిజ్ అర్ఎతాద్.

26 గాని యా నా మాటెజ్ వెంజి వన్కా లెకెండొ కిఇకార్ ఎయెన్బా ఇస్కు ముస్కు వన్ని ఇలు తొహ్తి బుద్ది సిలి వన్నిజ్ పోలిత మనాన్.

27 పిరు వాతాద్. గడ్డెజ్ నిండ్రెజి సొహె. గాలి వాజి అయ ఇలు ముస్కు డెఃయ్తాద్. అయావలె అయ ఇలు నండొ జాటుదాన్ అడిఃగి అర్తాద్.”

28 యేసు యా మాటెజ్ వెహ్తి వీజితిజ్ లోకుర్ విజెరె వన్ని బోదదిజ్ బమ్మ ఆతార్.

29 ఎందనిజ్ ఇహిజు వాండ్రు, యూదురి రూలుజ్ నెస్సిస్సి వరి లెకెండొ ఆఎండ, అతికారం మనివన్ని లెకెండొనె వాండ్రు బోదిస్తాన్.

8

1 యేసు అయ గొరొన్డిఃగ్జి వాతివలె మంద లోకుర్ వన్ని వెసుక వాతార్.

2 కుస్తు రోగం* మనికాన్ ఒరెన్ వాతండ్రి వన్ని ముందాల ముణుకుజ్ ఊర్జి, “ప్రబువా, నాను నెగెన్ ఆదెజ్ ఇజి నిజి మన్ను మహిజ, నజి నెగెన్ కిదెజ్ అట్టి”, ఇజి వెహ్తాన్.

3 అందెజె వాండ్రు కియు సాప్పి వన్నిజ్ముట్టాండ్రె, “నజి మన్ను మనాద్, నీను నెగెన్ ఆఅ”, ఇజి వెహ్తాన్. వెటనె వన్నిజ్ముహి పెరి జబు డిఃస్త సాహద్.

4 నస్తవలె యేసు వన్నివెట, “యాక ఎయెరిజ్బా ఇనికబా వెహ్మ. నీను తిసాజ్ సాన్ని నీ ఒడొల్ పుజేరిజ తోరిస్అ. నీను నెగెన్ ఆతి దనిజ్ వరిజ్ రుజుప్ లెకెండ్ మోసె ముజలె ఆడ్ర సితి వజ దేవుణుదిజ్ సంత సిఅ”, ఇజి వెహ్తాన్.

ఒరెన్ సదాతిపతి ఆతి వన్ని నమకం

5-6 యేసు కపెర్నహము ఇని పట్టమ్దు వాతివెలె సదాతిపతి† ఒరెన్ వన్ని డగ్రు వాతండ్రి, “ప్రబువా, నా పణిమన్ని ఒరెన్ కికు కాల్కు. సాని జబుదాన్ నండొ బాద ఆజి నా ఇండ్రొ గూర్త మనాన్”, ఇజి వెహ్తాన్ బతిమాలితాన్.

7 “నాను సాన్ని వన్నిజ్ నెగెన్ కిన”, ఇజి యేసు వెహ్తాన్.

8 నస్తవలె అయ సయ్నమ్ది అతికారి ఈహు వెహ్తాన్, “ప్రబువా, నీను నా ఇండ్రొ వాదెజ్ నాను తగ్గిక ఆఎ. గాని నీను ఉండ్రె మాట వెహ్తాజ ఆనాద్, నా పణిమన్ని నెగెన్ ఆనాన్.

9 నీను అయాలెకెండ్ కిదెజ్ అట్టిఇజి నాను నెసిన. ఎందనిజ్ ఇహిజ నా ముస్కు అతికారం మన్నికార్ మనార్. నా అడిగి సయ్నమ్దికార్ మనార్. నాను ఒరెన్ వన్నిజ్ ‘సాన్అ’ ఇహిజ సానాన్. మరి ఒరెన్ వన్నిజ్ ‘రఅ’ ఇహిజ వానాన్. నాను నా పణి మనిసిదిజ్ ‘అయ పణి కిఅ’ ఇహిజ వాండ్రు ఆక కినాన్.”

10 యేసు యా మాట వెంజి బమ్మ ఆతాండ్రె వన్ని వెనుక వానివరిజ్ సుడొజి, “వన్నిజ్ మన్ని లెకెండ్ దేవుణు ముస్కు నిసా పెరి నమకం

* 8:2 8:2 కుస్తు రోగం ఇహిజ పెరిజబ్బు అయ జబ్బు వాతిజ కిక్కు కాల్కు మన్ని డెఃస్కెజ్ తెవ్జ సానాదెలె జబ్బు మన్నిబాన్ ముట్టిజ నెన్వద్ † 8:5-6 8:5-6 సదాతిపతి ఇహిజ రోమనయ్యమ్దు మన్ని వందమణిసిర్ నయ్యమ్ది వరిజ్ ఆతికారి.

మని ఎయెరిజ్బా ఇస్రాయేలు లోకుర్ నడిమి, నాను సుడేదెజ్ సిల్లె ఇజి నాను మిజి నిజం వెప్పిన.

11 నాను మిజి వెప్పిక ఇనిక ఇహిజ, దేవుణు కిని ఏలుబడిః వానివలె, తూర్పుదాన్ పడఃమరదాన్ నండొ లోకుర్ వాజి అనిగొగొర్ ఆతి అబ్రాహము, ఇస్సాకు, యాకోబు ఇని వరివెట పరలోకామ్దు విందుదు బస్సార్.

12 గాని దేవుణు కిని ఏలుబడిఃదు తవ్వెండ మంజినావలె ఇజి ఒడఃబిజిని వరిజ్ వెల్లి సీకటిదు విసీర్నాన్. అబె లోకుర్ అడఃబాజి పల్కు కొహ్క్కి మంజినార్.”

13 యేసు అయా సదాతిపతిజ్, “సాన్అ, నీను నమ్మితి వజనె జర్గినాద్”, ఇజి వెహ్తాన్. అయ గడిఃయాదునె వన్ని పణిమనిసి నెగెండొ ఆతాన్.

యేసు నండొ లోకురిజ్ నెగెండొ కిజినాన్.

14 వెనుక యేసు పేతురు ఇండ్రొ వాతాన్. వన్ని మీమ్సి నోబుదాన్ గూర్తిమనిక సుడఃతాన్.

15 వాండ్రు దని కియుదు ముట్టిజ్ సరి దనిజ్మహి నోబు డిఃస్త సాహద్. అది నిజితాదె వన్నిజ్ నెగెండొ సుడఃదెజ్ మొదోల్స్తాద్.

16 పొదు ఆతివలె, దెయమ్కు అస్తి వరిజ్ నండొండారిజ్, లోకుర్ వన్ని డగ్గు తతార్. వాండ్రు ఉండ్రీ మాటదానె దెయమ్కాజ్ పెర్తాన్, మరి జబుది వరిజ్ విజ్జేరిజ్ నెగెణ్ కితాన్.

17 “వాండ్రు మా నీర్సమ్కు లాగితాన్, మరి మా జబుజ్ వాండ్రు పిండితాన్”☆ ఇజి యెసయ ప్రవక్త వెట దేవుణు ముజాల వర్గితి మాటెజ్ పూర్తి ఆదెజ్ యాక జర్గితాద్.

యేసు వెట సాండ్రెజ్ ఇహిజ ఇనిక కిదెజ్

18 యేసు వన్ని డగ్గు మని మంద లోకురిజ్ సుడఃజి సమ్దరం అతాహ పడక సాండ్రెజ్ ఇజి వన్ని సిసూరిజ్ వెహ్తాన్.

☆ 8:17 8:17 యెసయ 53:4.

19 నస్తవలె, యూదురి రూలుజ్ నెస్పిస్పికాన్ ఒరెన్ వన్ని డగ్రు వాతండ్రె, “బోద కనికి, నీను ఎంబె సొహిజ్ బా నీ వెట నానుబా వాన”, ఇజి వన్నిజ్ వెహ్లాన్.

20 నస్తవలె యేసు, “నకెజి బొరోజ్ మనె, ఆగాసమ్దు ఎగ్రిజిని పొటిజి గూడుకు మనె, గాని లోకు మరిసి ఆతి నజీ బుర్ర డుట్నీ మండ్రెజ్ బా బాడిః సిల్లెద్”, ఇజి వెహ్లాన్.

21 సిసూర్ లోఇ ఒరెన్ వాతండ్రె, “ప్రబువా నాను ముందాల సొన్ని నా బుబ్బు సాతి పిన్ గు పెర్జి పొక్సి వాన”, ఇజి వెహ్లాన్.

22 నస్తవలె యేసు, “సాతికారె‡ వరి సాతి వరిజ్ పెర్జి పొక్సిర్, నీను నావెట రఅ”, ఇజి వన్నిజ్ వెహ్లాన్.

యేసు తుపాన్ దిజ్ ఆలెప్పిసినాన్

23 యేసుని వన్ని సిసూర్ డోణి ఎక్టారె అబ్బెణిజ్ సోత సాహార్.

24 వారు సొన్ని మహిజ్ యేసు డోణిదు నిద్ర కిజి మహాన్. వెటనె అయ సమ్దరమ్దు గాలితూపాన్ రేజితాద్. ఉల్కెజ్ వాజి అయ డోణి మున్కు అర్తె.

25 సిసూరు సొన్ని వన్నిజ్ నిక్టారె, “ప్రబువా, సాన సొనాఫ్లె, మజీ రక్సిన్ అ”, ఇజి వన్నిజ్ నిక్టార్.

26 అయావలె యేసు వరిజ్, “ఎందనిజ్ మీరు నిసా తకు నమకం మనికిదెర్ ఆజినిదెర్?”, ఇజి వెహ్లాండ్రె నిజ్ జి గాలిదిజ్ ఉల్కెజి అలెజి మన్ అ ఇహాన్. ఆకెజ్ పూర్తి పలక్ ఆతె.

27 వారు బమ్మ ఆతారె, “వీండ్రు ఎలాగ మర్రికాండ్రో? గాలిని ఉల్కెజ్ బా వన్నిజ్ లోజిజిన”, ఇజి వర్గితార్.

దెయం అస్తి రిఎరిజ్ నెగెండ్ కిజినాన్

28 యేసు సమ్దరం అతహి పడక మని గదరెను ఇని నారు అందితిజ్, దెయం అస్తికార్ రిఎర్, యూదురు వరి సాతివరిజ్ సమాది

‡ 8:22 8:22 అయాలెకెండ్ వెప్పివలె దేవుణువెట ఇని పొత్తు సిల్లి ఆత్మదిజ్ సెందితి నజతిజి వందిజ్ యేసు వెప్పినాన్. నిజం సాతివరి వందిజ్ ఆవిద్. యా మాటెజ్ దేవుణు ఏలుబడిః ఆడిగి మన్ ఇ వరి వందిజ్ వెప్పినాన్. యా మాటెజ్ యాలెకెండ్ నె లూక 15:24,32, మరి ఎపెను 2:1 బాన్ బా రాస్త మనాద్.

కిని సాలమ్కాణిజ్కీ సోతారె వన్ని ఎద్రు వాతార్. వారు జంతు నని మూర్కతం మనికార్కక ఎయెర్బా అయ సరి సోన్ఎర్.

29 “ఓ దేవుణు మరిసి, మా వెట మిజీ ఇని పణి? కాలం వాని ముజాల మజీ బాద కిదెజ్ ఇబ్బె వాతిదా?”, ఇజి డేడిసిస్తార్.

30 వరి ఎద్రు కండెక్ దూరమ్దు పండ్రీజ్ మంద మెయ్జి మహె.

31 అయ దెయమ్కు వన్నిజ్ “నీను మజీ ఉల్చిని లెకెండ్ ఇహిజ, అయ పండ్రీజ లొఇ మజీ పోక్అ”, ఇజి బతిమాల్తె.

32 వాండ్రు వన్నాజ్ “సొండ్రు” ఇజి వెప్పిజ్అయ దయమ్కు వరిజ్ డిసైనె పండ్రీజ లొఇ సొహె. అయ మంద పండ్రీజ్ విజు గొరొన్ ముస్సుహాన్ ఉహ్కీ సొహెనె సమ్దరమ్దు అర్తె సాతె.

33 పండ్రీజ్ మేప్పికార్ ఉహ్కీ సొన్ని పట్టమ్దివరిజ్ జర్గితికెజ్ విజు వెప్టార్. దెయం అస్సి మహివరిజ్ జర్గితికబా వెప్టార్.

34 నస్తివలె అయ పట్టమ్దికార్ విజేరె సోసి యేసుజ్ సుడేదెజ్ వన్ని ఎద్రు వాతార్. వన్నిజ్ సుడేతిజ్, వరి నారు డిసి సోన్అ ఇజి వన్నిజ్ బతిమాల్తార్.

9

యేసు కిక్కుకాల్కు అర్తి వన్నిజ్ నెగెండ్ కిజినాన్

1 యేసు డోణి ఎక్తాండ్రె సెరు డాట్టి కపెర్నహము ఇని వన్ని సొంత పట్టమ్దు వాతాన్.

2 అయావలె సెగొండార్ కికు కాల్కు అర్చి మంసమ్దు గూర్జిమహి ఒరెన్ వన్నిజ్ యేసు డగ్రు తతార్. దేవుణు ముస్సు వరి నమకం యేసు సుడేతాండ్రె, “మరిన్, దయ్రమ్దాన్ మన్అ, నీ పాపమ్కు సెమిస్త మన”, ఇజి కికు కాల్కు అర్తి వన్నిజ్ వెప్టాన్.

3 యూదురి రూలుజ్ నెస్పిస్సికార్ సెగొండార్ “వీండ్రు దేవుణుదిజ్ దూసిస్సాన్”, ఇజి వరి లొఇ వారె వర్గితార్.

§ 8:28 8:28 యేసుప్రబు కాలమ్దు సుట్టు బొరొకిజి సాలమ్లెకెండ్ తయార్ కిజి సాతి వరిజ్ సమాది కిజి మహార్. పీసుగు సాలమ్లొఇ ఇడ్డి పణుకుదాన్ సాలమ్దిజ్ మూసి మహార్.

4 యేసు వరి మన్నుదు మనికెజ్ నెస్తాండ్రె ఈహు వెహ్తాన్ “మీరు ఎందనిజ్ మీ మన్నుదు సెఇకెజ్ ఒండేజినిదెర్?”.

5 “నీ పాపమ్కు సెమిస్తమన ఇజి వెహ్నిక సులునా? నీను నిజ్జి నడిఅ ఇజి వెహ్నిక సులునా?”.

6 “లోకు మరిసి ఆతి నజీ బూమి ముస్సు పాపమ్కు సెమిస్తెజ్ అతికారం మనాద్ ఇజి మీరు నెస్తెజ్ వెలె.” వెనుక కికు కాల్యు అర్దివన్ని వెట, “నిజ్అ నీ మన్సం అసి ఇండ్రొ సొహ్అ”, ఇజి యేసు వెహ్తాన్.

7 వాండ్రు నిజీతండ్రె ఇండ్రొ సొహ్అ.

8 లోకుర్ విజేరె అక నుండేజి బమ్మ ఆతార్. లోకురిజ్ యా లెకెండ్రె అతికారం సితీ దేవుణుదిజ్ పొగిడితార్.

యేసు మత్తాయిజ్ కూక్సినాన్

9 యేసు అబెణిజ్ సొన్ని మహిజ్, పన్ను పెర్నికాన్మత్తయి ఇనికాన్వన్ని బాడిడు బస్త మహాన్. యేసు వన్నిజ్ నుండేజి, “నా వెట రఅ”, ఇజి వెహ్తాజ్, వాండ్రు నిజీతాండ్రె యేసు వెట సొహ్అ.

10 వెనుక యేసు మత్తాయి ఇండ్రొ బోజనం కిదెజ్ బస్తి మహిజ్, నండొండార్ పన్ను పెర్నికాన్ని* పాపం కినికార్ ఇజి పరిసయెరు వహ్నికార్ వాతారి వన్ని వెటని వన్ని సిసూర్ వెట బోజనమ్దిజ్ బస్తార్.

11 పరిసయెరు అక నుండేజి, “ఎందనిజ్ మిజి నేర్పిన్నికాన్ పన్ను పెర్నివరి వెట, పాపం కినివరి వెట బోజనం కిజినాన్”, ఇజి వన్ని సిసూర్జి వెన్బాతార్.

12 యేసు అయ మాట విహండ్రె, “జబు మనివరిజె డాక్టర్ అవ్సరం, నెగెణ్ మని వరిజ్ డాక్టర్ అవ్సరం సిల్లెద్”, ఇజి వెహ్తాన్.

* **9:10 9:10** పన్ను పెర్నివరిజ్ యూదురు ఇస్టం కిపితార్. యూదురు పన్ను పెర్నివరిజ్ తక్కుదికార్ మరి గొప్ప పాపం కినికార్ ఇజి ఒండేబిజి మహాన్. వారు రోమ ప్రబుత్వం వందిజ్ పన్ను పెర్ని మహాన్. అక్క యూదురి రులుదిజ్ పడిఎండ మహాన్. వారు కిని పణిదాన్ వారు ఆఇవరివెట కూండేజి మహిజ్ వారు నుబ్బరం సిల్లికార్ ఇజి వరివందిజ్ ఒండేబిజి మహాన్.

13 “మీరు మహి వరి మున్ను కనికారం తోరిస్తాజ్ ఇజినె నాను కోరిజిన గాని కత్తి పూజెజ నాను కోరివ్*, ఇజి దేవుణు వెప్తి మాటది అర్థం ఇనికాదో ఇజి మీరు సొన్ని నెస్తు. పాపం కిని వరిజ్ కూక్కెజ నాను వాత మన, నెగెణ్ మనికాప్ ఇజి ఒడొబిని వరిజ్ ఆఎద్”, ఇజి వెప్తాన్.

యెసుజ్ ఉపాస్వందిజ్ వెన్బాజినార్.

14 నస్తవలె యోహాను సిసూరు వన్ని డగ్రు వాజి, “మాపుని పరిసయరు డిస్విండ ఉపాస్ మంజినావ్, గాని నీ సిసూర్ ఎండనిజ్ ఉపాస్ మన్వర్?”, ఇజి వెన్బాతార్.

15 దనిజ్యెసు ఈహు వెప్తాన్, “పెండ్లి దజడాయెస్, పెండ్లి కూలెజ వెట మని వెలె వారు దుకమ్దాన్ మంజినారా? పెండ్లి దజడాయెస్ పరిబాణిజ్ కూకె ఆతి వెనుక వారు ఉపాస్ మంజినార్.”

16 “ఎయెర్బా పడాయ్పాతదు కొత పాత ముక కుడుప్పి గుత్వర్. ఆహె కితిజ కొత పాత ముక కేట ఆజి కిజినిక మరి లావ్ఆనాద్.

17 ఎయెర్బా పడాయి తోలు సన్నిదు కొత ద్రాక్ కల్లు వాక్వర్. ఆహె కితిజ కొత ద్రాక్ కల్లు పులాజ్ ఆనివెలె తోలు సంసి పెడెల్నాద్, ద్రాక్ కల్లు వెల్లి సొనాద్. మరి సంసి పాడానాద్. కొత ద్రాక్ కల్లు కొత తోలు సన్నిదునె వాక్తెజ్. అయావలె రుండిబా పాడొ ఆఉ.”

సాతి అయ్లిని జబు మని బోదిలి

18 యేసు యా మాటెజ్ వరి వెట వెప్పి మహివలె, యూదురి మిటిజ్ కిని ఇండ్రెణి ఒరెన్ అతికారి వాతండ్రె వన్ని ఎద్రు ముణుకుజ్ ఊర్జి, “నా గాలు యెలె సాతాద్. నీను వాజి నీ కియు దని మున్ను ఇడొఆ. అది బత్కినాద్”, ఇజి వెప్తాన్.

19 యేసు నిజితండ్రె వన్ని వెట సొహాన్. వన్ని సిసూర్బా సొహార్.

20-21 నస్తవలె పనెండు పంటజాణిజ్ వెల్లి ఆని జబుదాన్ బాద ఆజిమహి ఉండ్రె బోదిలి, “యేసు తొడిగితిమని నీరి సొక్కదు ముట్టిజ

* 9:13 9:13 హోసయ 6:6.

సరి నాను నెగెండ్ ఆన”, ఇజి దని మన్నుదు ఒడేబితాదె వన్ని వెనుక వాతాదె వన్ని పాత సెంగుదు ముట్టాద్.

22 యేసు వెనుక మర్జి దనిజ్ సుడేజి, “ఓ బయి దయ్ రమ్ దాన్ మన్ ఆ. నీను నా ముస్సు ఇట్టి మని సమకమ్ నె నిజీ నెగెండ్ కిత మనాద్”, ఇజి వెప్టాన్. అయావలెనె అయ బోదెలి నెగెండ్ ఆతాద్.

23-24 నస్తివలె యేసు అతికారి ఇండ్రో వాతిజ్, పిరుడిః ఊక్సివరిజ్ గగోల్ ఆని వరిజ్ సుడేజి, “ఇబ్బెణిజ్ సొండ్రు, యా ఇజిరి బయి నిద్ర కిజినాద్ గాని సావద్”, ఇజి వెప్టాన్. వారు వన్నిజ్ వెక్కిసి సిక్టార్.

25 అబె నిండ్రిత మహి లోకురిజ్ విజేరిజ్ వెల్లి పొక్తి వెనుక, యేసు ఇండ్రో డుఃగితాండ్రె అయ్ లి కీదు అస్తిజ్ అది నిజీతాద్.

26 యా కబ్బురు అయ ప్రాంతం విజు సారితాద్.

యేసు గుడ్డిదివరిజ్ ని గుల్లవన్నిజ్ నెగెండ్ కిజినాన్.

27 యేసు అబెణిజ్ సొన్ని మహివలె రిఎర్ గుడ్డిఃవారు వన్ని వెనుక వాతారె, “ఓ దావీదు మరిసి, మా ముస్సు కనికారం తోరిన్ ఆ”, ఇజి డేల్లి వెప్టార్.

28 యేసు ఇండ్రో డుఃగితి వెనుక వారు వన్ని డగ్రు వాతార్. వాండ్రు వరిజ్ ఈహు వెన్ బాతాన్. “ ‘యాక కిదెజ్ నాను అట్ను’, ఇజి మీరు నమిజినిదెరా?”, “ప్రబువా మాప్ నమ్మిజినాప్”, ఇజి వారు వెప్టార్.

29-30 నస్తివలె యేసు వరి కణకెజ ముట్టి ఈహు వెప్టాన్. “మీరు నమ్మితివజనె యాక మిజి జర్గిపిద్”, ఇజి వెప్టి వెటనె వరి కణుకు బేస్తార్. “ఎయెర్ బా యాక నెస్తెజ్ ఆవద్”, ఇజి యేసు వరిజ్ గట్టిజ వెప్టాన్.

31 గాని వారు సొహారె అయ ప్రాంతం విజు వన్ని వందిజ్ సాట్టార్.

32 యేసుని వన్ని సిసూర్ అబెణిజ్ సొన్ని మహిజ్ దెయం అస్తి ఒరెన్ గులవన్నిజ్ వన్ని డగ్రుతతార్.

33 యేసు దెయమ్ దిజ్ ఉల్పి వెటనె అయ గుల్ల వాండ్రు వర్గిదెజ్ మొదోల్స్తాన్. అక సుడేజి లోకుర్ విజేరె బమ్మ ఆతారె, “ఎనెజ్ బా

ఇస్రాయేలు దేసమ్దు యా లెకెండ్ ఇనికబా జర్గివీతాద్”, ఇజి వర్గితార్.

³⁴ గాని పరిసయరు ఈహు వెహ్టార్, “దెయమ్కాజ్ నెయ్యి సాయమ్దానె వీండ్రు దెయమ్కాజ్ పేర్జినాన్”.

పణిమన్సిర్ తక్కు

³⁵ యేసు విజు పట్నమ్కాజ్, విజు నాహ్కాజ్ బూలాజి యూదురు మీటిజ్ కిని ఇల్కాజ్ వరిజ్ నేర్పిసి, దేవుణు ఏలుబడిః కిని వందిజ్ సువార్ల వెహ్టా విజు రకమ్ది జబుది వరిజ్, బాదదాన్ మని వరిజ్ నెగెండ్ కితాన్.

³⁶ యేసు మంద లోకాజ్ సుడఃజి, వన్ని పాణం నొతాద్. ఎందనిజ్ ఇహిజ వారు గవుడువన్ సిల్లెండ సద్రితి గొర్రెజ్ లెకెండ్, ఇనిక కిదెజ్ ఇజి నెస్ఇ వరి లెకెండ్ మహార్.

³⁷⁻³⁸ సస్తివలె యేసు వన్నిసిసురిజ్, “కొయ్దెజ్ మన్ని పంటలెకెండ్ లోకుర్ నంణొండార్ మన్నె. గాని కొయ్నికార్ తకునె. అందెజె వన్ని పంట కొయ్ని వందిజ్ పణికిని వరిజ్ పోకత ఇజి కోత యజుమానిజ్ బతిమాలదు”, ఇజి వెహ్టాన్.

10

యేసు పన్నెండు మణిసి సిసురిజ్ కూక్సినాన్

¹ యేసు వన్ని పనెండు మన్ని సిసుర్జి డగ్గు కూక్తాండ్రె దెయమ్కాజ్ పేర్దెజ్, మరి విజు రకమ్ది జబుది వరిజ్ని బాదదాన్ మని వరిజ్ నెగెండ్ కిదెజ్ వరిజ్ అతికారం సితాన్.

² అయ పనెండు మన్ని అపొస్తుడురి పేరుకు ఇకెజ్. మొదోహికాన్సీమోను, (పేతురు ఇజి వాండ్రు కూకె ఆతాన్) వన్ని తంబెర్సి ఆతి అంద్రెయ, జెబదయి పొటాదికార్యాకోబుని యోహను,

³ పిలిపుని బర్తోలోమాయి, తోమని పన్ను పెర్జి మహికాన్ మతాయి, అలపయి పొటాదికాన్ యాకోబు, తదాయి

4 యూదులు దేసం వందిజ్ ఉసారాఅజని సీమోను*, యెసుజ్ మోసెం కిజి బవజెప్పికాన్ ఆతి ఇస్కరియోతు యూదు.

5 యేసు అయ పనెండు మన్ని సిసూరిజ్ పోక్కివలె ఈహు వెహ్లాన్. “యూదురు ఆఇవరి నడిఃమి మీరు సొన్మాట్. సమరియదివరి పట్టుమ్కాజ్ బా సొన్మాట్.

6 గాని మీరు ఇస్రాయేలుది మురుతి గొర్రెజ్జెకెండ్ మనివరి నడిఃమి సొండ్రు.

7 మీరు సొన్ని, ‘దేవుణు ఏలుబడిః కినిక డగ్రు ఆత మనాద్’ ఇజి సొట్టు.

8 జబుదివరిజ్ నెగెండ్ కిదు, సాతి వరిజ్ నిక్కు, పెరి కస్టమ్ది వరిజ్ నెగెండ్ కిదు, దెయమ్కాజ్ పేర్లు. యా పణిజ్ కిదెజ్ అతికారం నెడ్డిఃనె మిజి దోహ్క మనాద్. అందెజె మీరు ఎయెర్ బాణిజ్ బా ఇనికబా లొస్ ఎండ ఇకెజ్ నెడిఃనె కిదు.

9 మీరు సొనివెలె బజారం, రుపాయ్ గాని వెండి, రుపాయ్ గాని రాగి రుపాయ్ గాని మీ సన్నిదు ఒమాట్.

10 పయనం కినివెలె సన్ని ఒమాట్. రుండి సొక్కెజ్, జోడ్కు, డుడు ఇనికబా ఒమాట్. ఎందనిజ్ ఇహిజ పణికినికాన్ వన్నిజ్ కావాస్తికెజ్ దోహ్కెజ్ తగ్గికాన్.

11 మీరు ఎమేణి పట్టుమ్దు సొహిజ్ బా అబె ఒరెన్ నెగ్గివన్నిజ్ రెబాజి వన్ని ఇండ్రోనె అబెణిజ్ సొని దాక మండ్రు.

12 మీరు అయ ఇండ్రో డుఃగితిజ సరి, ‘మిజి సమాదనం మనిద్’ ఇజి వెహ్లా.

13 అయ ఇండ్రోణికార్ మిజి డగ్రు కిఇతిజ, నస్సివెలె మీరు వెహ్లాకెండ్ వరిజ్ దీవనమ్కు మంజినె. వారు తగిఇకార్ ఇహిజ అయాలెకెండ్ వరిజ్ జర్గివద్.

14 మీరు ఉండ్రి పట్టుమ్దు గాని, ఉండ్రి ఇండ్రో గాని అందితిజ, వారు మిజి డగ్రు కిఎండ మరి మీ మాటెజ్ డగ్రు కిఎండ మహిజ,

* 10:4 10:4 కనానియదికాన్ సీమోను - తెలుగు రోమది ఏలుబడిఃదాన్ యూదురు దేసెమిదిజ్ విడుదల కిదెజ్ ఉసార్దాన్ సుడిఃజని యూదురు సజం మనాద్ అయా సజమిదికాన్ ఒరెన్ సీమోను.

వరి ముస్కు వారె దేవుణు బాణిజ్ సిక్స అప్పె ఆజినార్ ఇనిదన్నిజ్ గుర్తు లెకెండ్, మీరు అయ పట్టుమ్నో ఇల్లునో డిసి సొనివెలె మీ పాదమ్కాణి దుల్లి దూల్ప్పి సొండ్రు.

15 దేవుణు తీర్పు తీరిస్సి రోజుదు అయ పట్టుమ్దు మని వరిజ్ ఒద్దె లావ్ సిక్స సీనాన్లె ఇజి నాసు మిజి నిజం వెప్పిన. సోదోమ గొమోర పట్టుమ్కాజ్ మహివరిజ్ సొన్ని సిక్స మన్వద్.

16 కార్నుకుడిజు నడిమి గొర్రెజ్లెకెండ్ నాసు మిజి లోకుర్ నడిమి పొక్కిన. అందెజె మీరు సరాస్కు లెకెండ్బుది మనికిదెర్, పావుర పొటిజు లెకెండ్ సెఇకెజ్ ఇనికెజ్ సిలికిదెర్ ఆజి మండ్రు.

17 లోకుర్ వందిజ్ జాగర్త మండ్రు. వారు మిజి కోర్టుదు ఒపజెప్పి, మరి యూదురు మీటిజ్ కిని ఇల్లాజ్ మిజి కొర్రెజుణిజ్ డెయ్యినార్లె.

18 రాజురిజు ముందాల, అదికారిజు ముందాల నా ముస్కు నమకం ఇట్టి వందిజ్ మజి అసి తొప్పి ఒనార్లె. వరి ముందాలని యూదురు అఇ వరి ముందాల నా వందిజ్ మీరు వరిజ్ సువార్త వెప్పిదెర్లె.

19 గాని వారు మిజి తొప్పి ఒనివెలె ఇనిక వెహైజ్, అక ఎలాగ వెహైజ్ ఇజి మీరు బెజ ఆమాట్. అయావలెనె వర్గిదెజ్ సరి ఆతి మాటెజ్ మిజి దొహ్కెలె.

20 ఎందనిజ్ ఇహిజు అయావలె వర్గినిక మీరు ఆఇదెర్. మీ బుబ్బు ఆతి దేవుణు ఆత్మ మీ లోఇహాన్ వర్గినాన్లె.

21 దాద్ది తంబేరిజ్, తంబెరి దాద్దిజ్, అపోసి మరిసిజ్ సప్తెజ్ ఒపజెప్పిన్లె. కొడోఱ్ అయ్సి అప్పొసిర్ ముస్కు గొడబ ఆజి వరిజ్ సపిస్సార్లె.

22 నా ముస్కు నమకం ఇట్టి వందిజ్ విజేరె మీ ముస్కు పగదాన్ మంజినార్లె. గాని ఆకార్ దాక ఓరీస్సి వన్నిజ్ దేవుణు రక్కిస్సాన్లె.

23 ఉండ్రి నాటొ మిజి హిమ్స కితిజు, మరి ఉండ్రి పట్టుమ్దు ఉహ్కీ సొండ్రు. లోకు మరిసి వాని ముందాల సువార్త సాటసిని పణి పూర్తి వీజ్ఎండ ఆనాద్, ఇజి నాసు మిజి నిజం వెప్పిన.

24 సద్వనికాన్ నెస్పిస్సివన్ని ముస్కు పెరికాన్ ఆవన్. పణిమన్ని యెజుమాని ముస్కు పెరికాన్ ఆవన్.

25 సద్వనికాన్ నెస్పిస్సివన్ని లెకెండ్ ఆతిజ ఆనాద్. పణిమన్ని యెజుమాని లెకెండ్ ఆతిజ ఆనాద్. ఇండ్రోణి యెజుమానిజ్ వారు బయిల్జెబులు† ఇజి కూక్సి మోసెం వెహ్టార్ ఇహిజ ఇండ్రోణికార్ ఆతి మీ వందిజ్ మరి ఎసోనో సెఇ మాటెజ్ వెహ్టార్లె.

26 అందెజె వరిజ్ మీరు తియెల్ ఆమాట్. డాప్తి మనికెజ్ విజు తోరె ఆనెలె. నెన్ఏండ మూస్తి మనికెజ్ విజు నెసె ఆనెలె.

27 మీ వెట నాను సీకటిదు వెహ్తి మాటెజ్, మీరు జాయ్దు వెహ్టు. మీ గిబిజు వెహ్తి మాటెజ్ విజెరె వినిలెకెండ్ మిద్దెజు ముస్కుహాన్ మీరు డటం వెహ్టు.

28 ఆత్మదిజ్ సప్తెజ్ అట్ఏండ ఒణ్డోల్దిజ్నె సప్తెజ్ అట్టి వరిజ్ మీరు తియెల్ ఆమాట్. గాని ఆత్మని ఒణ్డోల్దిజ్ సిను మంజిని బాడిడు పోక్సి నాసనం కిదెజ్ అతికారం మని దేవుణుదిజ్నె తియెల్ ఆజి మండ్రు.

29 ఉండ్రీ కాసుదిజ్ రుండి ఇజ్జి పంట పొటిజ్పారె ఆజినెగదె. అహిజ్బా నీ బుబ్బాతి దేవుణు నెన్ఏండ దన్ని లోఇ ఉండ్రీబా అడ్లి బూమిదు సాదెజ్ ఇజి డిసి సీవన్.

30 నీ బుర్రది కొపు విజుబా లెక కిబె ఆత మనాన్.

31 అందెజె మీరు తియెల్ ఆమాట్. మీరు యా ఇజిరి పంట పొటిజు మిస్తి విలువ మనికిదెర్.

32 లోకుర్ ముందాల నజీ ఒపుకొణి, విజెరిజ్ నానుబా వరివందిజ్ పరలోకామ్దు మని నా బుబ్బాతి దేవుణు ఎద్రు ఒపు కొణా.

33 గాని ఎయెన్బా లోకుర్ముందాల నజీ నెన్ఏ ఇజి వెహ్తిజు, పరలోకామ్దు మని నా బుబ్బాతి దేవుణు ముందాల నానుబా వన్నిజ్ నెన్ఏ ఇజి వెహ్టాలె.

† 10:25 10:25 దేవుణుదిజ్ పొగడిజు మాడిసెఇ యూదురు ఆఇకార్ మాడిసి మహి, ఉండ్రీ బొమ్మనె బెయిల్జెబులు. యూదురు అయ బొమ్మదిజ్ “పొర్లిజ్ మాడిస్సి బొమ్మ”, ఇజి వెక్సిసి వహ్సి మహార్. అందెజె వారు యేసుప్రబుజ్ బెయిల్జెబులు ఇజి కూక్తివెలె వన్నిజ్ నండో మోసెం వెహ్టు మహార్.

34 బూమి ముస్కు సమాదనం తప్పిస్తేజ్ నాను వాత మన ఇజి మీరు బడేబిమాట్. పగ తప్పిస్తేజ్ నె వాత, సమాదనం ఆఎద్.

35 ఎందనిజ్ ఇహిజ, మరిసిజ్ వన్ని అప్పొసి ముస్కు, గాడ్నిజ్ దని అయ్సి ముస్కు, కొడియెసిజ్ దని మీమ్సి ముస్కు. పగ కిబిస్తేజ్ నె నాను వాత మన.

36 నా ముస్కు నమకం ఇట్టి వందిజ్ ఒరెన్ వన్ని ముస్కు వన్ని సొంత ఇండ్రోణికారె పగాతికార్ ఆనార్.*

37 బుబెజ్ బా యాయెజ్ బా నజి మిస్తి ప్రేమిస్సికాన్ నజి తగ్గికాన్ ఆవన్. మరిసిజ్ బా గాల్పిజ్ బా నజి మిస్తి ప్రేమిస్సికాన్ నజి తగ్గికాన్ ఆవన్.

38 క్లమ్మకు ఒరిస్తేజ్ మన్సు సిల్లికాన్, మరి నా వెట సాదెజ్ ఇజిబా మన్సు సిల్లికాన్, ఎయెన్ బా నజి తగ్గికాన్ ఆవన్.

39 వన్ని పాణమ్ దిజ్ కాపాడేదెజ్ ఇజి సుడిఃతిజ వాండ్రు దన్నిజ్ సొన్ పిస్సాన్. నా వందిజ్ వన్ని పాణం సొన్ పిస్సికాన్ దనిజ్ కాపాడ్సాన్.

40 నిజి డగ్రు కినికాన్ నజినె డగ్రు కిజినాన్. నజి డగ్రు కినికాన్ నజి పొక్తివన్నిజ్ బా డగ్రు కిజినాన్.

41 ఒరెన్ దేవుణు ప్రవక్తెజ్, వాండ్రు దేవుణు ప్రవక్త ఇజి నెసి ఎయెన్ బా వన్నిజ్ డగ్రు కితిజ, దేవుణు ప్రవక్తెజ్ దొహ్ క్వి లెకెండ్ వన్నిజ్ బా పలం దొహ్ క్వాద్ లె. ఒరెన్ నీతి నిజాయితి మని వన్నిజ్ వాండ్రు నీతి నిజాయితిదికాన్ ఇజి నెసి ఎయెన్ బా వన్నిజ్ డగ్రు కితిజ, నీతి నిజాయితిమని వన్నిజ్ దొహ్ క్వి లెకెండ్ వన్నిజ్ బా పలం దొహ్ క్వాద్ లె.

42 యా నా సిసూర్ లోఇ ఇజిరి ఒరెన్ వన్నిజ్ వాండ్రు నా సిసూర్ ఇజి నెసి ఎయెర్ బా ఉండ్రీ గలన్ ఏరు సీతిజ, దనిజ్ తగితి పలం తవ్ ఏండ వన్నిజ్ దొహ్ క్వాద్ ఇజి నాను మిజి నిజం వెహ్సాన్.”

11

* 10:36 10:36 మికా 7:6.

యేసుని బాప్తిసం సీని యోహాను

1 యేసు వన్ని పనెండు మన్ని సిసూర్జ బోదిసి వీజితి వెనుక, అబెణిజ్ సోసి గలిలయ దేనమ్దు మని పట్నమ్కాజ్, నాహ్కాజ్ సువార్త సాట్టజ్, బోదిస్తెజ్ సోహాన్.

2-3 జెలిదు మని యోహాను క్రిస్తు కిని పణిజ వందిజ్ వెంజి, “వానికి నీనెనా? సిలిజ మరి ఒరెన్ వన్నిజ్ మాపు ఎద్రు సుడేజి మంత్తెజ్నా?”, ఇజి వెన్బాదెజ్ వన్ని సిసూర్జ యేసు డగ్రు పోక్తాన్.

4-5 యేసు పరిజ్ ఈహు వెహ్తాన్, “గుడ్డిదికార్ సుడేజినార్, సోటాదికార్ నడిజినార్, పెరి జబు మనికార్ నెగెణ్ ఆజినార్, బోయ్ రాదికార్ వెంజినార్, సాతికర్ నిజె ఆజినార్, బీదాతి పరిజ్ సువార్త వెహ్ ఆజినాద్, ఇజి యా లెకెండ్, మీరు సుడేజినికెజ్, వెంజినికెజ్ మర్జి సొన్ని, యోహానుజ్ వెహ్తా.

6 గాని నా ముస్కు మన్ని నమకం డిసి సెఇకాన్ దేవుణు సీని దీవెనమ్కు మంజినికాన్ ఆనాన్లె.”

7 యోహాను సిసూర్ మర్జి సొన్నిమహిజ్ యేసు యోహాను వందిజ్ ఈహు వర్గిదెజ్ మొదోల్స్తాన్. “ఇనిక సుడేదెజ్ మీరు బిడిమ్ బూమి ప్రాతమ్దు సోహిమహిదెర్? గాలిదిజ్ దూజ్జిని గడిదిజ్ పోలితి ఒరెన్ వన్నిజ్ సుడేదెజ్నా?

8 సిల్లిజ మరి ఇనిక సుడేదెజ్ మీరు సోహి మహిదెర్? నెగ్గి సొక్కెజ్ తోడేగితి మని ఒరెన్ వన్నిజ్ సుడేదెజ్నా? నూనాజ్ మని నెగ్గి సొక్కెజ్ తోడేగితి మంజినికార్ రాజురి ఇల్కాజ్ మంజినార్ గదె?

9 సిల్లిజ మరి ఇనిక సుడేదెజ్ మీరు సోహిమహిదెర్? ఒరెన్ దేవుణు ప్రవక్తెజ్ సుడేదెజ్నా? నిజమె, దేవుణు ప్రవక్తెజ్ ఇంక పెరివన్నిజ్నె ఇజి నాను మిజి వెహ్సిన.

10 ‘నాను నా కాబ్రు తనివన్నిజ్ నిజి ఇంక ముజాల పోక్కు. వాంత్రు నీ ముజాల నీ సరి నెగెండ్ కినాన్’* ఇజి వన్ని వందిజె దేవుణు మాటదు రాస్త మనాద్.

11 బోదెక పోటాదు పుట్టివరి లోఇ యోహాను ఇంక మిస్తికాన్

* 11:10 11:10 మలా 3:1.

ఎయెన్బా సిలెన్. గాని దేవుణు ఏలుబడిః కినిదని లోఱ ఇజిరికాన్ ఆతికాన్, యోహానుజ్ ఇంక పెరికాన్ ఇజి నాను మిజీ నిజం వెప్పిన.

12 బాష్టిసం సీని యోహాను కాలమ్దాన్ ఏలుదాక దేవుణు ఏలుబడిః కినిక బలవందమ్దాన్ ముజాల వాజినాద్. మరి గొప్ప సత్తు మనికార్ దనిజ్ అడ్డు కిదెజ్ సుడఃజినార్.

13 మోసె సీతి రూలుజ్ని దేవుణు ప్రవక్తరు విజెరెబా దేవుణు ఏలుబడిః కినివందిజె యోహాను కాలమ్దాక వర్గిజి మహార్.

14 నమిదెజ్ మిజీ ఇస్టం మహిజ, ఏలియ వానానె ఇజి ముజాల వెప్పిక విని వందిజెనె.

15 మి గిబ్బిజ్జాణిజ్ నెగెండ్ వెంజి అయా వజ నడిఃజి మండ్రు.

16-17 'యా తరమ్ది వరిజ్ ఇనిదనిజ్ సమానం వెప్టాజ్? వారు సతాదు బసి, మహివరిజ్ డేల్నిని కొణ్ఱోర్ లెకెండె మనార్.' 'మాపు మీ వందిజ్ పిరుడిః ఉహ్కత్వ్ గాని డాట్ఇతిదెర్, సాతి ఇండ్రొ పాటెజ్ పార్లావ్ గాని మీరు గుండె కొతె ఆజి మీరు అడఃబ ఇతిదెర్'.

18 యోహాను వాతివెలె వాండ్రు తిండి వందిజ్ లావ్ ఒడఃబివండ రోజు ఉపాస్ కిజి మహాన్. వాండ్రు అయాలెకెండ్ తిన్ఎండ, ఉణెఎండ మన్నిజ్ వన్నిజ్ దెయం అస్తాద్ ఇజి వారు వెప్పినార్.

19 లోకు మరిసి ఆతి నాను తింజి, ఉణిజి వాతాన్కాక 'వీండ్రు తిండి కకూర్తికాన్' మరి ఉణిజి సోస్సికాన్, పన్ను పెర్నివరిజ్ని పాపం కిజిని వరిజ్ కూలాయెన్ ఇజి వారు వెప్పినార్. గాని దేవుణు బాణిజ్ వాని గెణం మన్నికార్ వారు కిజిని నెగ్గి పణిజాణిజ్ అయ గెణం సరియాతిక ఇజి రుజువ్ కిజినాద్."

నమకం సిల్లికార్ మన్ని పట్టుమ్కు

20 మరి యేసు ఎమేణి పట్టుమ్కాజ్ నండో బమ్మ ఆతి పణిజ్ కితిజ్బా వారు వరి మన్ను మారిన్ఎతారొ, అయ పట్టుమ్కాజ్ మున్ను కోపం అజి వర్గితాన్.

21 అబయా! కోరజిన పట్టుమ్దు మనికిదెరా మిజీ అస్సా గొప్ప కస్టమ్కు, వానెనొ, అబయా! బెత్సెయ్యపట్టుమ్దు మన్నికిదెరా

మిజీబా ఎస్సా గొప్ప కస్టమ్కు వానెనో. ఎందనిజ్ ఇహిజ నాను మీ నడిఁమి కితి మహి బమ్మాతి పణిజ్ తూరుని సీదోను పట్నమ్కాజ్ కిని మంజినిక ఇహిజ వారు ఎస్సా ముజాలె బస్త సొక్కెజ్ తొడిఁగిజి ఒడొఁదు నీరు రాసె ఆజి ఉపాస్ కిజి వరి పాపమ్కు ఒప్పుకొడొఁజి డిఁసి సీజి మన్ను మారిసి అయాలెకెండ్ మినికార్ ఇజి తొరొస్తార్ మరి.

22 అందెజె నాను నిజి వెప్పొక ఇనిక ఇహిజ తీర్పు తీరిన్ని రోజుదు తూరుని సీదోను పట్నమ్దివరిజ్ మిస్తి సిక్కు మిజి వానాద్లె.

23 ఓ కపెర్నహమా, “ఆగాసమ్దు మనికిదెరా, మిరు ఆగాసమ్దాక అందిజిని గొప్ప వారు ఇజి మీరు ఒడొఁబిజినిదెరా? గాని దేవుణు అయా లోకమ్దు వినీర్లె. మీ నడిఁమి కితి మహి బమ్మాతి పణిజ్ నాణు సొదోము పట్నమ్దు కిని మంజినిక ఇహిజ అయ సొదోము పట్నమ్దికార్ వరి అలవాటుజ్ డిఁసి సీజి అయ పట్నమ్దిజ్ దేవుణు సిక్కు సీవండ ఏలుదాక మహాద్ మరి.

24 అందెజె నాను నిజి వెప్పొన తీర్పు తీరిన్ని రోజుదు సొదోము పట్నమ్దు మహివరిజ్ వాని దన్నిజ్ మిస్తి సిక్కు మీ లోకురి మున్ను వానాద్లె.”

వందితివరిజ్ కూక్కినిక.

25 వెనుక యేను ఈహు వెహ్లాన్, “పరలోకామ్దిజ్ని బూమిదిజ్ ప్రబువాతి నా బుబ్బా, నాను నిజి పొగ్డిఁజిన. ఎందనిజ్ ఇహిజ గెణం మన్నివరిజ్ని సదువు మన్నివరిజ్ యా సజతిజ్ తెలియ కివండ యా సదువు సిల్లి వరిజ్ తెలియ కిత్తి.

26 నిజమె బుబ్బ, ఈహు కినికాదె నిజి ఇస్తం ఆతాద్.

27 బుబ్బ విజు సజతిజ్ నా కీదు ఒపజెప్ప మనాన్. బుబ్బ ఆవండ మరి ఎయెర్బా మరిసిజ్ నెస్వీర్. మరిసిని, మరిసి వన్నిజ్ తెలివి కిదెజ్ ఎర్లితికారె బుబ్బెజ్ నెస్సార్. మరి ఎయెర్బా నెస్వీర్.

28 కస్తబాడొఁజి బరు పిండ్జి వందితి విజిదెరె, మీరు నా డగ్గు రదు. నాను మిజి రొంబిన్ను.

29 నాను సార్లదికాన్. నాను మెతని మన్ను మనికాన్. నా వెట కూడఁజి ఉండ్రె పూందు మీ మెడఁ మున్ను పోకె అజి మాటు కూడఁజి పణికినాట్, మీరు నా అడ్రెజ్ లోజిజి నా బాణిజ్ నెస్తు. నస్తవలె మీ పాణిమ్కాజ్ నిమాలం కలగినాద్.

30 ఎండనిజ్ ఇహిజ నా కూడఁజి నా పూందు అడిఁగి పణి కిత్తిజ పణి సూలు మంజినాద్, బరుబా సుల్కానిక మంజినాద్.”

12

యేసు విస్త్రాంతిదినమ్దు ప్రబు.

1 అయావలె యూదురి విస్త్రాంతిదినమ్దు యేసు పంట గుడ్డెదాన్ సొన్ని మహివలె, వన్ని సిసూరిజ్ బజ కట్టిజ్, వారు సెరెక్ తెప్పి నూల్ని తింజి మహోర్.

2 అయాక పరిసయరు సుడఁతారె, “ఇదిలో, మోసె సిత్తి రులువజ విస్త్రాంతిదినమ్దు కిదెజ్ ఆఇ పణి, నీ సిసూర్ కిజినార్”, ఇజి యేసుజ్ వెహోర్.

3 వాండ్రు వరివెట ఈహు వెహోన్, “దావీదు రాజుని వన్నివెట మహివరిజ్ బజ కట్టిజ్, వాండ్రు ఇనిక కిత్తాండ్రో ఇజి మీరు దేవుణు మాటదు ఎసెజ్బా సద్విఇతిదెరా?*

4 వాండ్రు ఇనిక కిత్తాన్ ఇహిజ, గుడారమ్దు† సొన్ని, దేవుణు ముజాల ఇడ్డిమహి రొట్టెజ్ లాగితాన్. వాండ్రుని వన్నివెట మహికార్ విజేరె తిహోర్. అయాక పుజేరిజునె తప్ప మరి ఎయెర్బా తిండ్రెజ్ ఆవద్ ఇజి మోసె సిత్తి రూలుదు వెహ్తా మనాద్.

* 12:3 12:3 దావీదు రాజు కిత్తిక సముయేలు ప్రవక్త పుస్తకమ్దు రాస్త మనాద్. 21:1-6.

† 12:4 12:4 గుడారమ్దు విజు విస్త్రాంతి దినమ్దు దేవుణుదిజ్ పూజ సిత్తిలెకెండ 12 కొత్త రొట్టెజ్, సమాజ గుడారమ్దు మన్ని బల్లాదు ఇడ్డి మంజినె కొత్త రొట్టెజ్ ఇడ్డి బాణిజ్ లాగితి పడాయ రొట్టెజ్ పుజెరిజు తినార్. లేవి 24:5-9 అయకాలమ్దు యెరుసల్లేమ్దు మన్ని దేవుణు గుడిఁసిల్లెతాద్. దావీదు రాజు మరియాతి సొలోమొను కాలమ్దునె యెరుసల్లేమ్దు మన్ని దేవుణు గుడిఁ వాండ్రు తొహిస్తాన్.

5 దేవుణు గుడిఁదు మన్ని పుజేరిజు విస్త్రాంతిదినమ్దు పణి కిజినార్ గాని అక తపు ఆవద్ ఇజి దేవుణు మాటదు రాస్తి మన్నిక మీరు ఎనెజ్బా నద్విఇతిదెరా?

6 దేవుణు గుడిఁదిజ్ ఇంక మిస్తికాన్ ఇబ్బె మనాన్ ఇజి నాను మిజి వెప్పిన.

7 'మీరు మహివరి ముస్సు కనికారం తొరిస్తెజ్ ఇజినె నాను కోరిజిన గాని కత్తి సీజిని పూజెజ నాను కోర్వ' ✱ ఇని మాటదిజ్ అర్థం మీరు నెసిమంజినిక ఇహిజ, ఇని తపుబా కిఇవరి ముస్సు తప్పు మాటెజ్ వెహ్వితార్ మరి.

8 ఎందానిజ్ నాను యాలెకెండ్ వెప్పినిక ఇహిజ, లోకుమరిసి ఆతి నజి విజు దన్నిజ్ అతికారం మనాద్. విస్త్రాంతి దినమ్దు లోకుర్ ఇనిక కిదెజ్వలె ఇజి వెప్పిజ్బా నజి మనాద్.

9 అబ్బెణిజ్ సొస్సి మహివలె, వాండ్రు యూదురు మీటిజ్ కిని ఉండ్రి ఇండ్రి సొహాన్."

10 వప్తి అర్తి ఉండ్రి కియు మన్నికాన్ ఒరెన్ అబ్బె మహాన్. యేసు ముస్సు తప్పు మొప్పెజ్ ఇనికాదొ ఉండ్రి సజతివందిజ్ నుడిఁజి వారు వన్నిజ్ ఈహు వెన్బాతార్, "విస్త్రాంతిదినమ్దు ఎయెరిజ్బా నెగెండ్ కినిక దేవుణు రూలుదిజ్ తగ్నాదా?"

11 యేసు వరిజ్ ఈహు వెప్తాన్, "మీ లొఇ ఎయెరిజ్బా ఉండ్రి గొరె మహిజ, విస్త్రాంతిదినమ్దు అక్క ఉండ్రి గాందదు అర్తిజ, మీరు దనిజ్వెల్లి లాగ్ఇదెరా?"

12 మెండగొరెదిజ్ ముస్సు లోకు ఎస్సొనొ విలువ మన్నికాన్. అందెజె విస్త్రాంతిదినమ్దు మేలు కినిక దేవుణు మోసెజ్ సిత్తి రూలుదిజ్ తగ్నాద్."

13 అయావలె వాండ్రు వప్తి కియు అర్తి వన్నిజ్ "నీ కియు నవ్అ", ఇజి వెప్తాన్. వాండ్రు కియు సొప్తాన్. అయావలె అక నెగెండ్ మన్ని మరి ఉండ్రి కియు లెకెండ్ ఆతాద్.

✱ 12:7 12:7 హోసెయ 6:6.

14 గాని పరిసయరు వెల్లి సాహారె యేసుజ్ ఎలాగ సప్తజ్ ఇజి వన్నిజ్ పడిఃఎండ ఆలోసనం కిత్తార్.

దేవుణు ఏర్పాటు కితికాన్

15 యేసు అయా సజతి నెస్తాండ్రె అబెణిజ్ సాహాన్. నండెండార్ వన్ని వెనుక సాహార్. వాండ్రు వరి జబ్బుది వరిజ్ విజేరిజ్ నెగెండ కిత్తాన్.

16 నా వందిజ్ ఎయెరిజ్బా వెహ్మాట్ ఇజి వరిజ్ వెహ్మాన్.

17 యెసయ ప్రవక్త వెట దేవుణు ముజాల వర్గితి యా మాటెజ్ పూర్తి ఆదెజ్ ఇజి యా లెకెండ జర్గితాద్.

18 “ఇదిలో, నాను ఏర్పాటు కితి నా పణి మన్ని వీండ్రె, నాను వన్నిజ్ ప్రేమిసిన, వన్ని ముస్సు సర్ల ఆజిన. నాను వన్ని ముస్సు నా అత్తుదిజ్ పోక్కు. వీండ్రు విజు జాతిది వరిజ్ నాయం తీరిస్నాన్లె.

19 వీండ్రు జటిజ్ ఆవన్, డెల్న్వన్, విన్ని కంటం వీదిజు ఎయెరిజ్ విన్పిన్వన్.

20 నలిగితి గడిఃదిజ్ వాండ్రు తెప్పి విసిర్వన్, నమ్ని దీవదిజ్ వాండ్రు నప్వన్. వాండ్రు నాయమ్దిజ్ గెల్పిసినాన్.

21 లోకుర్ విజేరె వన్నిజె ఆసదాన్ ఎద్రు సుడిఃజి మంజినార్. వాండ్రు విజు జాతిజు వరిజ్ నాయం తీరిస్నాన్.”✠

యేసుని బయిల్జెబ్బులు

22 అయావలె నెగెండార్, దెయం అస్తిమహిజ్ వర్గిదెజ్ అట్ఇ గుల్ల ఆతి ఒరెన్ వన్నిజ్ యేసు డగ్రు తతార్. యేసు వన్నిజ్ నెగెండ కిత్తాన్. వాండ్రు సుడిఃదెజ్, వర్గిదెజ్ అట్టాన్.

23 లోకుర్ విజెరె బమ్మ ఆజి, “మాప్ ఎద్రుసుడిఃజి కాప్కిజి మంజిని దావీదు రాజు తెగ్గదికాన్ వీండ్రు ఆవండ్రా?”, ఇజి వర్గిజి మహార్.

✠ **12:20 12:20** అయ మాటదిజ్ అర్థం ఇనిక ఇహిజ, లోకుర్ దేవుణు ముస్సు మన్ని నమకమ్దిజ్ కండెక్ వెనుక ఆతిజ్నో దయరం సిల్లెండ అతజ్నో యేసు వన్నిజ్ డిఃసి సివన్ మొకొ మహావన్. ✠ **12:21 12:21** యెసయ 42:1-4.

24 పరిసయరు అయ మాట విహారె, “విజు దెయమ్కాజ్ నెయ్యి ఆతి బయిల్జెబ్బులు సాయమ్దాన్ వీండ్రు దెయమ్కాజ్ పెర్జినాన్”, ఇజి వెహ్టార్.

25 యేసు వరి ఆలోసనమ్కు నెసి వరిజ్ ఈహు వెహ్టార్. “ఎమేణి దేసెమ్దికార్బ వ రిజ్ వారె పగ ఆజి ఎర్లిజి మహిజ అయ దేసెం పాడాఃనాద్. అయాలెకెండ్ ఎమేణి పట్టుమ్దికార్ గాని ఇండ్రోణికార్ గాని, వరిజ్ వారె, పగ ఆజి ఎర్లిజి మహిజ నీ ఎమేణి పట్టుం గాని ఇల్లు గాని ఏలుబా లావ్ రొస్కు నిల్సి మన్వద్.

26 సయ్హాను అడిఃగి మన్నికార్ ఉండ్రి జటుదికార్, మరి ఉండ్రి జటుదివరివెట పగ ఆజి ఎర్లె ఆజి విదెం కిజి మహిజ, వన్ని ఏలుబడిః ఎలాగ లావ్ రొస్కు నిల్సి మంజినాద్.”

27 బయిల్జెబ్బులు సాయమ్దాన్ నాను దెయమ్కాజ్ పేర్తిజ, మీ లోకుర్ ఎలాగ దెయమ్కాజ్ పేర్తినార్? అందెజె నా వందిజ్ మీరు వెహ్పికెజ్ తపు ఇజి వారె రుజుప్ కిజినార్.

28 గాని దేవుణు ఆత్మ సత్తుదాన్ నాను దెయమ్కాజ్ పేర్తిన ఇహిజ, నిజమె దేవుణు ఏలుబడిః కినిక మీ నడిఃమి వాత మనాద్.

29 సుడఃదు, ఒరెన్ సత్తుమని వన్నిజ్ ముజాల తోహ్విండ, వన్ని ఇండ్రో డుఃగ్జి ఇండ్రోణి సామనమ్కు ఎయెరిజ్బా ఒతెజ్ అట్నార్? ముజాల వన్నిజ్ అసి తోహ్విజనె డోజ కిదెజ్ అట్నార్.

30 నా వెట కూడ్డి మన్ఇకాన్ ఎయెన్బా నజి పగాతికాన్ ఆనాన్. లోకురిజ్ దేవుణు డగ్రు తత్తెజ్ నా వెట కూడఃజి మన్ఇకాన్ లోకాజ్ సెద్రిస్పికాన్ ఆజినాన్.

31 మరి నాను మిజి వెహ్పినిక ఇనిక ఇహిజ, లోకుర్ కిని విజు పాపమ్కాజ్, దూసణదిజ్ దేవుణు సెమిస్నాన్, గాని దేవుణు ఆత్మదిజ్ దూసిసి వెహ్పిజ ఆకెజ్ ఎసెజ్బా సెమిస్ఎన్.

32 లోకు మరిసి ఆతి నజి పడిఃవిండ ఇనికబా వర్గితిజ దేవుణు వన్నిజ్ సెమిస్నాన్. గాని దేవుణు ఆత్మదిజ్ పడిఃవిండ వర్గిని వన్నిజ్ యా లోకమ్దుబా, వాని లోకమ్దుబా దేవుణు సెమిస్ఎన్.

33 మరాన్ నెగ్గిక ఇహిజ దని పండుబా నెగ్గికదె. సిలిజ, మరాన్ నెగ్గిక ఆఎండ మహిజ దని పండుబా నెగ్గిక ఆఎద్. మరాతి పండుదానె మరాన్ ఎలాగ మర్తికాదొ ఇజి నెస్తెజ్ ఆనాద్.

34 విసం మన్నిసరాన్ నన్నికిదెరా, సెఇకిదెరాతి మీరు నెగ్గి మాటెజ్ ఎలాగ వర్గిదెజ్ అట్టిదెర్? మీ మన్నుదు మీరు ఒడిఃబిని దన్నెజ్ తగితి లెకెండెనె మీ వెయు వర్గిజినాద్.

35 నెగ్గి మన్ను మన్ని వన్నిజ్ కూలిజ్ కొట్టుకిత్తి మన్నిలెకెండ, వని మన్నుదు నెగ్గికెజె మంజినె. అందెజె వన్ని వెయుదాన్ నెగ్గి మాటెజె వానె సెఇ మన్ను మనివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజె వానె.

36 గాని నాను మిజి వెహ్సానిక ఇనిక ఇహిజ, దేవుణు తీర్పు తీరిన్ని రొజుదు, లోకుర్ వర్గితి మహి విజు మాటెజు వందిజ్ లెక్క సీదెజ్ వలె.

37 అహిజ మీ మాటెజాణిజె మీరు సిక్కదాన్ తపై ఆనిదెర్, సిల్లిజ మీ మాటెజాణిజె మీరు మీ ముస్కు సిక్క తపె ఆనిదెర్.

ఓన ఉండ్రీ గుర్తు

38 నస్తివలె సెగొండార్ పరిసయరుని యూదురి రూలుజ్ నెస్సిస్సికార్ యేసు డగ్రు వాజి వన్నిజ్, “బోదకినికి, నీను దెవుణుబాణిజ్ వాతికాన్ ఇనిదన్నిజ్ గుర్తు లెకెండ నీను తోరిసిని ఉండ్రీ బమ్మాతి పణి సుడుఃదెజ్ ఇజి కోరిజినాప్”, ఇజి వెహ్తోర్.

39 వాండ్రు వరిజ్ “యా తరమ్దికిదెర్ ఆతి మీరు సెఇకిదెర్. దేవుణుదిజ్ నెస్ఇకిదెర్నె, గుర్తు లెకెండ ఉండ్రీ బమ్మాతి పణి కిజి తోరిన్అ ఇజి వెహ్సాదెర్. గాని దేవుణు ప్రవక్త ఆతి ఓనెజ్కీ జర్గితిక తప్ప మరి ఇని గుర్తుబా ఎయెరిజ్బా తోర్ఎద్.

§ 12:39 12:39 పడాయ్ ఒప్పమానమ్దు ఓన వందిజ్ రాస్త మనాద్ వాండ్రు పయనం కిజి మహి ఓడదాన్ సమ్దరమ్దు విసిరె ఆతిజ్ ఉండ్రీ పెరి మెయి, దేవుణు వెహ్తి వజి వన్నిజ్ డిఃజితాద్ మూండ్రీ రొస్కు వెనుక వన్నిజ్ సమ్దరం ఒడ్డుదు పాణమ్దాన్ కక్రాద్ ఓన గుర్తు వందిజ్ మూసె ఆని వందిజ్ మరి మూండ్రీ వాండ్రు సాతి వరి బాణిజ్ మరి మరజి నిజిజి వెహ్సాన్.

40 ఓన మూండ్రి రోస్కు పెరి మొయ షొటాదు ఎలాగ మహండ్రో, అయలెకెండ్నె, లోకుమరిసి ఆతి నానుబా మూండ్రి రోస్కు బూమి లోఇ మంజినలె.

41 ఓన వెహ్వి మాటెజ్ విహారె నినివెదికార్ వరి షాపమ్కు ఒప్పు కొడిఃజి డిఃస్త సితార్. అందెజె తీర్పు తీరిసిని దినమ్దు వారు యా తరమ్ది వరి వెట నిల్ని విరిముస్కు తీర్పు తీరిస్సార్లె. ఇదిలో, ఓనెజ్ మిస్తికాన్ ఒరెన్ ఇబ్బె మనాన్ ఇజి నాను వెహ్సిన.

42 ఆక్కరి దినమ్కాజ్ తీర్పు తీరిసినివలె, దనిణ దేసెమ్ది రాణి ఉండ్రి సాసిలెకెండ్ బాన్ మంజినాద్దె. ఎందనిజ్ ఇహిజ సొలోమోను వర్గిని గెణంమన్ని మాటెజ్ వెండ్రెజ్ నండొ దూరం మన్ని దన్ని దేసెమ్దాన్ వాతాద్. ఇదిలో, సొలోమోనుజ్ మిస్తికాన్ ఒరెన్ ఇబ్బె మనాన్. గాని యా తరమ్దికార్ వన్ని మాటెజ్ గిబ్బిజ్ ఒడఃజి వెన్ఎర్, అందెజె యా తరమ్ది వరిజ్ తీర్పు మంజినాద్లె.

43 ఉండ్రి దెయం ఒరెన్ వన్నిజ్ డిఃసి వెల్లి వాతి వెనుక, మండ్రెజ్బాడ్డి వందీజ్ రెబాజి బిడిఃమ్బూమిదు బూలాజినాద్. గాని ఎంబెబా దనిజ్బాడ్డి దొహ్కావతాద్.

44 నస్తివలె 'నాను డిఃస్తి వాతి నా ఇండ్రో మర్జి సొనాలె', ఇజి దనిజ్ అదినె వెహ్వాద్. మర్జి వాతిజ్ అది డిఃస్తి సిత్తికాన్, నెగెండ్ సిపాజి సుబరం కిజి ఎయెర్బా మన్ఇ ఇల్లు లెకెండ్ మన్నక సూణాద్.

45 నస్తివలె అది మర్జి సొన్ని, దన్నిజ్ ఇంక సెఇకెజ్ అతి మరి ఏడు దెయమ్కాజ్ దన్నివెట కూక్కు తనాద్. అవిక్ వని లోఇ సొన్ని అబెనె బస కినె. అయావలె వన్ని గతి ముందాహి దనిజ్ ముస్కు కస్టం ఆనాద్. అయలెకెండ్నె యా తరమ్ది వరిజ్ గతిబా మంజినాద్."

యేసు అయ్సిని తంబెరిజు

46 యేసు మంద లోకుర్ వెట వర్గిజి మహివలె, వన్ని అయ్సిని తంబెరిజు వన్నివెట వర్గిదెజ్ ఇజి వెల్లి నిహ మహార్.

47 అయావలె ఒరెన్, "ఇదిలో నీ యాయని నీ తంబెరిజు నీ వెట వర్గిదెజ్ ఇజి వెల్లి నిహ మనార్", ఇజి వన్నిజ్ వెహ్వాన్.

48 అందెజె వెప్తివన్నిజ్ సుడఃజి, “ఎయెద్ నా యాయ? ఎయెరు నా తంబెరిజు?”, ఇజి వెన్బాతాన్.

49 వన్ని సిసూర్జ కియు తోరిసి, “ఇదిలో నా యాయని నా తంబెరిజు.

50 పరలోకామ్దు మన్ని నా బుబ్బెజ్ ఇన్ఱం ఆతివజ కినికాండ్రె నా తంబెరి, నా తజీ, నా యాయ”, ఇజి వెప్తాన్.

13

విత్కు విత్తివన్ని కత.

1 అయ దినమ్దునె, యేసు ఇండ్రొణిజ్ వెల్లి సొన్ని సమ్దరం పడఃకాదు బస్తాన్.

2 మంద లోకుర్ వన్ని డగ్రు వాతిజ్ వాండ్రు ఉండ్రీ డోణిదు ఎక్త బస్తాన్. లోకుర్ విజెరె సమ్దరం పడఃకాదు నిహార్.

3 అయావలె వాండ్రు వరిజ్ సుడఃజి నండో సజతిజ్ కత వజ వరిజ్ వెప్తాన్ “ఒరెన్ రయ్యు వాండ్రు విత్కు విత్తెజ్ సొహాన్.

4 వాండ్రు విత్తి మహిజ్ సెగం విత్కు సరి పడఃకాదు అరై. పొటిజ్ వాజి వన్నాజ్ తిహె.

5 సెగం విత్కు సటు ముస్కు మని లావ్లోతు సిలి డుల్లిదు అరై. డుల్లి లోతు లావ్ సిల్లితిజ్ అవి వెటనె నేరై.

6 గాని డుల్లి తకు మహిజ్ వెలెజ్ లొఇ సొన్ఇతిజ్, పొదు సొసి ఎండ తాక్కిజ్ అవి సాతె.

7 సెగం విత్కు సాప్పుతువెజి అరై. సాప్పు తపుజ్ పెరిసి వన్నాజ్ అణసు తిగితె.

8 మరి సెగం విత్కు నెగ్గి బూమిదు అరై. అబ్బె విత్తి విత్తుదిజ్ వంద వంతుజ్, అరువయ్ వంతుజ్, ముపయ్ వంతుజ్ లెక్క వండితె.

9 గిబ్బిజ్ ఒడఃజి వెంజి అయాలెకెండ్ నడఃజి మండ్రు.

10 వన్ని సిసూర్ వాతారె, “ఎందనిజ్ నీను కత వజ వరిజ్ వెప్పిని”, ఇజి వన్నిజ్ వెన్బాతార్.

11 వాండ్రు వరిజ్ ఈహు వెహ్తాన్. “దేవుణు ఏలుబడిః కిని వందిజ్ డాఃజితి మని సజతిజ్ దేవుణు మిజి తెలివి కిత మనాన్, గాని విరిజ్ తెలివి కివన్.

12 దేవుణు ఏలుబడి కిని వందిజ్ నెస్తి మని వన్నిజె మరి తెలివి కినాన్. వన్నిజ్ మరి నండో నెస్తిస్సాన్. ఇనికబా అర్థం ఆఇ వన్నిబాణిజ్ వాండ్రు నెస్తిమనికబా లాగె ఆనాద్.

13 ఎందనిజ్ నాను కత వజ వరిజ్ వెహ్సిన ఇహిజు, వారు సుడ్డఃజినార్ గాని సుడ్డఃతిక వరిజ్ తోర్వద్. వెంజినార్ గాని నెగెండ్ విన్వర్, అర్థంబా కివర్.

14-15 మీరు ఎస్తివలెబా వెంజినెదెర్ గాని అర్థం కిదెజ్ అట్ఇదెర్. ఎస్తివలెబా సుడ్డఃజినెదెర్ గాని ఇనిక ఇజి నెన్ఇదెర్. వారు వరి కణకాణిజ్ సుడ్డఃజి, గిబిజాణిజ్ వెంజి మన్నుదాన్ అర్థం కిజి నా దరోట్ మహ్తిజు, నాను వరిజ్ నెగెన్ కిత మరి. గాని అయ లెకెండ్ జర్గివిండ వరి మన్ను కొడువుదాన్ నిండ్రిత మనాద్. వరి గిబిజిజ్ మందజ్ ఆతె. వారు వరి కణ్కు మూక్త మనార్. ✱ యా లెకెండ్ ఎనయ ప్రవక్తవెట దేవుణు ముజాల వర్గితి మాట వరి మున్ను పూర్తి ఆతె.

16 మీ సుడ్డఃజినెకెజ్, వెంజినెకెజ్, మీరు అర్థం కిజినెదెర్. అందెజె మీరు దేవుణు సీజిని దీవనమ్కు మన్నుకిదెర్.

17 నండొండార్ ప్రవక్తరుని నీతి నిజాయి మన్నికార్ మీరు సుడ్డఃజిని వన్నాజ్ సుడ్డఃదెజ్ ఆస ఆతార్, గాని సుడ్డఃదెజ్ అట్ఎతార్. మీరు వెంజిని వన్నాజ్ విండ్రెజ్ ఆస ఆతార్ గాని విండ్రెజ్ అట్ఎతార్.

18 విత్కు విత్తివన్ని కతదిజ్ అర్థం మీరు జాగర్త వెండ్రు.

19 ఎయెన్బా దేవుణు ఏలుబడిః కిని వందిజ్ వెహ్సిన మాటెజ్ వెంజి దనిజ్ అర్థం అట్విండ మహిజు, సయ్తాన్ వాజి వన్ని మన్నుదు వితి దనిజ్ పెర్న ఒనాన్. యాకాదె మడిఃజు నడిఃమిహాన్ సొని సర్దు అర్తి మన్నివిత్కు.

20 సెగొండార్ సట్టు మున్ను మని లోతు సిల్లి డుల్లి నన్నికార్. సెగం విత్కు అయా డుల్లిదు అర్తె, గాని వారు దేవుణు మాట వెంజి

✱ 13:14-15 13:14-15 యెసయ 6:9,10.

సర్దదాన్ దనిజ్ వెటనె మన్నుదు ఇడ్వార్.

21 వారు కండెక్ కాలం దేవుణుమున్ను నమకమ్దాన్ నిల్వార్. గాని కస్టమ్కు, ప్రమెజ్ వానివలె వెటనె దేవుణు మున్ను మన్ని నమకం వారు డిసి సీజినార్.

22 మరి ఒరెన్ విత్కు అర్తి మన్ని సాప్పుతుపెజ్ నేర్పి బూమి నన్నికాన్. వాండ్రు దేవుణు మాట వెంజినాన్ గాని యా లోకమ్ది బత్కు వందిజ్ విసారం ఆజి మరి డబ్బు వందిజ్ సెఇ ఆస ఆజి, వనిజ్ అణసు తిగ్జి మంజినె. వన్ని బత్కుదు పలం సిలి నన్నికాన్ ఆనాన్.

23 మరి ఒరెన్ విత్కు అర్తి మన్ని నెగ్గి బూమిలెకెండ్ మనాన్. వాండ్రు దేవుణు మాట వెంజి దనిజ్ అర్దం కిజినాన్. వాండ్రు, విత్తి విత్తుదిజ్ వంద వంతుజ్, అరువయ్ వంతుజ్, ముపయ్ వంతుజ్ పలం సీనాన్.

కారు మొక్కెజ్

24 యేసు మరి ఉండ్రి నజతి కత వజ వరిజ్ వెహ్లాన్. “దేవుణు ఏలుబడిః ఇహిజ, వన్ని మడిఃజ నెగ్గి విత్కు విత్తి వన్నిజ్ పొలిత మనాద్.

25 గాని విజేరె నిద్ర కిజి మహివలె, వన్ని పగాతికాన్ వాతాండ్రె, కూలిజ నడిఃమి కారు విత్కు వితాండ్రె సాహాన్.

26 కూలిజ్ నేర్జి పిరితెనె, సెరెక్ పొక్తివలె, నెగ్గి కూలిజ్లెకెండ్ మన్ని కారుబా తోరితాద్.

27 వన్ని పణి మసిర్ మడిఃజ యాజుమాని డగ్గు వాతారె, “ఓ బాబు, నీను నీ మడిఃజ నెగ్గి విత్కునె వితిగదె? మరి ఎమేణి యా కారు మొక్కెజ్ వాతె?”, ఇజి వెన్బాతార్.

28 “ఒరెన్ పగాతికాన్ యాక కితాన్”, ఇజి వాండ్రు వెహ్లాన్. అయ పణి మనిసిర్ మాపు సొన్ని వనకాజ్ లాగ్జి కొటు కిదెజ్ నిజి ఇస్టమ్నా? ఇజి వెన్బాతార్.

29 అయావలె వాండ్రు, “ఏలు పొని, నెగ్గి కూలిజ్లెకెండ్ మన్ని కారు మొక్కెజ్ మీరు లాగ్గివలె వనకవెట ఒకవేల కూలిజ్బా తెప్పిదెరీసు.

30 కొయ్ని కాలం వానిదాక రుండిబా కూడఁజి పిరిపీద్. కొయ్ని కాలమ్దు, నెగ్గి కూలిజ్ లెకెండ్ మన్నికారు మొక్కెజ ముజాల కొయ్జి కటెజ్ తొప్పి సుర్దు, వెనుక కూలిజ్ కొయ్జి తసి నా కొటుదు వాక్తు’, ఇజి కొయ్ని వరిజ్ వెహ్నా”, ఇజి వెహ్నాన్.

సర్పుగిడ కత

31 యేసు మరి ఉండ్రి సజతి కత వజ వరిజ్ వెహ్నాన్. “దేవుణు ఏలుబడిఁ ఇహిజ, సర్పు మొక్కెజ్ విత్కుదిజ్ పొలిత మనాద్. ఒరిన్, అక్క వన్ని మడిఁజ విత్తాన్.

32 అయాక విజు విత్కు లొఇ ఇజరికాదె, గాని పిరితిజ కుస మొక్కెజ విజు వనకాజ్ లొఇ పెరిక ఆజి మరాన్ లెకెండ్ ఆనాద్. ఆగసమ్దు ఎగ్రిజిని పొటిజ్ వాజి దన్ని కొమెజ గూడు తొప్పి బన్నె.

33 యేసు మరి ఉండ్రి సజతి కత వజ వరిజ్ వెహ్నాన్. “దేవుణు ఏలుబడిఁ ఉండ్రి బోదెలి నండ్ నెగ్గి దూరుదు కలప్తిమన్ని పులాజ్ మన్ని కండెక్ దూరుదిజ్ పొలిత మనాద్. అయాక కలప్తి మన్ని దూరుదిజ్ విజు పులాజ్ కినిదాక పణి కినాద్.”

34 యేసు కత వజనె విజు మాటెజ్ లోకురిజ్ వెహ్నాన్. కత వజ ఆవిండ ఇనికబా వరిజ్ వెహ్నాన్.

35 “నాను కత వజనె వెయ్దాన్ వెహ్నా. లోకం పుట్టి బాణిజ్ అసి డాఁజితిమన్ని సజతిజ్ నాను తెలివి కిన్”☆, ఇజి ప్రవక్త వెట దేవుణు ముజాల వర్గితి మాటెజ్ పూర్తి ఆతాద్.

36 నస్తవలె వాండ్రు లోకురిజ్ డిఁసి ఇండ్రొ సాహాన్. వన్ని సిసూర్ వన్ని డగ్గు వాజి, “మడిఁజ మన్నినెగ్గి కూలిజ్ లెకెండ్ మన్ని కారు మొక్కెజ వందిజ్ వెహ్తి కతదిజ్ అర్దం మజి వెహ్అ”, ఇజి వెహ్నాన్.

37 అందెజె వాండ్రు ఈహు వెహ్నాన్. “నెగ్గి విత్కు విత్తికాన్ లోకు మరిసి ఆతి నాను.

38 మడిఁజ యా లోకం. నెగ్గి విత్కు దేవుణు మున్ను నమకం ఇడ్తి మన్ని దేవుణు కొడోర్ నెగ్గి కూలిజ్ లెకెండ్ మన్ని కారు మొక్కెజ్, సయ్హాను కొడోర్.

☆ 13:35 13:35 కీర్వస 78:2.

39 వనకాజ్ విత్తికాన్ పగాతికాన్ అతి నయ్తాను. కోత్త కొయ్నిక యా లోకమ్దిజ్ ఆక్కర్దినం. కొయ్నికార్ దేవుణు దూతార్.

40 నెగ్గి కూలిజ్ లెకెండ్ మన్ని కారుదిజ్ లాగ్గి కొట్టుకిజి సుర్ని లెకెండెనె యా లోకమ్ది ఆకర్దినమ్బా వానాద్.

41-42 నెగ్గి కూలిజ్ లెకెండ్ మన్ని కారుదిజ్ లాగ్గి కొట్టు కిజి ససుద్ సుర్ని లెకెండె, పాపం కిజిని వరిజ్, మరి పాపం కిబిన్సి విజు దన్నిజ్ నా ఏలుబడిఃదాన్ వెల్లి పొక్తెజ్ ఇజి, లోకుమరిసి అతి నాను నా దూతారిజ్ పొక్తాలె. వారు వరిజ్ సిసుద్ విసీర్నాలె. అబ్బె వారు అడఃబాజి, పల్కు కొప్పి మంజినార్.

43 నీతి నిజాయ్తి మనికార్ వరి బుబ్బాతి దేవుణు కిని ఏలుబడిఃదు పొద్దు లెకెండె జాయ్ సీజి మంజినార్. మీరు గిబ్బిజ్ ఒడఃజి వెంజి అయావజ నడిఃజి మండ్రు.

దేవుణు ఏలుబడిః

44 “దేవుణు ఏలుబడిః కినిక, మడిఃజదు డాప్తిమన్ని ఏలువాతి ఆస్తిదిజ్ పోలిత మనాద్. ఒరెన్ ఆ ఏలువాతి ఆస్తిదిజ్ సుడఃతిజ్, ఎయెర్బా నెన్వీండ మరి డాప్పి, గొప్ప సర్దదాన్ సొన్ని వన్నిజ్ మనికెజ్ విజు పొర్ని అయ మడిఃజ కొటాన్.

45 మరి నాను మిజి వెప్పిన, దేవుణు ఏలుబడిః కినిక ఇహిజ, ఒరెన్ ముజెలు నవుకారి రెబాజిని గొప్ప ఏలువ మన్ని ముజెలు లెకెండెనె.

46 వాండ్రు రెబాజినిలెకెండె మన్ని, ఉండ్రీ విలువాతి ముజెలుదిజ్ సుడఃతాండ్రె, సొన్ని వన్నిజ్ కల్గితి మనికెజ్ విజు పొర్ని అయ ముజెలు కొటాన్.

47 మరి నాణు మిజి వెప్పిన, దేవుణు ఏలుబడిః కినిక ఇహిజ, సమ్దరమ్దు పొక్కిని రకరకమ్ది మొయెజ్ అన్ని వలాదిజ్ పోలిత మనాద్.

48 అయ వల నిండ్రీతిజ్ మొయెజ్ అస్సికార్, వల పడకాదు లాగ్గి బసి, నెగ్గి మొయెజ గంపాదు ఇడ్వార్. సెఇ మొయెజ విసీర్నార్.

49 యా లెకెండెనె యా తరమ్ది ఆక్కర్ దినంబా వానాద్. దేవుణు దూతార్ వాజి నీతి నిజాయి మన్ని వరిబాణిజ్, సెఇవరిజ్ ఎర్లిస్సార్.

50 వారు వరిజ్ గొప్ప పెరి సిసు బాడ్డిదు అర్స్సార్. అబె అడఃబాజి, పల్కు కొహ్కీ మంజినార్.”

51 “యా విజు సజతిజ వందిజ్ మిజి అర్థం ఆతాదా?”, ఇజి యేసు వరిజ్ వెన్బాతాన్. “ఒఒ”, ఇజి వారు మర్జి వెహ్సార్.

52 “దేవుణు ఏలుబడిః కిని వందిజ్ నెస్తి మన్ని యూదురి రూలుజ్ నెస్తిస్సికార్ విజేరె, వన్ని ఆస్తి ఇడ్డి మన్ని గదిదాన్ పడాయికెజ్, కొత్తకెజ్ ఉండ్రె లెకెండె వెల్లి తని ఇండ్రోణి ఎజుమానిజ్ లెకెండె మనాన్”, ఇజి వాండ్రు వరిజ్ వెహ్సాన్.

53 యేసు యా కతెజ్ వెహ్తి వీజితి వెనుక, అబెణిజ్ సాహాన్.

54 వన్ని సొంత పట్టమ్దు వాతాండ్రె, వాండ్రు యూదురు మీటిజ్ కిని ఇల్కాజ్ లోకురిజ్ నెస్తిసి మహాన్. “విన్నిజ్ యా గెణం, యా బమ్మాతి పణిజ్ కిని సత్తు ఎంబెణిజ్ వాతాద్”, ఇజి వారు బమ్మ ఆజి వర్గితార్.

55 “వీండ్రు కంసెల్ వాండ్రు మరిసి ఆఎండ్రా? విన్ని అయ్సి పేరు మరియ గదె? యాకోబు, యోసేపు, సీమోను, యూద ఇనికార్ విన్ని తంబెరిసిర్ గదె?

56 విన్ని తజిసిక్ మా వెట మనెగదె? యాకెజ్ విజు వినిజ్ ఎంబెణిజ్ వాతె?

57 వారు వన్ని ముస్కు కోపం ఆజి మహార్. గాని యేసు వరిజ్ “ఒరెన్ ప్రవక్త, వన్ని సొంత ఇండ్రోనె గవరవం సిల్లికాన్ ఆజినాన్”, ఇజి వెహ్సాన్.

58 వన్ని ముస్కు వరిజ్ నమకం సిల్లితిజ్ వాండ్రు అబ్బె లావ్బమ్మాతి పణిజ్ కివితాన్.

14

యోహాను బుర కత్తినార్

1-2 నస్తీవలె హేరోదురాజు యేసు వందిజ్ మాటెజ్ విహండ్రె, “వీండ్రు సాతి వరిబాణిజ్ మర్జి నిజితి బాప్తీసం సీని యోహాను. అందెజె యా బమ్మాతి పణికిని సత్తు వన్ని లోఇ మనాద్”, ఇజి వన్ని పణి మన్నిరిజ్ వెహ్తాన్.

3 వన్ని తంబెరిసి ఆతి పిలిపు ఆల్ని హేరోదియ వందిజ్ హేరోదురాజు ఆడ్ర సిత్తిలెకెండ్ యోహానుజ్ అసి గోలుసుదాన్ తోప్పి జెలిదు ఇడ్డ మహోర్.

4 ఎందనిజ్ ఇహిజు, “దనిజ్ నీ వందిజ్ అల్ని లెకెండ్ ఇడె ఆతిక దేవుణు మోసెజ్ సిత్తి రూలుదిజ్ పడివద్”, ఇజి యోహాను వన్నిజ్ వెహ్తా మహోన్.

5 యోహానుజ్ సప్తెజ్ ఇజి హేరోదు రాజు ఒడిఃబితాన్, గాని లోకుర్ విజెరె వీండ్రు ఒరెన్ దేవుణు ప్రవక్త ఇజి వెప్పి మహిజ్ విన్నిజ్ సప్తెజ్ తియెలాత మహోన్.

6 హేరోదు రాజు పుట్టి రోజు వాతిజ్, హేరోదియ గాల్ని వాజి వరి వందిజ్ డాట్టి కర్జితాద్. హేరోదు రాజుజ్ గొప్ప సర్ద ఆతాన్.

7 అందెజె అది ఇనిక లొస్తిజ్బా సీన ఇజి వాండ్రు దనివెట ఉండ్రీ ఒట్టు పొక్కి దన్నిజ్ ఉండ్రీ మాట సితాన్.

8 అయ్సి దనిజ్ సుత్రిస్తి లెకెండ్నె అది సొహదె, “బాప్తీసం సీని యోహాను బుర్ర కత్తి ఉండ్రీ పలెండు సిద”, ఇజి లొస్తాద్.

9 రాజు గొప్ప బాద ఆతాన్. గాని వాండ్రు కితి ప్రమాణం వందిజ్, వన్ని వెట విందుదిజ్ బస్తిమిహి కూలెజ్ వందిజ్ అది లొస్తిక సీదెజ్ ఇజి ఆడ్ర సితాన్.

10 జెలిదు మహి యోహాను బుర్ర కత్పెస్సన్.

11 వన్ని బుర ఉండ్రీ పలెమ్దు ఇడ్డి తపిసి దనిజ్ సిబిస్తాన్. అది అయాక దని అయ్సి డగ్రు ఒత సితాద్.

12 యోహాను సిసూర్ వాజి వన్ని పినుగు పెర్లి ఒసి సమాది కితార్. నస్తీవలె వారు యేసు డగ్రు వాతారె వెహ్తార్.

అయ్దు వేలుజ్ లోకాజ్ బోజనం సీనిక

13 జరగితి నజతిజ్ విజు విహాండ్రె యేసు ఉండ్రె డోణి ఎక్కి ఎయెర్బా మన్ఇ ఉండ్రె బాడ్డిదు ఒరేండ్రె సాహాన్. వాండ్రు సాహి నజతి వెంజి అయ పట్టుమ్దికార్ నండొండార్ నడిసి వన్ని వెనుక సాహార్.

14 వాండ్రు అతాహా పడక జోరె అందితిజ్, డోణిదాన్ డిగితాన్ అయా మంద లోకురిజ్ సుడఃతాండ్రె వరి ముస్కు కనికారం ఆతాన్. వరి జబ్బుదివరిజ్ నెగెండ్రె కిత్తాన్.

15 పొద్దు ఆతివెలె వన్ని సిసూర్ వన్ని డగ్రు వాజి, “అక్క ఎయెర్ మన్ఇ బాడ్డి, ఏలునె పొద్దు ఆతాద్. యా లోకుర్ నాహ్మజ్ సొన్ని వారె వరిజ్ బోజనమ్కు కొండెజ్ వరిజ్ పోక్అ”, ఇజి వెహ్టార్.

16 “వారు సాండ్రెజ్ అక్కర్ సిల్లెద్. మీరె వరిజ్ తిండ్రెజ్ ఇనికబా సీదు”, ఇజి యేసు వరిజ్ వెహ్టాన్.

17 “ఇదిలో, మా వెట అయ్దు రొటెజ్ని రుండి మొయెజ్నె మన”, ఇజి వారు వెహ్టార్.

18 “అయకెజ్ నా డగ్రు తగాట్”, ఇజి యేసు వెహ్టాన్.

19 వెనుక లోకాజ్ పసి గడ్డి ముస్కు బస్తు ఇజి వెహ్టాండ్రె అయ్దు రొటెజ్ని రుండి మొయెజ్ కీదు అస్తాండ్రె ఆగాసం దరిజ్ సుడఃజి దేవుణుదిజ్ వందనమ్కు వెహ్ని రొటెజ్ రుక్కి సిసూరిజ్ సితాన్. సిసూర్ అక లోకాజ్ సీబాత సితార్.

20 వారు విజేరె పొట పంజు తిహార్. వెనుక మిగిలిత్తి ముక్కెజ్ పన్నెండు గంపెజ్ సిసూర్ పెహ్టార్.

21 బోదెక్కిని కొణ్డోర్ అవండ తిహికార్ అయ్దువేలు మన్ని మొగకొణ్డోర్ మహార్.

యేసు ఏరు ముస్కు నడిసినాన్.

22 లోకురిజ్ పొక్తి వెటనె యేసు వన్ని సిసూర్జ వెటనె ఉండ్రె డోణి ఎక్కి, వన్నిజ్ ఇంక ముజాల అతాహా పడక సాండ్రు ఇజి వరిజ్ పోక్తాన్.

23 వరిజ్ పొక్తి వెనుక, వాండ్రు ఒరేండ్రె పార్లనం కిదెజ్ ఉండ్రె గొరొత్ ఎక్తాన్. పొదు ఆతివెలె వాండ్రు ఒరేండ్రె అబ్బె మహాన్.

24 గాని డోణి ఒడ్డుదాన్ నండో దూరం సొహాద్ గొప్పు గాలి కిజి మహిజ్ ఉల్కెజాణిజ్ డోణి ఇతల్ అతాల్ దూజ్జి మహాద్.

25 కోడిజామ్దు యేసు సందారమ్దు ఏరు ముస్కు నడిజి పరి డగ్గు సొహాన్.

26 వాండ్రు సమ్దరమ్దు ఏరు ముస్కు నడిసినిక సిసూర్ సుడేతారె తియెల్ అతార్. “అబయా యాక ఉండ్రీ దూబ”, ఇజి వారు తియెల్ ఆజి డెల్స్తార్.

27 వెటినె యేసు, “దయ్దరమ్దాన్ మండ్రు, ఇక నానె, తియెల్ ఆమాట్”, ఇజి వెహ్హాన్.

28 పేతురు, “ప్రబువా, నీనె ఇహిజ, నాను ఏరు ముస్కు నడిజి నీ డగ్గు వాదెజ్ సెలవ సిద్అ”, ఇజి వెహ్హాన్.

29 “రఅ”, ఇజి యేసు వెహ్హాన్. నస్తవలె పేతురు డోణి డిగ్జి యేసు దరోట్ ఏరు ముస్కు నడిత వాతాన్.

30 గాని గాలిదిజ్ నిజిత్తి ఉల్కెజ సుడేజి తియెలాజి వాండ్రు ముడుగ్జి మహాన్. “ప్రబువా నజి రసిన్అ”, ఇజి డెల్స్తార్.

31 వెటినె యేసు వన్నికియు సాప్పి వన్నిజ్ అస్తాన్. “ఇజిరి నమకం మనికి, ఎందనిజ్ నీను అనుమానం ఆతి?”, ఇజి వెహ్హాన్.

32 వారు డోణి ఎక్తిజ్ గాలి అలెతాద్.

33 నస్తవలె డోణిదు మనికార్ వాజి, “నిజమె, నీను దేవుణు మరిసినె”, ఇజి వెప్పి వన్నిజ్ పొగ్డిజి మాడిస్తార్.

34 వారు అతాహ పడక సొన్ని గెనెసెరెతు నాటొ అందితార్.

35 అబ్బెణి లోకుర్ వన్నిజ్ గుర్తు అస్తారె డగ్గు మని నాహ్కజ్ కబ్బు పొక్తార్. లోకుర్ పరి కస్టమ్దు మన్ని పరిజ్ విజేరిజ్ వన్ని డగ్గు తత్తార్.

36 జబ్బు మన్నికార్ వన్ని సొక్క సెంగుబా ముట్టెజ్ బతిమాలజి సెలవ లొస్తార్. ముట్టికార్ విజేరె నెగెండ్ అతార్.

15

నెగ్గిక్కెజ్ సెఇక్కెజ్

1-2 సెగొండార్ పరిసయరుని యూదురిజ్ రూలుజ్ నెస్పిస్వికార్ యెరూసలేమ్దాన్ వాతారె యేసుజ్, “ఎందనిజ్ నీ సిసూర్ బోజెనమ్దిజ్ ముందాల కికు నోర్బావిర్, పెద్దెల్జ అలవాటుజ నెక్కి పోక్కినార్?”, ఇజి వెన్బాతార్.

3 యేసు వరిజ్ ఈహు మర్జి వెహ్టాన్, “మీరు ఎందనిజ్ మీ అలవాటుజ వందిజ్ దేవుణు ఆడ్రెజ నెక్కి పోక్కినిదెర్?

4 మీ యాయ బుబ్బరిజ్ గవరం సిదు, మరి ఎయెర్బా అయ్సి అప్పొసిరిజ్* దూసిసి వెహ్టిజ వన్నిజ్ తప్తెజ్వలె* ఇజి దేవుణు రూలుదు వెహ్టా మనాద్.

5-6 గాని మీరు నెస్పిసిని దన్ని లోఇ తేడ మనాద్ మీరు నెస్పిసినిక ఇనిక ఇహిజ ఎయెన్బా, “నాను మిజీ ఇనికబా ఉండ్రీ సాయం లెకెండ్ కిన ఇజి ఇట్టి మనిక, దేవుణుదిజ్ సంత సిత్త మన్ను’ ఇజి అయ్సి అప్పొసిరిజ్ వెహ్టిజ, వాండ్రు మరి గవరమ్దాన్ నెగెండ్ నుండెదెజ్ అక్కర్ సిల్లెద్. ఇజి అయాలెకెండ్ మీ అలవాటు వందిజ్ మీరు దేవుణు మాటదిజ్ సిలి లెకెండ్ కిజినిదెర్.

7-9 వేసం కినికిదెరా, “యా లోకుర్ పరి బెద్వెజాణిజ్ నజీ పొగ్గిజినార్ గాని పరి మన్ను నా బాణిజ్ దూరం మనాద్. వారు పణిదిజ్రెవిండ నజీ పొగ్గిజినార్. వారు నెస్పిస్వికెజ్ విజు లోకురి రూలుజ్నె,* ఇజి యెసయ ప్రవక్త వెట దేవుణు ముజాల మీ వందిజ్ వర్గితిక నిజమె”, ఇజి వెహ్టాన్.

10 యేసు అయ మంద లోకురిజ్ డగ్గు కూక్తాండ్రె ఈహు వెహ్టాన్, “మీరు జాగర్త వెంజి నెగెండ్ అర్దం కిదు.

11 వెయుదాన్ లోఇ సొనిక ఇనికబా ఎయెరిజ్బా ఇనిక ఆవిద్. గాని లోఇహాన్ వెయుదాన్ వెల్లివాని మాటెజ్నె బరెన్ వన్నిజ్ సెఇక కినె.”

12 నస్తవలె వన్ని సిసూర్ వాతారె, “యా మాటెజ్వెంజి పరిసయరు నండొ కోపం ఆతిక నీను నెస్పిదా?”, ఇజి వెహ్టార్.

13 వాండ్రు సిసూరిజ్, “పరలోకామ్దు మన్ని నా బుబ్బాతి దేవుణు

☆ 15:4 15:4 నిర్గమ 21:17; తేవి 20:9. * 15:4 15:4 నిర్గమ 20:12 ద్విత్తి 5:16.

☆ 15:7-9 15:7-9 యెసయ 29:13.

ఉణున్ ఇ విజు మొకెజ్ వేలెజాణిజ్ తెరె ఆనె వారబా అయ మొకెజ్ లెకెండెనె.

14 వరిజ్ డిసి సిదు. వారు గుడ్డిదివరిజ్ సరి తోరిన్ని గుడ్డిదికార్. ఒరెన్ గుడ్డిదికాన్ మరి ఒరెన్ గుడ్డి వన్నిజ్ సరి తోరిస్తిజ వారు రిఎర్బా గాంతదు అర్నార్”, ఇజి వెహ్లాన్.

15 అందెజె పేతురు, “యా కత వందిజ్ మజి అర్థం ఆనిలెకెండె వెహ్లాన్”, ఇజి వెహ్లాన్.

16 యేసు వరిజ్, “ఏలుబా మీరు మహివరిలెకెండె మనిదెరా? ఏలుబా నిన్ని మాటెజ్ అర్థం కిదెజ్ మిజి బుద్ధి సిల్లెదా?”

17 వెయుదాన్లో ఇ సొనిక, పొటాదు సొన్ని మరి అయాక మీరు బయలు బస్సివలె బూమిదు సొన్నినాద్, ఇక మీరు నెన్ ఇదెరా?”

18 గాని వెయ్దాన్ వెల్లి వాని మాటెజ్ మన్నుదాన్ వాజినె. ఆకెజె లోకుదిజ్ సెఇక కిజినె.

19 సెఇ ఆలోసనమకు, సప్పికెజ్, రంకు బూలానిక, కేలార్బూలానిక, డోజ కినిక, అబద్ధం వెప్పికెజ్, దేవుణుదిజ్ దూసిస్సికెజ్ యాకెజ్ విజు మన్నుదానె వాజినె.

20 యాకెజె ఒరెన్ వన్నిజ్ సెఇక కిజినె. కికు నొర్బావిండ ఉటిజ అక ఒరెన్ వన్నిజ్ సెఇక కివి.”

కనానియది బోదెలిజ్ మన్ని నమకం

21 యేసు అబ్బెణిజ్ నండొ దూరం సొన్ని ఉండ్రి గొరొన్ ఎక్సి డిగితాండ్రె తూరు, సిదోను ఇని పట్టుమ్కాజ్ సెందితి ప్రాంతమ్కాజ్ సొహాన్.

22 వాండ్రు అబ్బె అందితిజ్ అబ్బెణిజ్, కానాన దేసెమ్ది ఉండ్రి బోదెలి వాతాదె, “ప్రబువా, దావిదు మరిసి నజి కనికారం తోరిన్ అ. నా గాల్పిజ్ దెయం అస్తిజ్ గొప్ప బాద ఆజినాద్”, ఇజి డేల్ని వెహ్లాద్.

23 యేసు దనిజ్ ఉండ్రి మాటబా వెహ్లాన్. అందెజె వన్ని సిసూర్ వాజి, “ఇది మా వెట గగోల్ ఆజి వాజినాద్, దనిజ్ పోక్ అ”, ఇజి బతిమార్తార్.

24 వాండ్రు వరిజ్, “మురుతి మెండగొరైజ్ లెకెండ దేవుణుబానిజ్ దూరం ఆతి ఇస్రాయేలు లోకుర్ డగ్రు నాను పోకె ఆత మన్న”, ఇజి వెహ్లాన్.

25 అది వన్ని ముజాల వాజి ముణుకుజ్ ఊర్జి, “ప్రబువా, నజి సాయం కిఅ”, ఇజి వెహ్లాన్.

26 వాండ్రు దనిజ్, “కొడొర్ తిండ్రైజ్ మని రొబెజ్ లాగ్గి నుకుడిజ్ సీనిక నాయం ఆఎద్”, ఇజి వెహ్లాన్.

27 అది, “నిజమె ప్రబువా, గాని ఎజమాని తింజిమహిజ్ బల్లదాన్ అర్ని ముక్కెజ్ నుకుడుజ్ తింజినె గదె?”, ఇజి వెహ్లాన్.

28 నస్తివలె యేసు, “బయి, నా ముస్కు మని నీ నమకం గొప్ప పెరిక. నీను కోరితి లెకెండెనె నిజి ఆపిద్”, ఇజి దనిజ్ వెహ్లాన్. అయ గడియాదునె దని గాల్ని నెగెండ ఆతాద్.

నాల్లి వెయిజ్ లోకాజ్ బోజనం సీనిక

29 యేసు అబెణిజ్ సొన్ని గలీలయ సమ్దారం పడకాదాన్ వాజి అబె ఉండ్రీ గొరోత్ ఎక్తాండ్రై బస్తాన్.

30 సొటావరిజ్, గుడ్డివరిజ్, గుల్లవరిజ్, కికు కాల్కు అర్తివరిజ్ మరి ఆఇ జబ్బుదివరిజ్ నండోడారిజ్ అసి మంద లోకుర్ వన్ని డగ్రు వాతారె వరిజ్ వన్ని కాల్క అడ్లి ఇట్టార్. వాండ్రు వరిజ్ నెగెండ కిత్తాన్.

31 గుల్లవరిజ్ వర్గిదెజ్ వాతాద్. కికు కాల్కు అర్తికార్ నెగెమడ్ ఆతార్. సొటాదికార్ నడిఃతార్, గుడ్డిదికార్ సుడేదెజ్ అట్టార్. యాకెజ్ సుడేజి లోకుర్ విజెరె బమ్మ ఆతారె ఇస్రాయేలురి దేవుణుదిజ్ పొగిడిఃతార్.

32 యేసు వన్ని సిసూర్జ కూక్తాండ్రై వరిజ్, “యా లోకుర్ నావెట మంజి మూండ్రీ దిసమ్కు ఆతె. విరిజ్ తిండ్రైజ్బా ఇనికబా సిల్లెద్. నజి వరి ముస్కు కనికారం ఆజిన. వరిజ్ బజదావ్ పొక్కెజ్ మజి మన్ను రెవె. వారు కణ్కు త్రివిజి సర్దు అర్నార్ను”, ఇజి వెహ్లాన్.

33 సిసూర్ వన్నిజ్, “నిసొ మంద లోకురిజ్ తీపిస్తైజ్ బిడిఃమ్బూమి ప్రామతమ్దు ఇనిక దొహ్కనె?”, ఇజి వెహ్లాన్.

34 యేసు వరిజ్, “మీ బాన్ఎసోడు రొటెజ్ మన్నె?”, ఇజి వెన్బాతాన్. వారు, “ఏడు రొటెజ్ని సెగం ఇజిరి మొయెజ్ మనె”, ఇజి వన్నిజ్ వెహ్టార్.

35 లోకురిజ్ బూమిదు బస్తు ఇజి యేసు వెహ్టార్.

36 వెనుక అయ ఏడు రొటెజ్ని మొయెజ్ కిదు అస్తాండ్రె దేవుణుదిజ్ వందనమ్కు వెహ్పి అయాకెజ్ రుక్సి వన్ని సిసూర్జి సితాన్. వారు లోకాజ్ సీబాజి సితార్.

37 లోకుర్ విజేరె పొట పంజు తిహి వెనుక మిగిలితి ముక్కెజ్ ఏడు గంపెజ్ నిండ్రు వన్ని సిసూర్ పెహ్టార్.

38 బోదెన్ కొడోర్ ఆవిండ తిహి మొగకొడోర్ నాల్గిమొయెజ్ మహార్.

39 అయ మంద లోకురిజ్ పొక్తి వెనుక యేసు డోణి ఎక్టాండ్రె మగదాన్ ఇని నాటో సాహాన్.

16

1 నస్తవలె పరిసయరుని నదుకయరు యేసుజ్ డగ్రు పరిక్సి కిదెజ్, వన్ని మాటెజాణిజ్ వన్నిజ్ ఆస్తెజ్ ఇజి డగ్రు వాతార్. దేవుణునె వన్నిజ్ పొక్తాన్ ఇనిదన్నిజ్ రుజుప్ లెకెండ్రె ఆగాసమ్దాన్ ఉండ్రె బమ్మాతి పణి కిజి మజి తోరిన్అ, ఇజి వెహ్టార్.

2 వాండ్రు వరిజ్, “పొద్దు ఆనివెలె ఆగసం ఎర్రజ్ మహిజు నేండ్రు నెగెణ్ మంజినాద్ ఇజి మీరు వెహ్పినిదెర్.

3 మరి, పెందల ఆగసం ఎర్రజ్ ఆజి మొసాప్ మహిజు, నేండ్రు గాలి పిరు వానాద్, ఇజి మీరు వెహ్పినిదెర్. ఆగసం సుడెజి అయ రోజు ఎలాగ మంజినాద్ ఇజి వెహ్టాజ్ మీరు నెస్సిదెర్, గాని జర్గినికెజ్ సుడెజి కాలమ్దిజ్ గుర్తు అస్తెజ్ అట్ఇదెర్.

4 యా తరమ్దికార్, నెఇకార్ ఆతికారె దేవుణు వందిజ్ వరిజ్ మన్ను సిల్లెద్ గుర్తు లెకెండ్రె ఉండ్రె బమ్మాతి పణి వందిజ్ వెన్బజినార్, గాని దేవుణు ప్రవక్త ఆతి ఓనెజ్ జర్గితిక తప్ప మరి ఇనికబా ఉండ్రె గుర్తు మరి తోర్ఎద్”, ఇజి వెహ్టార్.

5 వెనుక యేసు వరిజ్ డిసి అబ్బెణిజ్ సాహాన్.

6 వారు డోణి ఎక్వారె సమ్దరం అతాహ పడక సొన్ని మహివలె, వన్ని సిసూర్ రొట్టెజ్ ఒత్తెజ్ పొస్త మహార్. నస్తివలె యేసు, “పరిసయరుది మరి సదుకయరుది పులాజ్ కిని దూరువందిజ్ మీరు గొప్ప జాగర్త మండ్రు”, ఇజి వెహ్హాన్.

7 “మాప్ రొట్టెజ్ తెఇతి వందిజె యా మాట వెహ్హాన్”, ఇజి ఒరెన్ వెట ఒరెన్వర్గిజి మహార్.

8 యేసు అక నెస్తాండ్రె, ఎందానిజ్ మీరు నమకం తక్కు మనికిదెర్ ఆజినిదెర్! మీ బాన్ రొట్టెజ్ సిల్లితిజ్ మీరు ఎందనిజ్ ఒరెన్ మరి ఒరెన్ వెట వర్గిజినిదెర్?

9 ఏలుబా మీరు అర్దం కిజి నెస్తెజ్ అట్ఇదెరా? అయ్దు రొట్టెజ్ మహివలె అయ్దు వెయిజ్ లోకాజ్ తీపిస్తిజ్ మిగిలితికెజ్ ఎసోడు గంపెజ్ పెహ్హిదెరో?

10 మరి ఏడు రొట్టెజ్ మహివలె నాల్లి వెయిజ్ లోకాజ్ తీపిస్తిజ్ మిగిలితికెజ్ ఎసోడు గంపెజ్ పెహ్హిదెరో? వినుకాజ్బా మీరు ఎతు కిఇదెరా?

11 నాను వర్గితిక రొట్టెజ్ వందిజ్ ఆవిద్ ఇజి ఎందనిజ్ మీరు అర్దం కిజి నెన్ఇదెర్? గాని పరిసయరుని సదుకయరుది పులాని దూరు వందిజ్ మీరు జాగర్త మండ్రు ఇజి నాను వెహ్హాన్”, ఇజి వెహ్హాన్.

12 నస్తివలె వాండ్రు జాగర్త మండ్రు ఇజి వెహ్హిక రొటె తయార్ కిని పులాని దురు వందిజ్ ఆవిద్ గాని పరిసయరుని సదుకయరుది పులాని దూరు నని బోద వందిజ్ జాగర్త ఆజి మండ్రు ఇజి వెహ్హాన్, ఇజి వారు అర్దం కిజి నెస్తార్.

13 యేసు పిలిపుది ఆతి కయసెరియ పట్టుమ్దిజ్ డగ్రు మన్ని నాహ్కాజ్ వాతిజ్ “లోకు మరిసి ఆతి నా వందిజ్, నాను ఎయెన్ ఇజి లోకుర్ వెహె ఆజినార్?”, ఇజి వన్ని సిసూర్జ వెన్బాతాన్.

14 “సెగొండార్ బాప్తిసం సీని యోహాను ఇజినార్, సెగొండార్ ఏలియ ఇజినార్, మరి సెగొండార్ యిరిమ్య ఇజినార్, సిల్లె ప్రవక్తెజ్ లొఇ ఒరెన్ ఇజి సెగొండార్ వెహె ఆజినార్”, ఇజి వారు వెహ్హార్.

15 అందెజె యేసు, “గాని నాను ఎయెన్ ఇజి మీరు వెహ్నినిదెర్?”, ఇజి వెన్బాతాన్.

16 పేతురు ఆతి సీమోను, “నీను బత్తిజిని దేవుణు మరిసి ఆతి క్రీస్తు*”, ఇజి వెహ్తాన్.

17 యేసు, వన్నిజ్, “యోన మరిసి ఆతి సీమోను, నీను దేవుణు సీజిని దీవనమ్కు మంజినికాన్. యాక నిజి తెలియకిత్తిక లోకుర్ఎయెర్బా ఆవర్ గాని పరలోకామ్దు మని నా బుబ్బాతి దేవుణునె.

18 గాని నాను నిజి వెహ్నిక ఇనిక ఇహిజ నీను పేతురు, నీ పేరుదిజ్ తర్దం సట్టు ఇజి నాను యా సుటు ముస్సు నా సజమ్దిజ్ తోహ్నా. అయా లోకమ్ది సత్తుజ్ దనిజ్ గెలిస్తెజ్ అట్ఏద్.

19 దేవుణు ఏలుబడిః కిజిని పరలోకామ్దిజ్ సెందితి ఆతికారం నాను నిజి సీన†, యా లోకమ్దు నీను ఇనిక తోహ్నిదో, అయాక పరలోకామ్దుబా తోహె అనాద్. యా లోకమ్దు నీను ఇనిక కుత్తిదో, అయాక పరలోకామ్దుబా కుతె ఆనాద్”, ఇజి వెహ్తాన్.

20 వెనుక యేసు, వాండ్రు క్రీస్తు ఆతికాన్ ఇజి ఎయెరిజ్బా మీరు వెహ్తాజ్ ఆవెద్ ఇజి వన్ని సీసూరిజ్ కసితం వెహ్తాన్.

21 అయ వెలెహన్ అసి యేసు, నాను యెరూసలేమ్దు సాండ్రెజ్ వెలె, మరి అబె పెదెలుజ, పెరి పుజెరిజుని యూదురి రూలుజ్ నెస్పిన్ని వరి కిదాన్ నండో ఇమ్సెజ్ ఓరిస్సాలె, లోకుర్ నజి సప్పాలె సాతి మూండ్రీ రోజుదు దేవుణు నజి మరి మర్జి నిక్కినాలె ఇజి నండో సజతిజ్ వన్ని సీసూరు వెట వెహ్ని మహాన్.

22 పేతురు యేసుజ్ ఉండ్రీ పడెకాదు కూక్త ఒతండ్రె, “ప్రబువా, నిజి యా లెకెండ్ జర్గిదెజ్ ఆవెద్”, ఇజి గటిజ వెహ్తాజ్ మొదోల్స్తాన్.

23 అహిజ, వాండ్రు పేతురు దరిజ్ మర్జి బేసి, “ఓ సయ్తానా! నీను నజి ఉండ్రీ అడ్డు లెకెండ్ మని. నీ మన్నుదు మని సజతిజ్ దేవుణుబాణిజ్ వాతిక ఆవెద్, లోకుర్ ఒడెఃబినికెజ్”, ఇజి వెహ్తాన్.

* 16:16 16:16 క్రీస్తు ఇని మాటదిజ్ అర్దం దేవుణు ఏర్పాటు కిత్తి పోక్తికాన్ † 16:19 16:19 పరలోకమ్ది తాలం కిక్కు ఇజి తెలుగుదు రాస్ట మనాద్.

24 నస్తవలె యేసు వన్ని సిసూరిజ్ సుడఃజి, “ఎయెన్బా నా వెనుక వాదెజ్ ఇహిజ, వాండ్రు వన్ని సొంత ఆసెజ్ విజు డిసి సీజి వన్నిజ్ వాజిని కస్టుంకు విజు ఓరిస్తెజ్ తయారాజి పిండఃజి నా వెట సాదెజ్బా తయారాజినె నా వెనుక వాదెజ్లె.

25 ఎయెన్బా వన్ని పాణమ్దిజ్ వాండ్రె కాపాడఃదెజ్ ఇజి సుడఃతిజు వన్నిజ్ ఎలాకాలం మంజిని బత్కు మన్విద్. నా వందిజ్ ఎయెరిజ్బా వన్ని పాణం నస్టుం ఆతిజ, వాండ్రు ఎలాకాలం మంజిని బత్కుదు సొనాన్లె.

26 ఎయెన్బా వాండ్రు కొరిజినిక్కెజ్ దొహ్కొక్కి యా లోకమ్ది ఆస్తిని సర్ల విజు దొహ్కొక్కి వెనుక దేవుణువెట ఎలాకాలం మంజిని బత్కుదు సొన్విండ మహిజ ఇని లబం మనాద్? దేవుణువెట ఎలాకాలం మంజిని బత్కుదిజ్ బదులు మరి ఇనిక సీదెజ్ అట్వాన్?

27 లోకు మరిసి ఆతి నాను, నా బుబ్బాతి దేవుణు గొప్ప జాయ్దాన్, వన్ని విజు దూతరిజ్ తోడః అసి రాజు లెకెండ వానాలె. వెనుక ఒరెన్ వన్నిజ్ వన్ని పణిదిజ్ తగితి లెకెండ పలం సీనాలె.

28 లోకుమరిసి ఆతి నాను రాజు లెకెండ ఏలుబడిః కినిక సూణిదాక, ఏలు నిహిమన్ని వరిలోఇ సెగొండార్ సావీర్ ఇజి నాను మిజి నిజం వెహ్సిన”, ఇజి వెహ్సన్.

17

యేసు, మోసెని ఏలియ

1 ఆరు రోస్కు వెనుక యేసు, పేతురుని యాకోబు, యాకోబు తంబెరిసి ఆతి యోహానుజ్బా కూక్తాండ్రె వన్నివెట ఒతాన్. వారు నండో ఎత్తుమని ఉండ్రె గొరోన్ ముస్కు ఎక్త సాహార్.

2 అబ్బె వరి ముందాల వన్ని రూపు మారితాద్. వన్ని మొకొం పొద్దు లెకెండ ఆతాద్. వన్ని సొకెజ్ మెర్నిని జాయ్లెకెండ తెలాజ్ ఆతె.

3 ఇదిలో, నస్తవలె అబ్బె మోసెని ఏలియ యేసు వెట వర్గిజి మంజినిక పరిజ్ తోరె ఆతాద్.

4 నస్తవలె పేతురు, “ప్రబువా, మాటు ఇబ్బె మహిజ నెగెద్. నిజీ ఇస్టం ఇహిజ, ఇబ్బె నిజీ ఉండ్రీ, మోసెజ్ ఉండ్రీ, ఏలియెజ్ ఉండ్రీ, ఆహె మూండ్రీ గుడుసెజ్ తొహ్నా”, ఇజి వెహ్తాన్.

5 వాండ్రు వర్గిజి మహివలె నండో జాయ్మని ఉండ్రీ మొసోప్ వరిజ్ వ్డెగ్తాద్. “ఇదిలోన్ వీండ్రు నజి ఇస్టమాతి నా మరిన్. విన్ని మున్సు నాను సర్ల ఆత మన్న. విన్ని మాటెజ్ నెగెండ వెండ్రు”, ఇజి ఉండ్రీ జాటు అయ మొసోపుదాన్ వాతాద్.

6 సిసూర్ యా మాట విహారె నండో తియెల్ ఆజి పడెగ్గి అర్తార్.

7 యేసు వరి డగ్రు వాజి వరిజ్ ముట్టి, “నిజ్దు, తియెల్ ఆమాట్”, ఇజి వెహ్తాన్.

8 వారు కణ్ణు పెర్జి బేస్తిజ్ యేసుజ్ తప్ప మరి ఎయెరిజ్బా తొవ్తార్.

9 వారు గొరొన్ డిగ్జి వాజి మహివలె, “లోకు మరిసి ఆతి నాను, సాతి పరిబాణిజ్ మర్జి నిజ్నిదాక, మిజి తోరె ఆతి యా సజతిజ్ వందిజ్ ఎయెరిజ్బా వెహ్కాట్”, ఇజి యేసు వరిజ్ వెహ్తాన్.

10 నస్తవలె వన్ని సిసూర్, “ఏలియ* ముజాల వాదెజ్ ఇజి ఎందనిజ్ యూదురి రూలుజ్ నెస్పిస్సికార్ వెహ్సినార్?”, ఇజి వన్నిజ్ వెన్బాతార్.

11 అందెజె వాండ్రు, ఏలియానె ముజాల వాజి మండ్రెజ్, యాక నిజమె. వాండ్రు వాజి విజు నెగెణ్ తయార్ కినాన్.

12 అహిజ ఏలియ ముజాల వాత మహాన్, గాని వారు వన్నిజ్ గుర్తు అస్టెజ్అట్ఎండ వరిజ్ ఇస్టమాతి లెకెండ వన్నిజ్ పడిఎండ కితార్. లోకుమరిసి ఆతి నానుబా అయాలెకెండ వరి కిదాన్ స్రమెజ్ ఓరిస్నాలె”, ఇజి వరిజ్ వెహ్తాన్.

13 బాప్తీసం సీని యోహాను వందిజ్ వాండ్రు వరివెట వర్గిజినాన్ ఇజి వారు అర్లం కితార్.

* 17:10 17:10 పాడయి ఒప్పుమానమ్దు మన్ని మలాకి ప్రవక్త పుస్తకమ్దు రస్తిమున్నిలెకెండ ఇహిజ, ఏలియ ముజాల వాదెజ్ ఇజి యూదురు నమ్మిజినార్. మలాకి 3:1, 4:5-6.

దెయం అస్తి కొడొడిదిజ్ నెగెణ్ కిజినాన్

14 వారు మంద లోకుర్డగ్గు వాతివలె ఒరెన్ వన్ని డగ్గు వాజి వన్ని ముందాల ముణ్ణు ఊర్జి,

15 “ప్రబువా నా మరిన్ ముస్సు నీ కనికారం తోరిన్అ వాండ్రు మూర్స పెప్పిజ్ నండొ బాద ఆజినాన్. వాండ్రు ఎసెజ్ ఎసెజ్ సిసుద్ సిలిజ ఏరుదు అర్పి మంజినాన్.

16 నాను నీ సిసూర్ డగ్గు వన్నిజ్ తత్త గాని వారు వన్నిజ్ నెగెండొ కిదెజ్ అట్ఎతార్”, ఇజి వెప్టాన్.

17 అందెజె యేసు, “యా తరమ్దికిదెర్ ఆతి మీరు మహికార్ మిజి నెస్పిన్ని తప్ప సరిదాన్ నడిసి మన్నదెర్. మీరు నాముస్సు నమకం సిల్లికిదెర్. నాను ఎస్సా కాలమ్కు దాక నాను మిజి ఒరిసి మండ్రెజ్ వలె వన్నిజ్ నా డగ్గు తగాట్”, ఇజి వెప్టాన్.

18 నస్తవలె యేసు అయ దెయమ్దిజ్ ఉండ్రె ఆడ్ర సితిజ్ అక్క వన్నిజ్ డిస్టతాద్. అయ గడియారునె ఆ ఇజిరికాన్ నెగెండొ ఆతాన్.

19 దని వెనుక వన్ని సిసూర్వాండ్రు ఒరేండ్రె మహివలె యేసు డగ్గు వాతారె, “మాపు ఎందనిజ్అయ దెయమ్దిజ్ సొన్పిన్జెజ్ అట్ఎతాప్?”, ఇజి వెన్బాతార్.

20-21 ఉండ్రె సర్పుగిడ నస్తు నమకం మహిజి యా గొరొన్దిజ్ సుడొజి, “ఇబ్బెణిజ్ అబ్బె సొన్అ’ ఇజి వెప్టాజి అది అబ్బె సొనాద్. మీరు కిదెజ్ అట్ఇక ఇనికబా మన్ఏద్, ఇజి నాను మిజి నిజం వెస్సిన”, ఇజి వెప్టాన్. మిజి నస్సా నమకం సిల్లెద్, అందెజె మీరు కిదెజ్ అట్ఇదెర్.

22 వారు గలీలయ దేసమ్దు వాతివెలె యేసు, “లోకు మరిసి ఆతి నాను లోకుర్ కియుదు ఒపజెపె ఆనాలె.

23 వారు నజి సస్పార్, మరి మూండ్రె దినమ్దు నాను మర్జి నిజెఆనాలె”, ఇజి వరిజ్ వెప్పిజ్ వారు నండొ దుకం ఆతార్.

24 యేసుని వన్ని సిసూర్ కపెర్నహముదు వాతివెలె, సెగం సెకల్[†] లెక్క పన్ను పెర్నికార్ పేతురు, డగ్రు వాతారె, “మిజి బోద కినికాన్ దేవుణు గుడిఃది పన్ను సివింద్రా?”, ఇజి వెన్బాతార్.

25 “ఒఒ వాండ్రు సీనాన్”, ఇజి వాండ్రు వెప్టాన్. పేతురు ఇండ్రో వాతిజ్, వాండ్రు వర్గివిండ ముజాల యేసు వర్గితాన్. “సీమోను, యా లోకమది రాజుర్ ఎయెర్బాణిజ్ సిస్తుని పన్నుజ్ ఒనూలు కిజినార్ వరి సొంత దేసెమది వరిబాణిజ్నా, సిల్లిజి అయదేసెమదు మన్ని ఆఇ దేసెమదివరి బాణిజ్నా? నీను ఇనిక ఒడొఃబిజిని?”, ఇజి వన్నిజ్ వెన్బాతాన్.

26 “వారు విద్దెం కిజి గెలిస్తి దేసెమదివరిబాణిజ్నె”, ఇజి పేతురు వెప్టాన్. యేసు వన్నిజ్, “అహిజి సొంత దేసెమదికార్ సివిండ తప్రె ఆజినార్.

27 మాటు వరిజ్ అడ్డు మంజిని వరిజ్లెకెండ్ మండ్రెజ్ ఆవెద్. నీను సేరుదు సొన్ని గాలం పొక్కి ముందాల దొహ్కాని మొయదిజ్ అసి దని వేయు రెక్కి సుడొఃతిజి, ఉండ్రె సెకెల్ కాసు దని వెయ్దు మంజినాద్. అయాక లాగ్గి నీ వందిజ్ని నా వందిజ్ పన్ను సిఅ”, ఇజి వెప్టాన్.

18

దేవును కిని ఏలుబడిఃదు పెరికాన్

1 నస్తవలె సిసూర్ యేసు డగ్రు వాజి, “దేవుణు కిని ఏలుబడిః కినివలె మాలోఇ ఎయెన్ అబ్బె పెరికాన్ మంజినాన్?”, ఇజి వన్నిజ్ వెన్బాతార్.

2 వాండ్రు ఒరెన్ ఇజిరి కొడొఃదిజ్ కూక్కి వరి నడిమి నిల్ప్రాన్.

[†] 17:24 17:24 యెరునల్లెమదు మన్ని దేవుణు గుడిఃదిజ్ అవసరమమాతికెజ్ కిజి నెగెండ్ సుడిఃదిజ్ ఒరెనొరెన్వన్నిబాణిజ్, సెగం సెకెల్ పన్నులెకెండ్ పెర్జి మహార్. యూదురు ఆతి మొగవారు 20 వయ్యుడాట్టిమహికార్ విజెరె గుడిః పన్ను సిదెజ్ ఇజి దేవుణుమాటదు రాస్త మనాద్. అక్క రుండి రొన్ను కూలిదిజ్ సమానం మహాద్. నిర్గమ 30:13-16. 2దిసరు 24:9-14, నెహెమ్య 10:32.

3 మరి వాండ్లు ఈహూ వెహ్లాన్, “మీరు ఇజిరి కొణ్డోర్ లెకెండ మన్ను మరిసి, వరి లెకెండ ఆఎండ మహిజ, మీరు ఎసెజ్బా దేవుణు కిని ఏలుబడిఃదు సొండ్రెజ్ అట్ఇదెర్, ఇజి నాను మిజి నిజం వెహ్లాన్.

4 అందెజ్ యా ఇజిరి కొణ్డోర్ లెకెండ తగె ఆనికాన్ ఎయెండ్రో, వాండ్రె దేవుణు కిని ఏలుబడిఃదు పెరికాన్ ఆనాన్.

5 మరి ఎయెర్బా నా ముస్కు మన్ని నమ్మకమ్దు యా ఇజిరి కొణ్డోర్ లెకెండ ఆతికాన్ ఇజి ఒడఃబినాండ్రో ననివన్నిజ్ డగ్రు కినికాన్, నజి డగ్రు కిజినాన్.

6 గాని, నా ముస్కు నమకం ఇట్టి మని యా కొణ్డోర్ నన్ని ఒరెన్ వన్నిజ్, ఎయెర్బా పాపం కిబిస్తిజ, వాండ్రు వన్ని మెడదు ఉండ్రీ పెరి జత్తవణుకు తోహా ఆజి సమ్దరం అడ్లి ముడుఃగిజి సొనిక వన్నిజ్ ఒద్దె నెగెద్.

7 ఎందానిజ్ ఇహిజ, లోకురిజ్ పాపం కిబిస్తిజ సజతిజ వందిజ్ యా లోకమ్ది వరిజ్ స్రమెజ్ తవ్ఉ. యాకెజ్ తవ్ఎండ వాదెజ్వెలె. గాని యాకెజ్ ఎయెన్వెట వానెనొ వన్నిజ్ వెహ్లాజ్ అట్ఇ నని కస్టమ్కు మంజినె.

8 నీ కియుబా, నీ కాల్కుబా నిజి పాపం కిబిస్తిజ, దనిజ్కత్తి విసీర్అ. రుండి కికు కాల్కు మంజి ఎలాకాలం మంజిని సిసుబాడిఃదు అర్ని దనిజ్ ఇంక, కికు కాల్కు సిల్లెండ ఆజి ఎలాకాలం దేవుణు వెట మంజిని బత్కుదు సొనిక నెగెద్.

9 మరి నీ కణక నిజి పాపం కిబిస్తిజ దనిజ్లాగ్జి విసీర్అ. రుండి కణ్కు మంజి ఎలాకాలం మంజిని సిసుబాడిఃదు అర్ని దనిజ్ ఇంక, ఉండ్రె కణక మంజి ఎలాకాలం దేవుణు వెట మంజిని బత్కుదు సొనిక నెగెద్.

10 యా ఇజిరి వరి లొఇ ఎయెరిజ్బా మీరు ఇజిరి కణుక సుడఃమాట్. ఎందానిజ్ ఇహిజ పరలోకమ్దు నా బుబ్బు డగ్రు మంజిని దూతార్ ఎస్తివలెబా వరిజ్ సుడఃజి మంజినార్.

మరుతి గొరై కత.

11 గొర్రెజ్ లెకెండ్ మురుతి సొహి లోకురిజ్ రెబాజి రక్సిస్తెజ్ ఇజినె లోకుమరిసి* ఆతి నాను ఇబ్బె వాత మన్న†.

12 ఒరెన్ వన్నిజ్ వంద గొర్రెజ్ మంజి వన్నాజ్ లోఇ ఉండ్రి మురుతిజ, మహి తొబయ్ తొమ్మిది గొర్రెజి డిసి, మురుతి గొరెదిజ్ రెబాజి సొన్ఎండ్రా? మీరు ఇనిక ఒడఃబిజినెదెర్?

13 దనిజ్ దొహ్కాతిజ, వన్ని మురుఎండ మని తొబయ్ తొమ్మిది గొర్రెజి మున్ను యా మురుతి ఉండ్రి గొరె వందిజ్ వాండ్రు గొప్ప సర్ల ఆనాన్, ఇజి నాను మిజి నిజం వెహ్సిన.

14 అయలెకెండ్నె యా ఇజిరి వరిలోఇ ఒరెన్బా పాడాఃజి సొండ్రెజ్ దేవుణు మంజిని బాడిఃదు మని మీ బుబాతి దేవుణుదిజ్ ఇస్తం సిల్లెద్.

15 మరి నీ తంబెరిజి లోఇ ఒరెన్ నిజి తపు పణిజ్ కతిజ, మరి ఎయెర్బా నెన్ఎండ వాండ్రుని నీను మనివెలె వాండ్రు కితి తపు పణిజ్ తోరిన్అ. వాండ్రు నీ మాట వెహిజి నీను వన్నిజ్ మర్జి నీ వెట కూడఃజి మంజిని వన్నిలెకెండ్ కిత్తి.

16 గాని వాండ్రు నీ మాట విన్ఎండ మహిజ, ఒరెన్ వన్నిజ్నొ, రివిరిజ్నొ నీ వెట తోడుః అసి వన్ని డగ్రు సొన్అ. అహిజ దేవుణు మాటద్దు మని లెకెండ్ రిఎర్ మువీర్ద్రి సొసిరి మాటెజవెట విజు సజతిజ్ నిజమాతికెజ్ ఇజి రుజుప్ కిదెజ్ వలె‡.

17 వాండ్రు వరి మాటబా విన్ఎండ మహిజ, అయ సజతి దేవుణు సజమదిజ్ తెలియ కిఅ. సజమది వరి మాటబా వాండ్రు విన్ఎండ మహిజ వన్నిజ్ ఆఇ వన్ని సనికాన్, సిల్లిజి పన్ను పెర్నికాన్కీ ఇజి

* 18:11 18:11 లోకుమరిసి ఇని మాట అరామియ బాసదాన్, “నాను” సిల్లిజి “నజి,నాది”, ఇజి అర్లమానిలెకెండ్ యూదురు వెహ్సి మహార్. యేసుప్రబుబా వన్ని వందిజ్ వెహ్సెజ్ యాలెకెండ్ వెహ్సి మహాన్. యాలెకెండ్ వెహ్సెమహివలె నానె క్రీస్తు ఇజి వాండ్రు తినాజ్ వెహ్ఎండ వన్ని వందిజ్ వెహ్సి మహాన్. దానియేలు ప్రవక్త పుస్తకమదు రాస్తి మన్ని దన్నిజ్ తగితిలెకెండ్, వాండ్రు యా పేరు వన్ని వందిజ్ వెహ్సి మహాన్. దానియేలు 7:13-14. యేసుజ్ పగాతికార్ వాండ్రు మాముల్గ వన్ని వందిజ్ ఆహ వెహ్సినాన్ ఇజి ఒడఃబితార్. గాని వన్నిజ్ నమ్మిత్తికార్ వాండ్రె క్రీస్తు ఇజి వెహ్సి మహాన్ ఇజి అర్లం కెత్తార్. † 18:11 18:11 గ్రెక్కు బాసాదు రాస్తిమన్ని ముకెలమాతి పుస్తకమకాజ్ యా మాట మన్నె గాని నెగం పుస్తకమకాజ్ సిల్లెద్ ‡ 18:16 18:16 ద్వితి కాండం 19:15 § 18:17 18:17 యూదురు అతికార్ ఇనిదన్ని వందిజ్బా పన్ను పెర్నివరివెట కూడిజి మన్ఎర్

నుడఃఁఅ.

18 యా బూమి ముస్సు మీరు ఇనిక తొప్పిదెరో, అయాకెజ్ దేవుణు మంజిని బాడ్డిదుబా తోహా ఆనెలె. మరి యా బూమి ముస్సు మీరు ఇనిక కుత్తిదెరో, ఆయాకెజ్ పరలోకామ్ము దేవుణుబా అడ్డు కినాలె. మరి యా బూమి ముస్సు ఇనిదన్నిజ్ సెలవ సీనిదెరో పరలోకామ్దాన్ దేవుణుబా దన్నిజ్ సెలవ సీనాలె ఇజి నాను మిజి నిజం వెప్పిన.

19 మరి ఎయెర్బా రిఎర్కూడఃజి, ఉండ్రె మన్ను కల్లిజి ఇనికబా లొస్తిజ్బా, పరలోకామ్దు మన్ని నా బుబ్బాతి దేవుణు, మీరు కోరిజిని లెకెండ్ర మీ వందిజ్ కినాలె.

20 అహిజు ఎంబె రిపిర్నో, మువర్నో నా పేరుదాన్ కూడఃజి వాజి మహిజు, అబ్బె పరివెట నాను మంజినలె.”

కనికారం తోరిన్ ఇ పణిమనిసి

21 నస్తివలె పేతురు యేసు డగ్రు వాతండ్రె, “నా తబేరి ఒరెన్ నా వెట తప్ప కితిజు నాను ఎసోడు సుట్టు వన్నిజ్ సెమిస్తెజ్? ఎడుః సుట్టు సెమిస్తెజ్ ఆనాదా?”, ఇజి వెన్బాతాన్.

22 యేసు వన్నిజ్, “ఏడు సుట్టు ఆవెద్. డబయ్, సుట్టు ఏడు* ఇజి నాను నిజి వెప్పిన”, ఇజి వెప్టాన్.

23 ఎందానిజ్ ఇహిజు దేవుణు ఏలుబడిః కినిక ఇహిజు, వన్ని పణిమన్సిర్వెట వారు వన్ని బాణిజ్ లొస్తిమన్ని అప్పదిజ్ లెక్క సూణి ఒరెన్ రాజుజ్ పొలిత మనాద్.

24 లెక్క సుడఃదెజ్ మొదోల్స్తి వలె, పది వెయుజ్ తాలందుజ్† అప్ప లొస్తిక మర్జి సిదెజ్ మన్ని ఒరెన్ వన్నిజ్, వన్ని డగ్రు తత్తార్.

25 వన్నిజ్ అప్ప తీరిస్సెజ్ అట్ ఇతిజ్, వన్నిజ్ ని వన్ని ఆల్నిజ్, కొడఃరిజ్, మరి వన్నిజ్ కల్లితి మనికెజ్ విజు పొర్ని అప్ప తీరిన్ అ ఇజి యాజుమాని ఆడ్ర సిత్తాన్.

* **18:22 18:22** నాల్లి వంద తొంబయ్ సుట్టు ఇహిజు ఎస్తివలెబా సెమిసి మండ్రెజ్ ఇజి అర్థం. † **18:24 18:24** ఉండ్రె వెయి తాలందు ఇహిజు వెయి లక్క రూపాయ్ దిజ్ లావ్ మన్నె

26 అయ పణిమణిసి వన్ని ఎద్దు ముణుకుజ్ ఊర్జి మాడిస్తాండ్రె, “నజి సెమిన్అ నజి మరి కండెక్ సమయం సిదా నాను అప్ప విజు మర్జి సీన’ ఇజి బతిమాల్తాన్.

27 అయ ఎజుమాని పణిమణిసి ముస్సు కనికారం ఆజి, నీ అప్ప విజు తెవితాద్ ఇజి వన్నిజ్ సొండ్రెజ్ సెలవ సిత్తాన్.

28 గాని అయ పణిమణిసి వెల్లి వాజి సొన్ని మహివలె, వన్నిజ్ వంద దినారమ్కు‡ అప్ప మని, వన్నివెట కూడేజి పణికిజిని ఒరెన్ వన్నిజ్ సుండేతాన్. వన్నిజ్ అస్తాండ్రె గొతిక పడిసి, “నీను నజి అప్ప మన్ని డబ్బు మర్జి సిదా’, ఇజి బలవంతం కిత్తాన్.

29 వన్నివెట కూడేజి పణికినికాన్ అతి అయ పణిమణిసి వన్ని ఎద్దు ముణుకుజ్ ఊర్జి, “నజి సెమిన్అ, నిజి మరి కండెక్ సమయం సిదా? నిజి సీదెజ్ మన్ని అప్ప విజు నాను మర్జి సీన’, ఇజి బతిమాల్తాన్.

30 గాని వాండ్రు అక ఒప్పకొండేవిండ, అప్పు విజు మర్జి సీనిదాక వన్నిజ్ జేలుదు ఇడిస్తాన్.

31 వరివెట కూడేజి పణికినికార్ సెగొండార్, యా జర్గితిక విజు సుండేతారె నండో బాద ఆతార్. వారు సొన్ని జర్గితిక విజు ఎజుమానిజ్ వెప్తార్.

32-33 నస్తవలె అయ ఎజుమాని వన్నిజ్ కూక్ పిస్తాండ్రె, “మూర్కం మని పణిమణిసి, నీను నజి బతిమాల్తిజ్ నాను కనికారం ఆజి నిజి సెమిసి, నీ అప్ప విజు తెవితాద్ ఇజి నిజి వెహ్తిలెకెండ నీ వెట కూడేజి పణి కిని వన్నిజ్ నీనుబా సెమిసి వన్ని ముస్సు కనికారం తోరిస్తెజ్ గదె?”, ఇజి వెన్ బాతాన్.

34 నస్తవలె అయ ఎజుమాని వన్ని ముస్సు కోపం ఆతాండ్రె వాండ్రు అప్ప విజు మర్జి సీనిదాక వన్నిజ్ హిమ్స కినివరిజ్ ఒపజెప్తాండ్రె జెలిదు ఇడిస్తాన్.

35 మీరు మీ మన్నుదాన్ మీ తంబెరిజువెట సెమిన్ ఏండ మహిజు పరలోకామ్దు మన్ని నా బుబ్బాతి దేవుణుబా యా లెకెండేన్ మీ లోఇ

‡ 18:28 18:28 వంద దినారమ్కు ఇహిజు అయ కాలమ్దు వది రొస్కా పణికిని కూలిదిజ్ నమానం మహాద్.

ఒరెన్ వెట కినాన్.

19

అల్సిజ్ డిఃస్సి సీని వందిజ్

1 యా మాటెజ్ వెహ్తా వీజితి వెనుక యేసు గలిలయ డిఃసి, యోర్దాన్ గడ్డ అతాహా పడక మని యూదయ నాహ్కాజ్ సాహాన్.

2 మంద లోకుర్ వన్ని వెనుక సాహార్. వాండ్రు అబ్బె వరి జబ్బుది వరిజ్ నెగెండ్ కిత్తాన్.

3 సెగొండార్ పరిసయరు, వన్ని మాటెజాణిజ్ వన్నిజ్ తప్ప అస్తైజ్ ఇజి వన్ని డగ్రు వాతారె, “ఇని తప్పబా తోవండ ఒరెన్ వన్ని ఆల్నిజ్ డిఃసి సీనిక దేవుణు మోసెజ్ సిత్తి రూలుజ్ వజ నాయమ్నా?”, ఇజి వెన్బాతార్.

4 వాండ్రు వరిజ్, “ముజాహాన్ దేవుణు లోకురిజ్ తయార్ కితివలె వరిజ్ మొగ్గ కొడొఃని బోదెలి లెకెండ్ తయార్ కిత్తాన్*.

5 అందెజె మొగ్గ కొడొః వన్ని అయ్సి అప్పొసిరిజ్ డిఃసి వన్ని ఆల్ని వెట కూడఃజినాన్. వారు రివర్ ఉండ్రె ఒడొఃల్ ఆనార్.*

6 అందెజె అబ్బెణిజ్ అసి వారు రివర్ ఆవండ ఉండ్రె ఒడొఃల్ ఆన మంజినార్. అందెజె దేవుణు జత కుడుఃప్పి వరిజ్ లోకుర్ కేట కిదెజ్ ఆవద్ ఇజి దేవుణు మాటదు రాస్తి మన్నిక మీరు ఎసెజ్బా సద్విఇతిదెరా?”, ఇజి వరిజ్ వెన్బాతాన్.

7 వారు వన్నిజ్, అక్క అయాలెకెండ్ మహిజ, ఒరెన్ వన్ని ఆల్నిజ్ డిఃస్టైజ్ ఇహిజ, ఉండ్రె విడ్డిః ఆకు రాసి సీజి దనిజ్ డిఃస్టైజ్ ఆనాద్ ఇజి మోసె ఎందనిజ్ ఆడ్ర సిత్తాన్?”, ఇజి వెన్బాతార్.

8 యేసు వరిజ్, “మిజి నస్సొ కటిసమతి మన్ను మహిజ్, మోసె అయ లెకెండ్ సెలవ సిత్తాన్ గాని ముజాహాన్ అసి అయ లెకెండ్ జర్రివ్తాద్.

* 19:4 19:4 ఆది 1:27. * 19:5 19:5 ఆది 2:24.

9 రంకు బూలాతిజ్ఞానె తప్ప మరి ఇనిదని వందిజ్బా ఒరెన్ వన్ని అల్నిజ్ డిసి మరి ఉండ్రి దనిజ్ ఇడె ఆతిజ వాండ్రు దనివెట రంకు బూలానికాన్ ఆజినాన్ ఇజి నాను మిజి వెహ్సిన”, ఇజి వెహ్సాన్.

10 వన్ని సిసూర్ వన్నిజ్, “అల్ని మాసిర్ నడిఃమి సజతిజ్ యాలెకెండ్ మనాద్ ఇహిజ, పెండ్లి ఆవండ మంజినికాదె నెగెద్”, ఇజి వన్నిజ్ వెహ్సాన్.

11 యేసు వరిజ్, “మీరు వెహ్సా మాట విజేరె అస్సెజ్ అట్ఏర్, గాని దేవుణు ఎయెరిజ్ అయ లెకెండ్ సితాండ్రొ వారె కిదెజ్ అట్నార్.

12 సెగొండార్ ఆండెరెజ్* లెకెండ్నె అయ్సి షొటాదాన్ పుట్నార్. సెగొండారిజ్ లోకుర్ ఆండెరెజ్ లెకెండ్ కిజినార్. మరి సెగొండార్ దేవుణు ఏలుబడిః వందిజ్ పెండ్లి ఆవండ వరిజ్ వారె ఆండెరెజ్ ఆజి మంజినార్.

13 నస్తివలె యేసు కికు ఇడ్డి పార్లనం కదెజ్ ఇజి సెగొండార్ ఇజిరి కొడొరిజ్ వన్ని డగ్రు తత్తార్. వన్ని సిసూర్ కొడొరిజ్ తత్తి వరిజ్ జటిజ్ ఆజి గోల కిత్తార్.

14 గాని యేసు, “యా ఇజిరి కొడొరిజ్ నా డగ్రు రపీర్, వరిజ్ అడ్డు కిమాట్. దేవుణు ఏలుబడిః కినిక నినివరిదినె”, ఇజి వరిజ్ వెహ్సాన్.

15 వరి ముస్కు కికు ఇడ్డి పార్లనం కితి వెనుక వాండ్రు అబ్బెనిజ్ సాహాన్.

ఆస్తి మని దజడాఃయెన్.

16 ఇదిలో, ఒరెన్యేసు డగ్రు వాతండ్రె, “ఓ బోదకినికి, దేవుణు వెట ఎలాకాలం మంజిని బత్కుదు నాను మండ్రెజ్ ఇహిజ నాను ఇని నెగ్గి పణిజ్ కిదెజ్”, ఇజి వన్నిజ్ వెన్బాతాన్.

17 యేసు వన్నిజ్, “నెగ్గి పణిజ వందిజ్ ఎండనిజ్ నీను నజి వెన్బాజిని? నెగ్గికాన్ దేవుణు ఒరెండ్రె మనాన్. దేవుణు ఎలాకాలం మంజిని బత్కుదు నీను మండ్రెజ్ ఇహిజ, దేవుణు సితి ఆడ్రెజ్ లోజిజి మన్అ”, ఇజి వెహ్సాన్.

* 19:12 19:12 అండెర ఇహిజ వాండ్రు కొడొః ఇడ్డెజ్ అట్ఇకాన్.

18 వాండ్రు, “ఇని ఆడ్రెజ్?”, ఇజి వన్నిజ్ వెన్బాతిజ్ యేసు వన్నిజ్, “సప్లెజ్ ఆఎద్, రంకు బూలాదెజ్ ఆఎద్, డొజ కిమా, అబద్ధమ్దిజ్ సాస్యం వెహ్మా.

19 అయ్సి అప్పొసిరిజ్ గవ్ రమ్దాన్ నెగెణ్ సుడోఅ. ✱ మరి నీను నిజి ప్రేమిసినిలెకెండే మహివరిజ్ ప్రేమిన్అ” ✱, ఇజి వెహ్మాన్.

20 అందెజె అయ దజడాయెన్, “యాకెజ్ విజు నాను కిజినె మంజిన. మరి ఇనిక నజి తకు మనాద్?”, ఇజి వెహ్మాన్.

21 యేసు వన్నిజ్, “నీను పూర్తి నెగ్గికి ఆడ్రెజ్ కోరితిజ, నీను సొన్ని నిజి కల్గితి మనికెజ్ విజు పొర్ని, బీదాతివరిజ్ సీబాజి సిఅ. ఆహా కితిజ పరలోకామ్దు నిజి ఆస్తి కల్గిజి మంజినాద్. వెనుక నావెట రఅ”, ఇజి వెహ్మాన్.

22 అయ దజడాయెన్ నండో ఆస్తి కల్గిజి మనికాన్ కాక అయ మాట విహండ్రె ఇజిరి మొకొం అతాండ్రె సొహాన్.

23 నస్తివలె వన్ని సిసూర్జ సుడోజి, యేసు”, ఆస్తి మన్నికాన్ దేవుణు కిని ఏలు బడిఁదు సాండ్రెజ్ గొప్ప కన్ఠం ఇజి నాను మిజి నిజం వెహ్మాన్.

24 మరి నాను మిజి వెహ్మాక ఇనిక ఇహిజ, ఆస్తి మనికాన్ దేవుణు ఏలుబడిఁదు సొని దనిజ్ ఇంక, ఒంటె దొపానం బొరొదాన్ డుగ్గనిక సులు ఆనాద్”, ఇజి వెహ్మాన్.

25 సిసూర్ యా మాట విహారె నండో బమ్మ అతారె, “దేవుణు రక్సిస్తి లెకెండే ఎయెన్ మండ్రెజ్ అట్నార్?”, ఇజి వెహ్మార్.

26 యేసు వరిజ్ సుడోజి, “యాక లోకాజ్ అట్ఇకాదె, గాని దేవుణు విజు కిదెజ్ అట్నాన్”, ఇజి వెహ్మాన్.

27 పేతురు వన్నిజ్ సుడోజి, “ఇదిలో మాపు విజు డిస్తాపె నీ వెట వాజినావ్, మజి ఇనిక దొహ్కాద్లు?”, ఇజి వెన్బాతాన్.

28 యేసు వరిజ్, “యా లోకం మరి కొత్తాక ఆనివెలె లోకు మరిసి ఆతి నాను గొప్ప జాయ్మని గొప్ప సింహాసనమ్దు బసి ఇస్రాయేలుది

✱ 19:19 19:19 నిగ్గమ 20:12-16; ద్విత్తి 5:16-20. ✱ 19:19 19:19 లేవి 19:18.

పన్నెండు తెగ్గాతివరిజ్ తీర్పు తీరిస్సివెలె, నా వెనుక వాతి మీరుబా, నావెట పన్నెండు గొప్ప సింహానమ్కాజ్ బసి వరిజ్ తీర్పు కినిదెర్లె.

29 మరి ఎయెర్బా నా వందిజ్ వరి ఇల్లుజొల్లు, అన్నతంబెరిజబ, బీబి తజిసికజ్బా, అయ్సి అప్పొసిరిజ్బా, బూమిపుట, కొడొకొక్కరిజ్బా డిస్తి సతిజ నినివరిజ్ యాకెజ్ వంద వందుజ్ దొహ్కాన్. దన్నివెట ఎలాకాలం మంజినిబత్తుబా దొహ్కాన్.

30 గాని మొదొహికార్ ఇజి ఒడ్డిబిని నండొండార్ కడెవెర్దికార్ ఆనార్. కడెవెర్దికార్ ఇజి ఒడ్డిబిని నండొండార్ మొదొహికార్ ఆనార్లె.

20

ద్రాసటోటాదు పణికినికార్

1 “దేవుణు ఏలుబడిః కినిక ఇహిజ, వన్ని ద్రాసటోటాదు పణికిదెజ్ పణికిని వరిజ్ కూకెజ్ పెందాల నిజ్జి వెల్లి సొన్ని మహి ఉండ్రి టోట యెజమానిజ్ పొలిత మనాద్.

2 ఉండ్రి రోజు పణిదిజ్ ఉండ్రి దినారం* కూలి సీన ఇజి ఒప్పకొటండె, వన్ని ద్రాక్కు టోటాదు పణి కిదెజ్వరిజ్ పొక్తాన్.

3 వెనుక అంబెలి వేలాదు వాండ్రు వెల్లి సొహివలె సత్తాదు ఇని పణి సిల్లెండ నిహిమని సెగొండొరిజ్ సుడఃతాన్.

4 వాండ్రు వరిజ్, “మీరుబా నా ద్రాక్కుటోటాదు పణిదిజ్ సొండ్రు, మిజి సరియాని కూలి సీన”, ఇజి వెహ్తాన్.

5 వారు సొహార్. మరి వాండ్రు పన్నెండు గంటెజ, మూండ్రి గంటెజబా ఆహె కితాన్.

6 మరి అయ్దు గంటెజ సొహిజ్ మరి సెగొండొర్కాలి నిహిమనివరిజ్సుడఃతాన్. వాండ్రు వరిజ్, “యా దినం విజు ఎందనిజ్ మీరు ఇబ్బె సెడ్డిసె నిహిమహిదెర్?”, ఇజి వెన్బాతాన్.

7 వారు వన్నిజ్, “ఎయెర్బా ఇని పణిదిజ్బా మజి కూక్వెతార్, అందెజె”, ఇజి వెహ్తార్. వాండ్రు వరిజ్ “మీరుబా నా ద్రాస టోటాదు పణిదిజ్ సొండ్రు”, ఇజి వెహ్తాన్.

* 20:2 20:2 అయ కాలమ్దు ఉండ్రి రోజు పణిదిజ్ కూలి ఉండ్రి దినారం మహాద్.

8 పొదు ఆతివెలె అయ ద్రాస టోట ఎజుమాని పణి సూణి వన్నిజ్ కూక్తాండ్రె, “పణికినివరిజ్కూక్కి, కడఃవేరి వాతివరిబాణిజ్ మొదొల్ని ముందాల వాతికార్ దాక వరిజ్ కూలి సిఅ”, ఇజి వెహ్హాన్.

9 పొద్దు డిగ్గివలె పణిదిజ్ వాతివరిజ్ ఒరెన్ ఒరెన్ వన్నిజ్ ఉండ్రీ దినారం కూలి దొహ్క్తాద్.

10 ముందాల వాతికార్ మజి లావ్ దొహ్క్తె, ఇజి ఒడఃబితార్ గాని వరిజ్బా ప్రతి ఒరెన్ వన్నిజ్ ఉండ్రీ దినారమ్ నె కూలి దొహ్క్తాద్.

11 అయాక దొహ్క్తివెలె వారు టోట ఎజుమానిజ్ ఎద్దు మొరొ ఆతార్.

12 వారు, “కడఃవెరిదు వాతికార్ ఉండ్రీ గంటనె పణి కిత్తార్ గాని వెలార్ కస్టబడఃజి విజు పణి కితిమని మజి ఎందనిజ్ నీను వరిజ్ సమాసం కితి?”, ఇజి వెన్బాతార్.

13 వాండ్రు వరి లొఇ ఒరెన్ వన్నిజ్, “బయి, నాను మిజి ఇని అనెయం కివిత. ఉండ్రీ దినారమ్దిజ్ పణి కిన ఇజి మీరు ఒపుకొటిదెర్ గదె?”

14 మీ కూలి అసి మీరు సొండ్రు. మిజి సితి లెకెండ కడఃవెరిదు వాతివన్నిజ్బా సీదెజ్ నజి ఇస్టం ఆతాద్.

15 నా డబుదాన్ నజి ఇస్టమాతి లెకెండ కిదెజ్ నజి అక్కు సిలెదా? నాను వరిజ్ ఓదరిసి సితి వందిజ్ నీను గోస ఆజినిదెర్?”, ఇజి వెన్బాతాన్.

16 అయా లెకెండనె కడఃవెరిదికార్ ఇజి ఒడఃబిజినికార్ మొదొహికార్ ఆనార్, ముందాహికార్ ఇజి ఒడఃబినికార్ కడఃవెరిదికార్ ఆనార్.”

యేసు వన్ని సాపు వందిజ్ మరి వెహ్హినాన్.

17 యేసు యెరూసలేమ్దు సొన్ని మహివలె, వాండ్రు వన్ని పన్నెండ్రు మణిసిర్ సిసురిజ్ ఉండ్రీ పడఃకాదు కూక్త ఒతాండ్రె వరిజ్ ఈహు వెహ్హాన్.

18 ఇదిలో మాటు యెరూసలేమ్దు సొన్నినాట్. అబ్బె లోకుమరిసి ఆతి నాను పెరి పుజెరిజ, యూదురి రూలుజ్ నెస్పిన్ని వరిజ్ ఒపజెపె ఆనాలె. వారు నజి సాపుదిజ్ సిక్స సీనార్లె.

19 మరి వారు నజీ వెకస్తి, కొర్డేజాణిజ్ డెయ్జి, సిలువ పోక్తజ్ యూదురు ఆఇ వరిజ్ బపజెప్పార్లె. మూండ్రి రోస్కాజ్ నాను మర్జి నిక్కాన్లె.”

20 నస్తివలె జెబెదెయి మరిసిర్ అయ్సి వరి వెట యేసు డగ్రు వాతాదె ముణుకుజ్ ఊర్జి మాడిసి, “సాయం కిఅ”, ఇజి వెప్టాద్.

21 “నీను ఇనిక కోరిజిని?”, ఇజి వాండ్రు వెప్టాన్. అందెజె అది, “నీను రాజు వజి ఏలుబుడిః కినివెలె, యా నా రిఎర్మరిసిర్ ఒరెన్ నీ ఉణెర్ పడఃకాదుని ఒరెన్ నీ డేబ్ర పడఃకాదు బసి మండ్రెజ్ ఇజి నాను కోరిజిన”, ఇజి వెప్టాద్.

22 యేసు, “నీను ఇనిక వెన్బాజినాదొ ఇజి నిజీ తెలివద్”, ఇజి వెప్టాండ్రె వరిజ్, “నాను ఉండెజ్మని గినాదిక ఉండెజ్మీరు అట్నిదెరా?”, ఇజి వెప్టాన్. వారు, “మాప్ ఉండెజ్ అట్నాప్”, ఇజి వెప్టార్.

23 యేసు వరిజ్, “తప్వండ నాను ఉణి గినాదిక మీరు ఉణిదెర్, గాని నా ఉణెర్ పడఃకాదుని డేబ్ర పడఃకాదు బసి కిబిస్సిక నా కీదు సిల్లెద్, నా బుబ్బు కియుదాన్ ఎయేరిజ్ తయార్ కిత మనాండ్రొ వరిజ్ అక్కెజ్ దొహ్క”, ఇజి వెప్టాన్.

24 మహి పది మస్సిర్ సిసూర్ వరి అయ్సి యేసుజ్ లొస్తి అయ మాట విహారి రిఎర్ ముస్కు కోపం ఆతార్.

25 యేసు వరిజ్ విజేరిజ్ కూక్తాండ్రె వరిజ్, “యూదురు ఆఇవరి రాజుర్ వరి లోకుర్ ముస్కు అతికారమ్దాన్ మంజినార్. వరి పెరి అదికారిజు వరిజ్ మని అతికారమ్దాన్ లోకురిజ్ అణసు తిగిజినార్ ఇజి మీరు నెస్సిదెర్ గదె?

26 గాని మీరు వారు లెకెండ్ మండ్రెజ్ ఆవెద్. గాని మీ లొఇ ఎయెర్బా పెరికాన్ ఆదెజ్ ఇహిజ, వాండ్రు మిజి పణిమన్ని ఆదెజ్వెలె.

27 మరి ఎయెన్బా విజేరె ముస్కు పెరికాన్ఆదెజ్ ఇజి కోరిజినికాన్, వాండ్రు మిజి విజేరిజ్ వెటి పణికి వనిలెకెండ్ ఆజి మండ్రెజ్.

28 ఎలాగ ఇహిజ లోకు మరిసి ఆతి నాను, విజేరె నజి పణి కిపీర్ఇజి నాను రెవతా, గాని పణి కిదెజె వాత మన్ను. మరి నండొండారిజ్

బత్ కిస్టెజ్, వరిజ్ విడుఃదల కిదెజ్ వరి వందిజ్ నా పాణం సీదెజె నాను వాత మన”, ఇజి వెహ్లాన్.

గుడిఃదికార్ సుడఃజినార్

29 యేసుని వన్ని సిసూర్ యెరికో పట్టుమ్ దాన్ సొన్ని మహిజ్, నంఠో లోకుర్ వన్ని వెనుక సొహార్.

30 ఇదిలో సరిపడకాదు బస్తిమని రిఎర్ గుడ్డిదికార్, యేసు అయా సరిదాన్ సొన్నినాన్ ఇజి వెహారె, “ప్రబువా, దావీదు మరిసి, మా ముస్సు కనికారం తోరిస్ అ”, ఇజి డేల్ సి వెహ్లాన్.

31 లోకుర్ వరిజ్” పలక్ మండ్రు’ ఇజి గోల కిత్తార్. గాని వారు, “ప్రబువా, దావీదు మరిసి మా ముస్సు కనికారం ఆ అ”, ఇజి మరి ఒదె డేల్సి వెహ్లాన్.

32 యేసు నిహండ్రె వరిజ్ కూక్తాన్. “నాను మిజి ఇనిక కిదెజ్ ఇజి మీరు కోరిజినిదెర్?” ఇజి వరిజ్ వెన్ బాతాన్.

33 “ప్రబువా మా కణ్కు సూణి లెకెండ్ కి అ”, ఇజి వారు వెహ్లాన్.

34 యేసు వరి ముస్సు కనికారం ఆతాండ్రె వరి కణకాజ్ ముట్టాన్. వెటనె వారు సుడఃదెజ్ అట్టారె వన్ని వెట సొహార్.

21

ఓసన్న

1-2 వారు యెరూసలేము అందిని ముంజాల, ఒలివ మరెక్ మని గొరొన్ ముస్సు మని బెత్ పాగె ఇని నాటో వాతార్. వాతిజ్ యేసు వన్ని సిసూర్ రివిరిజ్ కూక్తాండ్రె ఈహు వెహ్లాన్. “మీ ఎద్రు మని నాటో సొండ్రు. అందితిజ సరి, తొహ్తి మన్ని ఉండ్రీ గాడఃదెజ్ ని దనివెట మని గాడఃదె పిలాదిజ్ బా మీరు సూణిదెర్. వనకాజ్ కుత్సి నా డగ్రు పేర్ జి తగాట్.

3 ఎయెన్ బా మిజి ఇనిక బా వెన్ బాతిజ వనకాజ్ ప్రబుజ్ కావాలి ఇజి వన్నిజ్ వెహ్లా. వెటనె వాండ్రు వనకాజ్ మీ వెట పొక్తార్.”

4-5 “ఇదిలోన్ గాడఃదె ముస్సు ఎక్కి, సార్ లిదాన్ నీ రాజు వాజినాన్. గాడఃదె పిల్ల ఆతి ఇజిరి గాడఃదె ముస్సు ఎక్తాండ్రె, నీ డగ్రు

వాజినాన్ ఇజి సీయోను గాల్చి* ఆతి దనిజ్ వెప్తు”, ఇజి దేవుణు ప్రవక్తవెట* దేవుణు ముజాల వర్గితి మాటెజ్ పూర్తి ఆదెజ్ యాకెజ్ జర్గితె.

6 యేసు వరిజ్ వెప్తి వజనె సిసూర్ సాహారె క్రిత్తార్.

7 వారు గాడెదెని దని పిలదిజ్ తత్తార్. వన్నాజ్ ముస్సు వరి సాల్వెజ్ పప్తిజ్, యేసు దని ముస్సు బస్తాన్.

8 నండొండార్ వరి సాల్వెజ్ సరి అందు పప్తార్. మరి నండొండార్ మరెకాణి కొమెజ్ కత్సి సరి అందు పప్తార్.

9 మంద లోకుర్ వన్ని ముందాల సొన్ని మహికార్, వన్ని వెనుక వాజి మహికార్, “దావీదు మరిసిజ్ ఓసన్న†! ప్రబు సిత్తి ఆతికారమ్దాన్ వాజినికాన్ పొగడెః ఆనికాన్ పరలోకమ్దు దేవుణుదిజ్ ఓసన”, ఇజి వారు డెల్చి మహార్.

10 యేసు యెరుసలేం పట్టమ్దు వాతిజ్, లోకుర్ విజెరె “వాండ్రు ఎయెన్?”, ఇజి బమ్మ ఆతారె ఒరెన్ మరి ఒరెన్ వెట వర్గిజి మహార్.

11 “వీండ్రు గలీలయదు మన్ని నజరేతు ఇని నాటోణి ప్రవక్త ఆతి యేసు”, ఇజి వన్ని వెట మహి అయ మంద లోకుర్ వెప్తార్.

యేసు దేవుణు గుడిడు సొన్నినాన్.

12 యేసు దేవుణు గుడిః లోఇ సాహండ్రె, అబ్బె గుడిః అరీబుదు మహి కొణి వరిజ్ పొర్చి వరిజ్ విజెరిజ్ వెల్లి పొక్తాన్. డబ్బు మారిసిని వరి బల్లెజ్చిని పాపుర పొటిజ పొర్చివరి పీటెజ్ మప్తా విసీర్తాన్.

13 వాండ్రు వరిజ్, “నా ఇలు పార్దనం కిని ఇలు ఇజి కూకె ఆనాద్లె, ✱ ఇజి దేవుణు మాటదు రాస్త మనాద్ గాని మీరు దనిజ్ డొజారిజ

* 21:4-5 21:4-5 యెరుసలేం పట్టమ్దిజ్ సియోను పట్టుం ఇజిబా పేరు మహాద్ ఎందానిజ్ ఇహిజ అయ పట్టుం సియోను గొరొన్ ముస్సు తొప్తి మహాద్. అమదెజి సియోను గాల్చి ఇజి వెప్పివలె యెరుసలేం పట్టమ్ది వరిజ్ గుర్తు కిజి వెప్పిమహార్ వారు ఇహిజ ఇస్రాయేలు లోకుర్ గుర్తు. ✱ 21:4-5 21:4-5 జెకరి 9:9. † 21:9 21:9 అరామియ బాసాదు ఓసన్న ఇని మాటదిజ్ మజి ఏలు రక్సీన్అ ఇజి అర్దం మనాద్. గాని లోకుర్ పొగడెఃదిజ్ మరి ఎయెన్బా పెరికాన్ వానివలె వరిజ్ కూక్చి ఒనిలెకెండ్బా వెప్పిమహార్.

✱ 21:13 21:13 యెసయ 56:7.

సాలం* లెకెండ్ కితి మనిదెర్”, ఇజి వెహ్లాన్.

14 గుడ్డిదికార్, సొటాదికార్ దేవుణు గుడిడు వన్ని డగ్రు వాతిజ్ వాండ్రు వరిజ్ నెగెండ్ కితాన్.

15 గాని వాండ్రు కితి బమ్మాతి పణిజ సుడేజి, దేవుణు గుడి అరజుదు మని కొడోర్, “దావీదు మరిసిజ్ ఓసన్న”, ఇజి డేల్నినిక విహారె, పెరి పుజెరిజుని, యూదురి రూలుజ్ నెస్పిస్సికార్ నండో కోపం ఆతార్.

16 వారు వన్నిజ్, “యా కొడోర్వెహ్నినిక ఇనిక ఇజి నీను వెంజినిదా?”, ఇజి వెన్బాతార్. యేసు వరిజ్, “ఓ వెంజిన, కొడోర్ని ఇజిరి కొడోరి వెయుదాన్ నీను పొగ్డిజిని మాటెజ్ తయార్ కితి మన్ని* ఇజి దేవుణు మాటదు రాస్తి మనిక మీరు ఎసెజ్బా సద్విఇతిదెరా?”, ఇజి వెహ్లాన్.

17 వాండ్రు వరిజ్డిసి పట్నమ్దాన్ వెల్లి సొహండ్రె బెతానియ ఇని నాటో సొన్ని అయ రయ్దు అబ్బె మహాన్.

బొడెమరాన్ వహ్నినాద్

18 పెందల వాండ్రు మర్జి పట్నమ్దు సొన్ని మహిజ్ వన్నిజ్ బజ కట్టాద్.

19 సరి పడకాదు మని ఉండ్రె బొడెమరాన్ సుడేజి, మరాన్ డగ్రు వాతండ్రె సుడేతిజ్ ఆకుజ్ తప్ప మరి ఇనికెజ్ తోర్ఉతె. వాండ్రు దనిజ్ సుడేజి, “మరి ఎసెజ్బా నీను కాయెజ్ అస్ఇలె”, ఇజి వెహ్లాన్. వెటనె బొడెమరాన్ వహ్లా సొహాద్.

20 సిసూర్ అక్క సుడేతారె బమ్మ ఆతార్, “నిస్సా బేగి బొడెమరాన్ ఎలాగ వహ్లా సొహాద్?”, ఇజి వారు వర్గితార్.

21 యేసు వరిజ్, “నాను మిజి నిజం వెహ్నిన, మిజి నమకం మంజి, మీ లోఇ అనుమానం సిల్లెండ మహిజ, యా బొడెమరాన్దిజ్ కితికదె ఆవండ, యా గొరొతిజ్ సుడేజి”, నీను ఇబ్బెణిజ్ పెరె ఆజి సమ్దారమ్దు సొన్ని అర్అ’ ఇజి వెహ్నిజ అయవజనె జర్గినాద్లె.

* 21:13 21:13 యిర్మీయా 7:11. * 21:16 21:16 క్రిస్ట 8:2.

22 మిజీ నమకం మహిజ మీరు పార్దనం కిజి ఇనిక లొస్సిదెరో, అయాక మిజీ దొహ్కాద్లె”, ఇజి వెహ్తాన్.

23 యేసు దేవుణు గుడిఁదు సొహండ్రె గుడిఁ అర్జుదు బోదకిజి మహివలె, పెరి పుజెరిజుని లోకుర్ పెద్దెల్జ వన్ని డగ్రు వాతారె, “ఇని అతికారమ్దాన్ నీను యా పణిజ్ కిజిని? ఎయెర్ నిజి యా అతికారం సిత మనార్?”, ఇజి వన్నిజ్ వన్బాతార్.

24 యేసు వరిజ్, “నానుబా మిజీ ఉండ్రె మాట వెన్బాన. అయాక మీరు నజి వెహ్తాజ ఇని అతికారమ్దాన్ నాను యా పణిజ్ కిజిన ఇజి నానుబా మిజీ వెహ్నా.

25 బాప్తినం సీని యోహనుజ్, బాప్తినం సీదెజ్ మని అతికారం ఎంబెణిజ్ వాతాద్ దేవుణుబాణిజ్నా, సిల్లిజ లోకుర్ బాణిజ్నా?”, ఇజి యేసు వరిజ్ వెన్బాతాన్. “దేవుణుబాణిజ్ వాతాద్’ ఇజి మాటు వెహ్తాజ, మరి ఎందానిజ్ మీరు వన్నిజ్ నమ్మిఇతిదెర్? ఇజి మజీ వెన్బానాన్.

26 గాని, యోహను ఒరెన్ దేవుణు ప్రవక్త ఇజి లోకుర్ విజేరె నమిజినార్. అందెజె లోకుర్ బాణిజ్ వాతాద్’ ఇజి వెహ్తాజ్ మజీ తియెల్నె, ఇజి వరి లొఇ వారె వర్గితార్.

27 అందెజె వారు, “మజి తెలివీద్”, ఇజి యేసుజ్ మర్జి వెహ్తార్. నస్తవలె వాండ్రు, “ఇని అతికారమ్దాన్ యా పణిజ్ కిజిన ఇజి నానుబా మిజీ వెహ్ఎ”, ఇజి వరిజ్ వెహ్తాన్.

రిఎర్ మరిసిర్ కత

28 “దిన్నివందిజ్ మీరు ఇనిక ఒడఁబిజినిదెర్? ఒరెన్వన్నిజ్ రిఎర్ మరిసిర్ మహార్. వాండ్రు పెరివన్ని డగ్రు సొహండ్రె, “మరిన్, నేండ్రు నీను ద్రాక్కు టోటాదు సొన్ని పణి కిఅ”, ఇజి వెహ్తాన్.

29 వాండ్రు, “నాను సొన్ఎ, ఇజి మర్జి వెహ్తాన్. గాని వెసుక మన్ను మారిస్తాండ్రె సొహన్.

30 నస్తవలె అప్పొసి, కొగ్రిమరిసి డగ్రు సొహండ్రె అయా వజనె వెహ్తాన్. వాండ్రు, ఒబా, నాను సొన”, ఇజి వెహ్తాన్ గాని సొన్ఎతాన్.

31 “యా రిఎర్ మరిసిర్ లొఇ అప్పొసి వెప్తి వజ కితికాన్ ఎయెన్?”, ఇజి యేసు వరిజ్ వెన్బాతాన్. వారు, “పెరికాండ్రె”, ఇజి వెప్టార్. యేసు వరిజ్ “వన్ను పెర్నికార్ని సానిదికెజ్ మిజి ఇంక ముజాల దేవుణు కిని ఏలుబడిఃదు సొనార్లె ఇజి నాను మిజి నిజం వెప్పొన.

32 ఎందనిజ్ ఇహిజు యోహాను వాతాండ్రె, నీతి నిజాయిద్దాన్ బత్తిదెజ్ ఇజి మిజి సరి తోరిస్తాన్ గాని మీరు వన్నిజ్ నమిఇతిదెర్. వన్ను పెర్నికార్ని సానిదికెజ్ వన్నిజ్ నమ్మితార్. అయాకెజ్ సుడఃతిజ్బా మీరు మన్ను మరిసి మీరు కితి తప్పజ్ ఒప్పకొడిఃజి డిఃసి సీజి వన్నిజ్ నమిఇతిదెర్”, ఇజి వెప్టాన్.

పాలి సీతి టోట కత

33 “మరి ఉండ్రె కత విండ్రు. బూమి మనికాన్ ఒరెన్ ఉండ్రె ద్రాసటోట ఉణుస్తాన్. దని సుటులం కోట తొప్టాన్. ద్రాక్స పట్టు రసం లాగ్దెజ్ ఉండ్రె గానుగు తయార్ కిబిస్తాన్. కాప్కిదెజ్ ఉండ్రె ఎత్తుమని ఇలుబా తయార్ కితాన్. వెనుక అయ ద్రాక్స టోట నెగొండార్ రయ్తురిజ్ పాలిదిజ్ సితాండ్రె పయనం కిజి మరి ఉండ్రె దేసెం సొహాన్.

34 పట్టు, వండ్రె కాలమ్దు వన్ని వంతుజ్ లొస్తెజ్ ఇజి వన్ని పణి మన్నిరిజ్ పాలి అస్తి మని వరి డగ్రు పొక్టాన్.

35 పాలి అస్తిమనికార్ వన్ని పణి మన్నిరిజ్ అస్తారె ఒరెన్ వన్నిజ్ డెయ్తార్, ఒరెన్ వన్నిజ్ సప్టార్, మరి ఒరెన్ వన్నిజ్ పణకాణిజ్ డెయ్తార్.

36 మరి, వాండ్రు ముజాల పొక్తివరిజ్ ఇంక నండొండార్ పణిమన్నిరిజ్ పొక్టాన్. వరిజ్బా పాలి అస్తిమనికార్ అయావజనె కితార్.

37 “నా మరినిజ్ పొక్తిజు వన్నిజ్ వారు గవరం సీనార్లె”, ఇజి వెప్టాండ్రె కడఃవెరిదు వన్ని మరిసిజ్ వరి డగ్రు పొక్టాన్.

38-39 గాని పాలి అస్తిమనికార్ మరిసిజ్ సుడఃతారె, “వీండ్రు యా తోటాదిజ్ అకు మనికాన్, రదు, మాటు వినిజ్సప్పి యా టోట మా

సొంతదిక కినాట్”, ఇజి వన్నిజ్ అసి ద్రాక్కు తోటదిజ్ వెల్లి విసిర్తారె వన్నిజ్ సప్తార్.

40 అందెజె అయా ద్రాస టోట ఎజమాని వానివలె అయ పాలి అస్తిమనివరిజ్ ఇనిక కినాన్? ఇజి వెన్బతాన్.

41 “అయా సెఇవరిజ్ నండొ కటిసమతి సావుదాన్ సప్తాన్. మరి పట్టు పండ్లి కాలమ్దు వన్నిజ్ సరియాతి వందుజ్ సీని రెయ్దురిజ్ ద్రాస టోట పాలిదిజ్ సీనాన్”, ఇజి వారు వెప్తార్.

42 యేసు వరిజ్, “ ‘ఇలు తొహ్పికార్ నెక్తి పొక్తి పణుకునె, మూలాదిజ్ బుర్ర పణకు ఆత మనాద్. యాక దేవుణు కీదాన్ జర్గితిక. యాక మా కణకెజు బమ్మాతిక’, ఇజి దేవుణు మాటదు రాస్తి మనిక మీరు ఎసెజ్బా సద్విఇతిదెరా?”.

43 అందెజె దేవుణు ఏలుబడిః కినిక మీ నడిఃమిహాన్ లాగ్గి దనిజ్ తగితి పట్టు సీని వరిజ్ సీనాన్”, ఇజి నాను మిజి వెప్సాన్.

44 ఎయెన్బా యా పణకు ముస్సు అర్తిజు వాండ్రు ముకెజ్ ఆనాన్. యా పణకు ఎయెన్ ముస్సు అర్నాదొ వాండ్రు గుండ ఆనాన్”, ఇజి యేసు కత వెప్సా వీజితాన్.

45 యేసు వెప్సా కతెజ్ విహారె పెరి పుజెరిజుని పరిసయ్దు, వరి వందిజె వాండ్రు వెప్సా మనాన్ ఇజి అర్దం కితార్.

46 వారు వన్నిజ్ కయ్దు కిదెజ్ ఉండ్రీ ఉపాయ్ సుడఃతార్ గాని లోకుర్ విజెరె వన్నిజ్ ఒరెన్ ప్రవక్త ఇజి నమ్మితి వందిజ్ లోకురిజ్ తియెలాతార్.

22

పెండ్లివిందు

1 యేసు మరి కతవజు వరిజ్ వెప్తాన్

2 “దేవుణు కిని ఏలుబడిః ఇహిజు వన్ని మరిసి పెండ్లిదిజ్ విందు తయార్ కితిమని ఒరెన్ రాజుజ్ పొలిత మనాద్.

3 పెండ్లి విందుదిజ్ రదు ఇజి ముజాల వెహ్తా మహివరిజ్ కూక్కి తగాట్ ఇజి వాండ్రు వన్ని పణిమన్నిరిజ్ వరి డగ్రు పోక్తాన్. గాని వాదెజ్ ఒప్ ఏతార్.

4 నస్తవలె వాండ్రు మరి సెగొండార్ పణిమన్నిరిజ్ బా పోక్తాండ్రె, “పెండ్లి విందుదిజ్ రదు”, ఇజి ముజాల వెహ్తా మహివరిజ్, “నాను కోడ్డిజ్, బలస్తి పడెజ్ ఒహ్ పిసి విజు తయార్ కిత మన. పెండ్లి విందుదిజ్ మీరు రదు ఇజి వరిజ్ వెహ్తా”, ఇజి వరిజ్ వెహ్తాన్.

5 వారు పణిమన్నిరి వెహ్తా మాటదిజ్ కండెకబా లన్యం కివిండ, ఒరెన్ వన్ని మడిజు సాహాన్ మరి ఒరెన్ వన్ని బేరమ్దిజ్ సాహాన్.

6 మహికార్ వన్ని పణిమన్నిరిజ్ అస్తారె మర్యాద లాగ్గి సప్తార్.

7 అయ రాజు నండో కోపం ఆతాండ్రె వన్ని సయ్ నమ్దిజ్ పోక్కి వన్ని పణిమన్నిరిజ్ సప్తివరిజ్ కతిస్తాండ్రె, వరి పట్టుమ్దిజ్ సిసుదాన్ ముటిస్తాన్.

8 వెనుక వాండ్రు పెండ్లి విందు తయార్ అత మనాద్, వన్ని పణి మన్నిరిజ్, “గాని ముజాల పెండ్లి విందుదిజ్ కూకెఆతి మహికార్ విందుదిజ్ వాదెజ్ తగ్గికార్ ఆవర్.

9 మీరు రస్త సహ్ కాజ్ సాన్ని మిజి తోరినివరిజ్ విజేరిజ్” విందుదిజ్ రదు’ ఇజి కూక్తు”, ఇజి వెహ్తాన్.

10 అయ పణిమన్నిరి రస్త సహ్ కాజ్ సాహారె వరిజ్ తోరితి నెగ్గివరిజ్, సెఇవరిజ్ కుడుప్పి, వరిజ్ తత్తెజ్ అట్టివరిజ్ విజేరిజ్ తత్తార్. పెండ్లి విందు సమ్డ నిండ్రితాద్.

11 నస్తవలె పెండ్లి విందుదిజ్ వాతివరిజ్ సుడెదెజ్ రాజు వాతాన్. పెండ్లిసాక్క తోడుగివిండ పెండ్లి విందుదిజ్ అబ్బె బస్తమని ఒరెన్ వన్నిజ్ సుడెతాన్.

12 రాజు వన్నిజ్, “ఓ, కూలాయెన్, పెండ్లిసాక్క తోడుగివిండ నీను ఎలాగ లొఇ వాతి?”, ఇజి వెన్ బాతాన్. వాండ్రు వర్గివిండ ఆలేత మహాన్.

13 నస్తవలె రాజు, “వినిజ్ కిక్కుకాల్కు తోహ్ని వెల్లి దూరమ మన్ని సీకటి బాడిడు విసీర్దు. అబ్బె వాండ్రు ఎలాకాలం అడెబాజి, పల్కు.

కొహ్నాక్కిక మంజినాన్”, ఇజి వన్ని పణి మన్నిరిజ్ వెహ్హోన్.

14 “కూకె ఆతికార్ నండొండార్ గాని, ఎరై ఆతికార్ కొకొండారె.”

కయిసరిజ్ పను సీని వందిజ్

15 నస్తివలె పరిసయరు వెల్లి సొన్ని వాండ్రువర్గిని మాటదాన్ యేసుజ్ తప్ప అస్తైజ్ ఇజి కుట్ట ఆజి మహార్.

16 వారు పరి సిసూరిజ్, హేరోదియరు* జటుదివరివెట యేసు డగ్గు పొక్తార్. వారు సొన్ని, “బోద కినికి, నీను, మన్ను కద్దిఏండ దేవుణు సరివందిజ్ నిజమ్దాన్ బోదిసిని నెగ్గికి ఇజి మాపు నెస్నాప్. నీను లోకురి ఎలాగ మర్దికార్ ఇజి మొకొ సుడొజి వరిజ్ సర్ద కిబిస్తైజ్ ఇజి వర్గినికి ఆఇ.

17 అహిజ కయ్సరుజ్ పను సీనిక నాయమా? నీను ఇనిక ఒడొబిజిని? మజి వెహాఅ”, ఇజి వన్నిజ్ వెహ్హోన్.

18 యేసు పరి సెఇ బుద్దిదిజ్ నెస్తాండ్రె, “వేసం కినికిదేరా! ఎండనిజ్ నాను వహ్ని మాటదాన్ నజి అస్తైజ్ సుడొజినిదెర్?

19 పన్ను సీని ఉండ్రీ కాసు నజి తోరిస్తు”, వారు ఉండ్రీ దినారం వన్ని డగ్గు తతార్.

20 “దిని మున్ను మని బొమ్మ ఎయెర్ది? రాస్తిమని రాంత ఎయెర్ది?”, ఇజి వాండ్రు వరిజ్, వెన్బాతాన్.

21 వారు, “కయిసరుది”, ఇజి వెహ్హోన్. నస్తివలె వాండ్రు, “కయిసరుది కయ్సరుజ్ సీదు, దేవుణుది దేవుణుదిజ్సీదు”, ఇజి వరిజ్ వెహ్హోన్.

22 యా మాట వెంజి బమ్మ ఆతారె వారు వన్నిజ్ డొస్త సొహార్.

23 సాతికార్ మర్జి నిజ్నిక సిల్లెద్ ఇజి సదుకయరు వెహ్నినార్. వారు అయా రోజుదునె వన్నిడగ్గు వాజి ఈహు వెన్బాతారె.

* **22:16 22:16** హేరోదియరు జటుదికార్ రోమదికార్ యూదురు మున్ను కిని ఏలుబడిదిజ్ ఇస్టం కిత్తి యూదురు ఆతికార్. పరిసయరిజ్ని హేరోదియరిజ్ ఇని పొత్తు సిల్లెద్. గాని లోకురి యెసుప్రుబుజ్ ఇస్టమానిదన్నిజ్ తియెలాజి మహార్.

24 “బోదకినికి, ఒరెన్ కొడోర్ సిల్లెండ సాతిజ వన్ని తంబెరి సాతివన్ని ఆల్నిజ్ పెండ్లి ఆజి సాతివన్ని వందిజ్ కొడోర్ పుటిస్తెజ్ వలె ఇజి మోసె రాస్తి సీతి రూలుదు మనాద్.

25 మా నడిఃమి ఏడు గురు తంబేర్జు మహార్. పెరికాన్ పెండ్లి ఆతాండ్రె సాతాన్. వన్నిజ్ కొడోర్ సిల్లెర్ కక వన్ని తంబెరి సాతివన్ని ఆల్నిజ్ ఇడెః ఆతాన్.

26 నడిఃపి వాండ్రుని కొగ్రి నడిఃపి, అయా లెకెండెనె వీన్ కొడోఃదాక విజేరె దనిజ్ పెండ్లి ఆజి సాతార్.

27 కడెవేరిదు అయా బోదెల్ బా సాతాద్.

28 అహిజ సాతి వరిబాణిజ్ మర్జి నిజ్ ని వెలె యా ఏడుగురు లోఇ ఎయెరిజ్ అది ఆల్ని ఆనాద్ లె? ఇనిక ఇహిజ బత్తిజి మహివలె అది ఏడుగురుదిజ్ బా ఆల్ని ఆత మహాద్ గదె?”, ఇజి వెన్ బాతార్.

29 యేను వరిజ్, “దేవుణు మాట ఇజి, మీరు నెన్ ఇదెర్ దేవుణు సత్తు ఎస్సా ఇజి మీరు నెన్ ఇదెర్ అందెజె అర్లం కివిండ మీరు నండో తప్పమాటెజ్ వెప్పినిదెర్.

30 ఎందనిజ్ ఇహిజ, సాతి విరబాణిజ్ మర్జి నిజ్ ని వెలె ఎయెర్ బా పెండ్లి ఆవర్, పెండ్లిదిజ్ సివర్. వారు పరలోకామ్ ది దేవుణు దూతెజ్ లెకెండ మంజినార్.

31-32 సాతికార్ మర్జి నిజ్ ని వందిజ్ దేవుణు మిజి వెప్తి మనిక మీరు ఎనెజ్ బా సద్విఇతిదెరా? నాను అబ్రాహము దేవుణు, ఇస్సాకు దేవుణు, యాకోబురి దేవుణు ఇజి వాండ్రు సాతి వరి దేవుణు ఆవన్, బత్తిజిని వరి దేవుణునె”✱, ఇజి వెహ్తాన్.

33 అయ మాట విహరె వన్ని బోద వందిజ్ లోకుర్ బమ్మ ఆతార్.

పెరి ఆడ్ర

34 యేను సదుకయరు వెయ్ కు మూక్తాన్ ఇజి విహరె పరిసయరు కూడఃజి వాతార్.

35-36 వరి లోఇ ఒరెన్ దేవుణు రూలుజ్ నెగెండ నెస్తికాన్, “ఓ బోదకినికి దేవుణు సీతి ఆడ్రెజి లోఇ పెరి ఆడ్ర ఇనిక?”, ఇజి వన్నిజ్ పరీక్కు కిదెజ్ వెన్ బాతాన్.

✱ 22:31-32 22:31-32 నిర్గమ 3:6.

37 యేసు వన్నిజ్, “నీ పూర్తి మన్నుదాన్, నీ పూర్తి ఆత్మదాన్, నీ పూర్తి పాణమ్దాన్ నీ ప్రబు ఆతి దేవుణుదిజ్ ప్రేమిస్తజ్. ✱

38 యాకాదె గొప్ప ముక్కెలమతికని, మరి మొదోహి ఆడ్ర.

39 రుండి ఆడ్ర ఇనిక ఇహిజ, “నీను నిజి ప్రేమిన్ని లెకెండ్ మహి వరిజ్బా ప్రేమిన్అ. ✱

40 దేవుణు సితీ రూలుజ్ని ప్రవక్తరు వర్గితి మాటెజ పునాది ఆతిక యా రుండి ఆడ్రెజ్”, ఇజి వరిజ్ వెహ్హోన్.

41-42 పరిసయెరు కూడిఃతి మనివెలె యేసు వరిజ్ సుడఃజి, క్రీస్తు వందిజ్ మీరు ఇనిక ఒడఃబిజినిదెర్? వాండ్రు ఎయెర్ది కుటుమ్దికాన్ ఆనాన్? ఇజి వెన్బాతాన్. “వాండ్రు దావీదు రాజు తెగ్గదికాండ్రె”, ఇజి వారు వెహ్హోర్.

43-44 అయాలెకెండ్ మహిజ మీరు నిజం వెహ్హినిదెర్. “నాను నీ పగాతి వరిజ్ నీ పాదమ్క అడిఃగి ఇడ్పిదాక నీను నా ఉణెర్ పడఃకాదు బసి మన్అ. ఇజి ప్రబు నా ప్రబు వెట వెహ్హోన్. ✱ యా లెకెండ్ దేవుణు ఆత్మదాన్ దావీదు వర్గితివలె వన్నిజ్ ఎలాగ ప్రబు ఇజి కూక్చినాన్?

45 దావీదు వన్నిజ్ ప్రబు ఇజి కూక్చిజ్, వాండ్రు ఎలాగ వన్ని మరిసి ఆనాన్?”, ఇజి వాండ్రు వరిజ్ వెన్బాతాన్.

46 ఎయెర్బా మర్జి ఉండ్రీ మాటబా వెహ్హెజ్ అట్ఏతార్. అయా రోజుదాన్ వన్నిజ్ ఇనికబా వెన్బాదెజ్ ఎయెరిజ్బా దయరం సాల్ఏతాద్.

23

ఏడు కస్టమ్కు

1 నస్తివలె యేసు లోకురిజ్ని వన్ని సిసూర్జ ఈహు వెహ్హోన్.

2 యూదురి రూలుజ్ నెస్పిస్పికార్ని పరిసయెరుజ్, ముందాల మోసెజ్ మహి లెకెండ్ అతికారమ్దాన్ దేవుణు సితీ రూలుజ్ నెస్పిస్తజ్ అక్కు మనికార్.

✱ 22:37 22:37 ద్వితీ 6:5. ✱ 22:39 22:39 లేవి 19:18. ✱ 22:43-44 22:43-44 కీర్తన 110:1.

3 అందెజె వారు మిజి వెప్పి విజు వనకాజ్ లోజిజి అయాలెకెండ్ కిదెజ్ వెలె. గాని వరి పణిజ సుండేజి, వరి లెకెండ్ కిమాట్. ఎందనిజ్ ఇహిజ వారు వెహ్పూర్ గాని అయ లెకెండ్ కివీర్.

4 లోకుర్ గుజమ్దు పిండెదెజ్ అట్ ఇ నని బరుజ్ తొప్పి ఇడ్డి లెకెండ్ మని పెరి పణిజ్ కిదెజ్ ఇజి బలవంతం కినార్ గాని ఉండ్రి డెఃస్కుదాన్ కద్దెస్సెజ్ అట్టి సుల్కాని బరు లెకెండ్ మన్ని ఇజిరి సాయమ్బా వారు కివీర్.

5 లోకుర్ సూణి వందిజె వారు విజు పణిజ్ కిజినార్. దేవుణు మాటెజ్ రాస్తి ఇట్టి ఇజిరి పెట్టెదిజ్* పెరిక కిజినార్. మరి వరి సాకెజాణి† అన్నుజ్ పెరికెజ్ కిజినార్.

6 విందుదు వారు ముకెలమాతి బాడిజ్ కోరిజినార్. యూదురు మీటిజ్ కిని ఇల్కాజ్ బస్తెజ్ ఇజి వారు ముకెలమాతి బాడిజ్ కోరిజినార్.

7 సతెజ నడిమి వారు లోకుర్ వెట మాడిసె ఆదెజ్, బోదకినికార్ ఇజి కూకె ఆదెజ్ కోరిజినార్.

8 గాని మీరు ఇహిజ, 'బోదకినికి' ఇజి కూకె ఆమాట్. ఎందనిజ్ ఇహిజ దేవుణు ఒరేండ్రె మి బోదకినికాన్ మీరు విజిదెరి అన్నతంబేర్బు.

9 బూమి ముస్కు ఎయెరిజ్ బా బుబ్బు ఇజి పేరు ఇడేఃమాట్. దేవుణు ఒరేండ్రె మీ బుబ్బు. వాండ్రు పరలోకామ్దు మనాన్.

10 మీరు ఎయిదెరిబా నెస్సిస్సికి ఇజి కూకె ఆమాట్. ఎందనిజ్ ఇహిజ క్రీస్తు ఒరేండ్రె మిజినెస్సిస్సికాన్.

* 23:5 23:5 యా ఇజిరి పెట్టెజ్ తొలుదాన్ తయార్ కితిక్కెజ్ దన్ని లో ఇ వడాయ్ ఒపుమానమ్దు మన్ని సగం మాటెజ్ రాసి ఇడ్డి మంజినార్. నిర్గమ 13:1-10, 13:11-16. ద్వితీ 6:4-9, 11:13-21. దేవుణు మాటదు రాస్తి మన్నికె ద్వితీ 6:8, 11:18. యా లెకెండ్ లోజిజి మంజినాన్ ఇజి తోరెస్సెజ్ 12 వయుస్సు డాట్టి మొగ్గకోణోరి యాపెటి ఉండ్రి వరి నొప్పుదుని మరి ఉండ్రి పెటె డెబ్బ కియుదుబా తోహె ఆజి మహోర్. ముకెలం పార్లనం కినివలె ఆహె కిజి మహోర్. † 23:5 23:5 యూదురు ఆతికార్ దేవుణు పణికినికార్ ఇజి తోరెఆదెజ్, మరి దేవుణు సిత్ర ఆడెజ్ ఎత్తు కిబిస్తిలెకెండ్ ఉండ్రి నీలి రంగు సాల్వ నన్నిక పొర్వాజి మహోర్. యాక పొర్వాదెజ్ ఇజి వరిజ్ ఆడ్రె సిత్ర మహోన్ సంక్య 15:37-41, ద్వితీ 22:12. గాని యూదురిజ్ రూలుజ్ నెస్సిసినికార్ని పరిసయురిజ్ వారు గొప్ప నెగెండ్ దేవుణుదిజ్ లోజిజినికార్ ఇజి తోరెస్సెజ్ అక్కెజ్ గొప్ప పెరిక పొర్వాజి మహోర్.

11 మీ లోక విజేరిజ్ ఇంక పెరికాన్, విజేరిజ్ పణిమన్ని ఆదెజ్ వెలె.

12 ఎయెర్ బా వన్నిజ్ వాండ్రె పెరికాన్ కితిజ వాండ్రు ఇజిరికాన్ ఆనాన్. ఎయెర్ బా వన్నిజ్ వాండ్రె తగె ఆతి మహిజ వాండ్రు పెరికాన్ ఆనాన్.

13 వేసం కినికిదెరాతి పరిసయరుజ్ ని ఊదురు రూలుజ్ నెస్సిసినికిదెరా! అబయా, మిజి ఎసోనో కస్టమ్ కు వానె. ఎందనిజ్ ఇహిజ లోకుర్ దేవుణు ఏలుబడిఃదు సాన్ ఎండ వరి ఎద్దు సేప్లాజ్ కెప్పి పొక్కినిదెర్. మీరె సాన్ ఇతిదెర్. సాండ్రెజ్ నుడఃజి మహి వరిజ్ సరి సిఇతిదెర్.

14 వేసం కినికిదెరాతి పరిసయరుజ్ ని యూదురు రూలుజ్ నెస్సిసినికిదెరా, అబయా, మిజి ఎసోనో కస్టమ్ కు వానె. మీరు సిగు సిల్లెండ రాండి బోదెకాజ్ మొసెం కిజి మిజి లాబం తప్పిసినిదెర్ మీరు ఎలాగమర్తికార్ ఇజి నస్తెజ్ ఆవద్ ఇజి మీరు లోకుర్ ఎద్దు లావ్ నీరిండ మన్ని పార్లనం కిజినిదెర్. దన్నివందిజ్ మిజి పెరి సిక్కు వానాద్లె.

15 వేసం కినికిదెరాతి పరిసయరుజ్ ని యూదురి రూలుజ్ నెస్సిసినికిదెరా, అబయా! మిజి ఎసోనో కస్టమ్ కు వానె. ఒరెన్ వన్నిజ్ మీవెట కుడుఃప్లాజ్ మీరు సమ్ దరం డాట్టి బూమి విజు బూలాజినిదెర్. ఒరెన్ మీ వెట కూడిఃతిజ, వన్నిజ్ ఎల్లకాలం సిసు మంజిని బాడిఃదు సాండ్రెజ్, మిజి ఇంక రుండి వంతుజ్ తగ్గి ననికాన్ తయార్ కిజినిదెర్.

16 యూదురు రూలుజ్ నెస్సిసినికెదెర్ ఆతి మీరు లోకురిజ్ నెగ్గిసరి తోరిస్తెజ్ మన్నికిదెర్, గాని మీరు మహివరిజ్ సరి తోరిసిని గుడ్డిదికార్ లెకెండ మన్నిదెర్ అబయా! మిజి ఎసోనో కస్టమ్ కు వానె. ఒరెన్ దేవుణు గుడిః తోడుః ఇజి పర్వణం కితిజ, ఆయ పర్వణమ్ దాన్ వాండ్రు తప్రె ఆదెజ్ ఆనాద్. గాని దేవుణు గుడిః లోక మని బజారం తోడుః ఇజి ప్రమాణం కితిజ వాండ్రు ఆయ ఒపుమానమ్ దాన్ తప్రె ఆదెజ్ అట్ వన్ ఇజి మీరు నెస్సిసినిదెర్.

17 గుడ్డియాతి బుద్ధి సిలికిదెరా! ఎమేణిక పెరిక? దేవుణు గుడిఃదు మని బజారమ్ నా, సిలిజ బజారమ్ దిజ్ దేవుణు వందిజ్ కేట కిత్తక ఇజి

కిజిని దేవుణుగుడినా?

18 మరి ఎయెన్బా నంద సుర్ని మాలి పీట తోడు; ఇజి ప్రమాణం కితిజ, వాండ్రు అయ ప్రమాణమ్దాన్ తప్రె ఆదెజ్ అట్యాన్. గాని దని ముస్కు మని పూజ సితీ వనకాజ్ తోడు అసి ప్రమాణం కితిజ వాండ్రు అయ ప్రమాణమ్దాన్ తప్రె ఆదెజ్ అట్వన్ ఇజి మీరు నెస్పిసినిదెర్.

19 యూదురు రూలుజ్ నెస్పిసిని గుడ్డిదికార్ లెకెండ్ మన్నికిదెరా! ఎమేణిక పెరిక? పూజ సితికాదా? సిల్లిజ పూజ సితీదన్నిజ్ దేవుణు వందిజ్ కేట కిత్తిలెకెండ్ కిజిని సంత సుర్ని మాలి పీటనా?

20 అందెజె సంత సుర్ని మాలి పీట తోడు; అసి ప్రమాణం కినికాన్ నంద సుర్ని మాలి పీటదిజ్ మరి దని ముస్కు మన్ని విజు వనకాజ్ తోడు అసి ప్రమాణం కిజినాన్.

21 మరి దేవుణు గుడి; తోడు అసి ప్రమాణం కినికాన్, దేవుణు గుడిదిజ్ దని లొఇ మంజిని విజు వనకాజ్ ని బాన్ మంజిని దేవుణుదిజ్ తోడు అసి ప్రమాణం కిజినాన్.

22 పరలోకం తోడు ఇజి ప్రమాణం కినికాన్, దేవుణు బన్ని సింహాననమ్దిజ్ దని ముస్కు బసి మంజిని దేవుణుదిజ్ బా తోడు అసి ప్రమాణం కిజినాన్.

23 వేసం కినికిదెరాతి పరిసయ్ రుజ్ ని యూదురి రూలుజ్ నెస్పిస్పికిదెరా, అబయా మిజి ఎసోనో కస్టమ్ కు వానె. మీరు పొదిన కుసాదాన్, సోపుదాన్, జిలకారదాన్; దేవుణుదిజ్ దసమ్ బాగంకీ సీజినిదెర్. గాని నాయం, కనికారం, దేవుణు ముస్కు మని నమకం నన్ని దేవుణు సితీ రూలుదుమన్ని ముకెలమతి మాటోజ్ మీరు నెక్సి పొక్సినిదెర్. రుండిబా ఉండ్రె లెకెండ్ కిజి మంజినిక ఇహిజ ఒదె నెగెండ్ మహాద్ మరి.

24 సరి తోరిస్పి గుడ్డిదికిదెరా! ఉణిదని లొఇ డోమెజ్ అర్ది మహిజ

‡ 23:23 23:23 పొదిన, సాపు, జిలకార ఇక్కెజ్ విజు కరీదికెజ్ ఆఉ ఇక్క తిండిదిజ్ రుసి కూడుజ్ ఇజి వంట కినివలె కలప్పికెజ్. § 23:23 23:23 అబ్రహామునె తోలిత దసమ్ బాగం సితీలెకెండ్ పడాయ్ ఒపుమానమ్దు రాస్త మనాద్. ఆది 14:20. వెనుక ఇస్రాయేలు లోకుర్ వరిజ్ దొహ్ క్వి వనక లొఇ దసంబాగం సీదెజ్ ఇజి దేవుణు ఆడ్ర సిత్తాన్. దసంబాగం ఇహిజ పది లొఇ ఉండ్రె.

మీరు జాలిన్నిదేర్. గాని ఒంటె ననికెజ్ అర్దిజ అక్క నెస్తెజ్ సిల్లెద్ ఇజి అయాలెకండ్ నె డిజ్ నికిదెర్ మీరె.

25 వేసం కిజినిదెర్ ఆతి, యూదురి రూలుజ్ నెస్పిస్సికిదెరా, పరిసయెరుజాండె, లోకుర్ ముస్కుహాన్ మిడిస్తి ఇడ్డిగిన్నెజ్ ని కుడుకెజ్ లెకెండ్ మన్నికిదెర్. మీరు మీరుబా వెల్లిహాన్ సుడెతిజ నెగ్గవరిలెకెండ్ తోరె ఆజినిదెర్. గాని మీ మన్ను నిండ్రు సెఇ బుద్దిజ్ ని సెఇఉదెసమ్ కు, మరి నాను గణస్తికెజ్ విజి నజీనె ఇజి ఒడెఃబిని వరిలెకెండ్ నె.

26 గుడ్డి ఆతి పరిసయ వాండ్రు ముజాల మీరు మన్ను నెగ్గెండ్ కిదు, అయాలెత మీరు లోఇని వెల్లి మిడిస్తి మని కుడుకెజ్ ని గినెజ్ లెకండ్ ఆనిదెర్.

27 వేసం కినికిదెరాతి, యూదురి రూలుజ్ నెస్పిస్సికిదెరా, పరిసయెరుజాండె, వెల్లిదాన్ సుడెతిజ మీరు గొప్ప సోకుమని సున్నం డెయ్ తి మని దూకి ననికిదెరె! దూకి లోఇ సాతి వరి డుమ్ము మరి విజి సెఇకెజ్ మన్నిలెకెండ్ మీరుబా మన్నిదెర్.

28 అయాలెకెండ్ నె మీరు వెల్లి సుడెతిజ నాయం మనికిదెర్ ఇజి తోరె ఆజి నిదెర్. గాని లోఇ మీరు బక్తి మనికాప్ ఇజి పొజిజి నికిదెర్, సెఇ బుద్దిదాన్ నిండ్రితి మన్నికిదెర్.

29 వేసం కినికిదెరాతి యూదురి రూలుజ్ నెస్పిస్సికిదెరా, పరిసయెరుజాండె, మిజి ఎసోనొ కస్టమ్ కు వానె. మీరు దేవుణు ప్రవక్తరు దూకిజ ముస్కు సమాది తోహ్ని, నీతినిజాయి మన్ని వరి సమాది ముస్కు సోకు కిజినిదెర్.

30 అనిగిగొర్ కాలమ్ దు మాపు మంజినిక ఇహిజ, వారు దేవుణు ప్రవక్తరిజ్ సప్తి మహివలె వరివెట మాపు కూడెఃఎతాప్ మరి ఇజి మీరు వెహ్ని మంజినిదెర్.

31 అందెజె దేవుణు ప్రవక్తరిజ్ సప్తి మహి వరి మరిసీర్ ఇజి మీ మాటదానె మిజి మీరె సాసెం వెహె ఆజినిదెర్.

32 అందెజె మీ అనిగిగొర్ కితి పాపమ్ దు తకు మనిక మీరు పూర్తి కిదు.

33 సరాన్ ననికిదెరా! సరాస్కు కొణ్డోర్నని మీరు ఎలాగ ఎలాకాలం సిను మంజిని బాడ్డిదాన్ తప్తె ఆనిదెర్.

34 అందెజె నాను, ప్రవక్తరుజ్ నీ బుద్దిమని వరిజ్, బోద కిని వరిజ్ మీ నడిమి పోక్కిన. సెగొండారిజ్ మీరు సప్పిదెర్, మరి సెగొండారిజ్ మీరు సిలువ పోక్కిదెర్, మరి సెగొండారిజ్ యూదురు మీటిజ్ కిని ఇల్కాణిజ్ కొర్డెజణిజ్ డెయ్ జి ఉండ్రీ పట్టుమ్దాన్ మరి ఉండ్రీ పట్టుమ్దు ఉల్ప్పిదెర్.

35 నీతి నిజాయి్ మనికాన్ ఆతి ఏబెలు నలదాన్ మొదోల్సి, దేవుణు గుడిడిజ్ నీ సంత సుర్ని మాలి పీటదిజ్ నడిమి మీరు సప్తి మహి బెరాకియ మరిసి ఆతి జెకరియదాక, నీతి నిజాయి్ మన్నికారాతి విజేరిజ్ సప్పివరి నల బూమి కారిస్తి మన్ని వందిజ్ సిక్స మీ ముస్కునె వానెలె.

36 యా సిక్సెజ్ విజు యా తరమ్ది వరి ముస్కునె వానె ఇజి నాను మిజి నిజం వెప్పిన.

37 ఒ యెరూసలేమా, యెరూసలేమా నీను ప్రవక్తరుజ్ సప్పికి, నీ డగ్రు పోక్తివరిజ్ వణకాణిజ్ డెయ్ నికి, ఉండ్రీ కొరు దని పిలెకాజ్ కుడుప్పి దని రెకెజి అడ్డి ఇడ్డి లెకెండ్, నీ కొణ్డోరిజ్ కుడుప్పెజ్ ఇజి నాను ఎసాడు సుట్కునో ఆస్స ఆత మన్న, గాని నిజి ఇస్టం సిల్లెండ మహాద్.

38 ఇదిలో దేవుణు వన్నిగుడిః డిసి సినానె, అందెజె అక్క కాలి మంజినాద్.

39 ప్రబు సిత్తి అతికారమ్దాన్ ఆనికాన్” ✧ ఇజి నీను వెప్పిదాక నజి నీను మరి సుడేఃఇ, ఇజి నాను నిజి నిజం వెప్పిన.”

24

తరమ్దిజ్ ఆక్కర్దిజ్ గుర్తు.

1-2 యేసు దేవుణు గుడిఃదాన్ సోతాండ్రె దూరం సొన్ని మహిజ్, సిసూర్ వన్ని డగ్రు వాతారె, దేవుణు గుడిః వందిజ్ కూక్కుసాప్పి

గొప్పజు వర్గిజు మహార్. వాండ్రు వరిజ్, “మీరు యాకెజ్ విజు సుడఃతిదెర్. గాని ఇక్క ఉండ్రీ పణకు ముస్సు మరి ఉండ్రీ పణకు నిల్సి మన్ ఏండ ఆహె ఆనాద్ లె, ఇజి నాను మిజీ నిజం వెహ్సిన”, ఇజి వెహ్సన్.

3 యేసు ఒలివ మరెక్ మని గొరొన్ ముస్సు బస్తి మహివలె, మరి ఎయెర్ డగ్రుసిల్లెండ మహివలె, సిసూర్ వన్ని డగ్రు వాతారె, “యాకెజ్ ఎసెజ్ జర్గినె? నీను మర్జి వానిదనిజ్, మరి యా తరమ్దిజ్ ఆకర్దిజ్ గుర్తుజ్ ఇనికెజ్? మజీ వెహ్ అ”, ఇజి వెన్ బాతారె.

4 యేసు వరిజ్ ఈహు వెహ్సన్. “ఎయెన్ బా నిజీ మోసెం కి ఏండ జాగర్త సుడఃజి మండ్రు.

5 ఎందానిజ్ ఇహిజు నండొండార్ వాజి, నా పేరు ఇడః ఆజి, “నానె క్రిస్టు” ఇజి వెహ్సినండొండారిజ్ మోసెం కినార్.

6 మీరు విదెమ్ కు వందిజ్ వెనిదెర్ లె. మరి విదెమ్ కు వానెలె ఇజి సాటిస్సికబా వినిదెర్ లె. అయావలె తియెల్ ఆవిండ మండ్రు. యాకెజ్ విజు జర్గిదెజ్ వెలె. గాని యాక ఆక్కర్ ఆవద్.

7 లోకుర్ ముస్సు లోకుర్ ని దేసెమ్ కాజ్ ముస్సు దేసెమ్ కు పగ ఆజి మంజినె. అబ్బె ఇబ్బె నండొ నాహ్కాజ్ కరు, బూమి కర్ణినికెజ్ వానెలె.

8 యాకెజ్ విజు ఉండ్రీ బోదెలి కీదు అస్తెజ్ ముజాల వాని నొప్పి మొదొల్స్తి లెకెండె.

9 నస్తవలె లోకుర్ మిజీ అసి తొహ్సి హిమ్నెజ్ కిజి సప్తెజ్ ఒపజెస్పార్ లె. నా ముస్సు నమకం ఇట్టి వందిజ్ లోకామ్ దు మన్ని విజు జాతిదికార్ మిజీ ఇస్టం కి ఏండ ఆనార్.

10 నండొండార్ వరి నమకం డిస్సు సినార్ లె. ఒరెన్ మరి ఒరెన్ వన్నిజ్ మోసెం కినాన్. ఒరెన్ మరి ఒరెన్ వన్నివెట పడి ఏండ ఆనాన్.

11 నండొండార్ డొజ ప్రవక్తరు వాజి తప్ప బోదెజ్ నెస్సిసి లోకురిజ్ తప్ప సర్దు నడిఃపిసి, నండొండారిజ్ మోసెం కినార్.

12 దేసెమ్ ది రూలుజ్ లోజి ఏండ బత్కిజినికార్. ఆజినిజ్ లోకుర్ ప్రేమ సిల్లికార్ ఆనార్. మహివరిజ్ ప్రేమిన్సి ప్రేమ సిల్లెండొజి మంజినార్.

13 గాని ఆక్కర్దాక కస్టమ్కు ఓరిసిని వన్నిజ్ దేవుణు రక్కిస్నాన్లె.

14 దేవుణు ఏలుబడిః కిని వందిజ్ నువార్త బూమి ముస్సు మని లోకాజ్ విజు ఉండ్రీ సాక్సెం లెకెండె వెహె అనాద్లె. నస్తవలె యా తరమ్దిజ్ ఆక్కర్ వానాద్.

15 ప్రవక్త ఆతి దానియేలువెట దేవుణు ముజాల వర్గితి మహి లెకెండె, “నాసనం కిని సెఇక ఆతిక”* దేవుణు గుడిఃదు నెగ్గి బాడిఃదు నిల్పి మంజినిక నూణివెలె (యాక నద్వినికాన్ నెసి అర్దం కిదెజ్) అయ గడిఃయ వానాద్లె.

16 నస్తవలె యూదయ దేసమ్దు మంజినికార్ గొరొకాజ్ ఉహ్కైజ్ వలె.

17 మిదె ముస్సు మంజినికాన్ ఇండ్రోణిజ్ ఇనికబా వెల్లి ఒత్తెజ్ ఇజి డిగ్గెజ్ ఆవద్.

18 మడిఃజు మంజినికాన్ వన్ని సాల్వెజ్ ఒత్తెజ్ ఇజి ఇండ్రో వాదెజ్ ఆవద్.

19 అయ దినమ్కు కొడొఃరిజ్ పాలు ఉట్టిన్ని అయ్సికాజ్, పొటాదు మన్ని బోదెకాజ్ ఎస్సానొ కస్టమ్కు మన్నికెజె.

20-21 అయాకెజ్ ఉండ్రీ పినికాలమ్దునో, రోమ్ని దినమ్దునో రెవిండ ఆపిద్ ఇజి పార్దనం కిజి మండ్రు. ఎందానిజ్ ఇహిజు, లోకం మొదోల్స్తి బాణిజ్అసి ఏలుదాక రెఇ నని కస్టమ్కు వానె. అందెజె అయా కస్టమ్కాణిజ్ తప్రె ఆదెజ్ ఇజి మీరు ఉహ్కై సొనిక ఉండ్రీ పిన్నికాలమ్దునో, విస్రాంతిదినమ్దునో* ఆవిండ మండ్రెజ్ ఇజి పార్దనం కిజి మండ్రు.

22 అయా కస్టమ్కు మన్ని దినమ్కు తక్కు కిదెజ్ ఇజి దేవుణు ఒడఃబిఎండ మహిజు బూమి ముస్సు మన్నకాన్ ఎయెన్బా తప్రె ఆదెజ్

☆ 24:15 24:15 దాని 9:27; 11:31; 12:11.

* 24:20-21 24:20-21

పిన్నికాలమ్దు గొప్పు పెరి పిరు వాజి మహాద్. అందెజె విజుబాన్ గడ్డెజ్ నిండ్రెజి మన్నిజ్ పిన్నిదిజ్ పయనం కిదెజ్ గొప్పు కస్టమాజి మంజినాద్ మండ్రెజ్ బాడ్డి దొహ్కైజ్నొ, తిండి దొహ్కైజ్నొ గొప్పు కస్టమాజినాద్ యూదురి రూలుజ్ వజ విస్రాంతిదినమ్దు మూడు నాలేగి మయిలుదిజ్ లాప్ దూరం పయనం కిదెజ్ ఆవద్ ఇజి మహాద్.

అట్లెన్. గాని దేవుణు ఎర్లొస్తి మన్ని వరి వందిజ్ అయా దినమ్కు తక్కు కినాన్లె.

23 అయా కాలమ్దు ఎయెన్బా మిజి, “ఇదిలో క్రీస్తు ఇబ్బె మనాన్”, సిల్లిజ, “వాండ్రు అబ్బె మనాన్’ ఇజి వెహ్తిజ వరి మాటేజ్ అస్సాట్.

24 నస్తివలె డొజక్రీస్తుర్, డొజ ప్రవక్తరు వాజి నండొ బమ్మాతి పణిజ్, ముజాల ఎసెజ్బా తోఇ నని బమ్మాతి పణిజ్ కిజి, అట్టిజ దేవుణు ఎర్లొస్తి మన్నివరిజ్బా మోసెం కిదెజ్ నూణార్.

25 జాగర్త మండ్రు! ఏలె అక్కెజ్ ఇనిక్కెజ్బా జర్గినె ముజాలె నాను మిజి వెహ్తా మన.

26 అందెజె ఎయెన్బా, “ఇవిలోన్ వాండ్రు అబ్బె బిడిఃమ్బూమిదు ప్రాంతమ్దు మనాన్’ ఇజి వెహ్తిజ్బా మీరు సొన్మాట్. సిల్లిజ, “ఇవిలోన్ వాండ్రు ఇబ్బె గొనె మనాన్’ ఇజి వెహ్తిజ్బా నమ్మిమాట్.

27 ఎందానిజ్ ఇహిజ, మిర్చినిక ఎలాగ తూర్పుదాన్ పడమార దాక తోరె ఆజినాదొ, అయలెకెండెనె లోకు మరిసి ఆతి నాను వానివలెబా మంజినాద్,

28 డేగెజ్ వానివలె పినుగుజ్ మంజినె ఇజి గుర్తు కిదెజ్ అట్టిలెకెండె యేసు వానిదన్నిజ్బా టెటాజ్ తోర్చి గుర్తుజ్ మంజినె.

29 అయా కస్టమ్కు మని దినమ్కు వీజితివెటనె, “పొద్దు సీకటి ఆనాద్, నెల జాయ్ సివీద్, ఆగాసమ్దు మని సుక్కెజ్ రాల్సె. ఆగాసమ్దు మన్నిలావ్రకమ్ది సత్తు మన్నికెజ్ కద్దినె.*

30 నస్తివలె లోకుమరిసి ఆతి నాను వానిదనిజ్ గుర్తు ఆగాసమ్దు తొర్నాద్. బూమి ముస్కు మని నండొ తెగ్గెజాణికార్ గుండె కొత్తె ఆజి అడఃబనార్. నస్తివలె లోకుమరిసి ఆతి నాను గొప్ప సత్తుదాన్ దేవుణు జాయ్దాన్ ఆగాసమ్దు మని మొసొపు ముస్కు వానిక వారు నూణార్లె.

* 24:29 24:29 యెసయ 13:10; 34:4.

31 జోడుబంకెజు జాటుదాన్ నాను నా దూతెజ్ పోక్కు. వారు ఆగాసమ్దు యా కొసాదాన్ అయా కొసాదాక నాల్గి దిక్కుజాణిజ్ దేవుణు ఎర్లిస్తి మన్ని వరిజ్ ఉండ్రెబాన్ కినార్.

32 ఇదిలో బొడె మరాన్దిజ్ సుడఃజి యాక మీరు నెస్తు. బొడె మరాన్ ఆకు రాల్లి సిగ్రిస్సివెలె, ఎండ కాలం డగ్రు ఆతాద్ ఇజి మీరు నెసినిదెర్.

33 అయలెకెండెనె మీరు యాకెజ్ విజు జర్గినిక సూణివెలె, నాను దారబంద్రమ్దునె మన్న ఇజి మీరు నెస్తు.

34 యాకెజ్ జర్గినిదాక యా తరమ్దికార్ తప్ ఏండ బత్తిజినె మంజినార్ ఇజి నాను మిజి నిజం వెప్పిన.

35 ఆగాసమ్ని బూమిబా సిల్లెండ ఆనె, గాని నా మాటెజ్ ఎసెజ్ బా అయాలెకెండె సోన్ ఉ.

36 అయ దినం వందిజ్ అయ గడియ వందిజ్ ఎయెర్ బా నెస్ ఏర్. పరలోకామ్దు మన్ని బుబ్బాతి దేవుణు ఆ ఏండ దేవుణు దూతార్ గాని మరిసిబా నెస్ ఏర్.

37 నోవాహు కాలమ్దు ఎలాగ మనెనో, అయలెకెండెనె లోకుమరిసి ఆతి నాను వానికబా మంజినాద్.

38 గడ్డ నిండ్రిని ముజాల నోవాహు ఓడః లోఇ డుఃగితిమహి దినమ్ దాక లోకుర్ ఉణిజి, తింజి, పెండ్లి ఆజి, పెండ్లిదిజ్ సీజి మహార్[†].

39 బూమి విజు ముడిఃగ్గిని లెకెండె గడ్డ నిండ్రిజి విజేరిజ్ పేర్జి ఒతిదాక, ఇనిక జర్గినాద్లె ఇజి వారు నెస్ ఏండ మహార్. అయా లెకెండెనె లోకుమరిసి ఆతి నాను వానివలెబా మంజినాద్.

40 రివెర్ ముడిఃజు మంజినార్. ఒరెన్ వన్నిజ్ డిసి ఒరెన్ వన్నిజ్ కూక్కు బనాన్.

† 24:38 24:38 దేవుణు బూమి విజు ముడుఃగ్గి సిని లెకెండె పేరు రపిసి గడ్డ నిండ్రిని ముజాల ఉండ్రి ఓడ తాయార్ కిదెజ్ ఇజి నోవాహుజ్ వెప్తాన్. అయా ఓడ 300 మూరెజ్ సాంపు 50 మూరెజ్ వెడల్పు 30 మూరెజ్ ఎత్తు మన్నిక. నోవాహుని వన్ని ఇండ్రెణికార్ విజేరె, మరి విజు జంతుజ్ పొట్టిజ్ పొర్లిజ్ అండు పొత్తు జత్త లెక్క. ఓడాదు డుఃగ్గి ఏడు రోసు వెనుక పిరు వాదెజ్ మొదొల్పిదాక లోకుర్ వరిజ్ అలవాటుజ్ లెకెండె బత్తిజి మహార్.

41 రుండి బోదెక్ ఉండ్రి జెత్త పణకుదు నూర్జి మంజినె. ఉండ్రి దనిజ్డిసి ఉండ్రి దనిజ్డ్ కూక్కు ఒనాన్.

42 ఎమేణి దినమ్దు మీ ప్రబు వానాండ్రో ఇజి మిజీ తెలివద్. అందెజె మీరు జాగ్రతదాన్ ఎద్దు సుడేజి మండ్రు.

43 యాక మీరు అర్దం కిజి నెస్తు. ఎమేణి గడియాదు డోజారి వానాన్ఇజి ఇండ్రోణి ఎజుమాని నెస్తిజ, డోజారి ఇండ్రో డుగ్దెజ్సరి సివ్పిండ్ తెలి మంజి సుణాన్.

44 మీరు నా వందిజ్ ఒడేబిఇ గడియాదు, లోకు మరిసి ఆతి నాను వాన. అందెజె మీరు ఎస్తివలెబా తయార్ ఆజి మండ్రెజ్ వెలె.

45 బుద్దిమని నమిదెజ్ అట్టిమని పణిమన్ని ఎయెన్? ఇండ్రోణి వరిజ్ విజేరిజ్ నెగెణ్ సుడేజి సరి ఆతి వేలాదు, వరిజ్ సరి ఆతి బోజనం సిదెజ్ ఇజి ఇండ్రోణి ఎజుమాని ఒపజెప్పి లెకెండ్ మన్నికాండ్రె బుద్ది మన్ని పణిమనిసి.

46 అయ ఎజుమాని మర్జి వానివలె, వన్నిజ్ ఒపజెప్పి లెకెండ్ఆయా పణిమన్ని కిజి మంజినిక ఇహిజ అయ ఎజుమాని సుడేతిజ అయ పణిమన్నిజ్ నెగెద్.

47 అయ ఎజుమాని వన్నిజ్ కల్గితిమని విజు దనిజ్ సూణికాన్ లెకెండ్ అయ పణిమనిసి కినాన్ ఇజి నాను మిజి నిజం వెప్పిన.

48-49 “గాని అయ పణిమనిసి సెఇకాన్ ఆజి నా ఎజుమాని వాదెజ్ నండో ఆలస్యం ఆనాద్”, ఇజి అయ సెఇ పణిమన్ని వన్ని మన్నుదు ఆలోసనం కిజి వన్నివెట పణికిని వరిజ్ డెయ్జి, మరి ఉణివరివెట కూడేజి ఉణిజి తింజి మంజినాన్.

50 వాండ్రు తోఇ దినమ్దు ఒడేబిఇ గడియాదు వన్ని ఎజుమాని వానాన్.

51 అయ ఎజుమాని వన్నిజ్కత్తి, బక్తి మనికాప్ ఇజి పొజిజిని వరివెట వరివందిజ్ తయార్ కిత్తిమన్ని బాడిదు పొక్వాన్. అబ్బె పల్కు కొహ్క్కి, అడేబాజి మంజినార్.

25

పదిమణిసి విడిః బోదెక్

1 మరి దేవుణు ఏలుబడికి కినిక ఇహిజ వరి నూనెజాణి దీవెజ్ అసి పెండ్లి దజడః వన్నిజ్ ఎద్దు సుండఃదెజ్ సొహిమహి పదిమన్ని విడ్డిః బోదెకాజ్ పోలిత మనాద్.

2 వినకాజ్ లోఇ అయ్దుగురు బోదెక్ బుద్ది సిలికెజ్, అయ్దుగురు బోదెక్ బుద్ది మనికెజ్.

3 అయ బుద్ది సిలికెజ్ వనక దీవెజ్ అస్తై గాని నూనెజ్ ఒఱుఱె.

4 బుద్ది మనికెజ్ వనక దీవెజ్ వెట సీసెజ్ నూనెబా ఒఱె.

5 పెండ్లి దజడఃయెన్ వాదెజ్ ఆలస్యం ఆతిజ్ అవిక్ విజు కొహోజి నిద్ర కిజి మహె.

6 మదరెయ్దు, “ఇవిలోన్ పెండ్లి దజడఃయెన్, వన్నిజ్ ఎద్దు సుండఃదెజ్ వాతి బోదెకాండె వెల్లి రదు”, ఇజి ఉండ్రె గగోలిదాన్ జాటు వాతాద్.

7 నస్తవలె బోదెక్ విజుండెక్ నిజ్జి వన్నా నూనెజాణి దీవెజ్ సొడిఃతిజ్ ఎకిసి నెగెండ కిత్తె.

8 గాని అయ బుద్ది సిలికెజ్, “మా దీవెజ్ నమ్జి సొన్నినె. అందెజె మీ నూనె లోఇ కండెక్ మజిబా సిదాట్”, ఇజి బుద్ది మని వనకాజ్ లొస్తె.

9 అయావలె బుద్దిమని బోదెజ్, “సిల్లె, సిత్తిజ్ మజిని మిజి సాల్ ఏండ ఆనాద్. అందెజె మీరు పొర్నివరిబాన్ సొన్ని కొండు”, ఇజి వెహై.

10 అవి నూనె కొండెజ్ సొన్ని మహిజ్ పెండ్లి దజడః వాతాన్. నస్తవలె తయార్ ఆతి మనికెజ్ వన్నివెట పెండ్లి విందుదిజ్ లోఇ సొహె. దని వెనుక సేహాలెజ్ కెహాపె ఆఱె.

11 దన్ని వెనుక, మహి బుద్దిసిల్లి బోదెక్ వాజి, “బాబు, బాబు మజి నెహ్లా రెఅ”, ఇజి కూకై.

12 వాండ్రు వరిజ్, “నాను మిజి నిజం వెహ్నిన, నాను మిజి నెన్ ఎ”, ఇజి వెహ్హన్.

13 నాను వాజిని రోజు గాని అయ గడిఃయబా మీరు నెన్ ఇతిదెర్, అందెజె మీరు తెలి ఆజి మండ్రు.

మూఎర్ పణిమణిసిర్

14 మరి దేవుణు ఏలుబడిః కినిక ఇహిజ ఒరెన్ దేసం సొండ్రెజ్ ఇజి వన్ని పణిమణ్నిరిజ్ కూక్కి, వన్ని ఆస్తి వరిజ్ ఒపజెప్తి వన్ని లెకెండ మనాద్.

15 వండ్రు ఒరెన్ పణిమణ్నిజ్ అయ్దు తాలంతుజ్*. మరి ఒరెన్ వన్నిజ్ రుండి, తాలంతుజ్ మరి ఒరెన్ వన్నిజ్ ఉండ్రె తాలంతుజ్ యాలెకెండ ఒరెన్ ఒరెన్ దన్ని వెట పణికిదెజ్ అట్టి లెకెండ వరిజ్ సితాన్. వెనుక వాండ్రు పయనం కిజి దేసం సొహాన్.

16 అయ్దు తాలంతుజ్ లొస్తికాన్ వెటనె సొన్సి వనకవెట బేరం కిజి మరి అయ్దు తాలంతుజ్ గణస్తాన్.

17 రుండి తాలంతుజ్ లొస్తికాన్బా అయా లెకెండనె కిజి మరి రుండి గణస్తాన్.

18 గాని ఉండ్రె తాలంతు లొస్తికాన్ సొహండ్రె బూమిదు గాంద కారిసి వన్ని ఎజుమాని డబ్బు మూస్తాన్.

19 లావ్కాలం సొహి వెనుక వరి ఎజుమాని మరీజి వాతండ్రె వరి సిత్తి డబ్బుజాణిజ్ వారు ఇనిక కిత్త మనార్ ఇజి సుడఃతాన్.

20 నస్తివలె అయ్దు తాలంతు లొస్తికాన్, మరి అయ్దు తాలంతుజ్ తతాండ్రె, “బాబు నీను నజీ అయ్దు తాలంతుజ్ ఒపజెప్తి గదె, ఇదిలో అకెజె ఆవండ మరి అయ్దుబా నాను కుడుప్త”, ఇజి వెప్తాన్.

21 వన్ని ఎజుమాని వన్నిజ్, “నమకం ఇడదెజ్ అట్టి నెగ్గి పణిమణ్ని, నీను నెగెండె కిత్తి. యా కండెక్బాన్ నిజీ నమిదెజ్ అట్టి నని పణి నీను కిత్తి. అందెజె నండొ వనకాజ్ నాను నిజీ ఒపజెప్పాలె. నీను వాజి నీ ఎజుమానివెట సర్ల ఆజి మన్అ”, ఇజి వెప్తాన్.

22 రుండి తాలంతుజ్ లొస్తికాన్ వాతాండ్రె, “ఎజుమాని నీను నజీ రుండి తాలంతుజ్ ఒపజెప్తి గదె, ఇదిలో అకెజె ఆవండ మరి రుండి తాలంతుజ్ గణస్త”, ఇజి వన్నిజ్ వెప్తాన్.

* 25:15 25:15 ఉండ్రె తాలంతు ఇహిజ దినారమకు అయాలెకెండ ఇహిజ ఆరు వెయిజ్ రొన్సు. పణికితిజి దొహ్కీ కూలిదిజ్ సరియాతి డబ్బుజ్ నేహి లెక్కదిజ్ సుడఃజి ఇంసు మింసు ఆరు లెక్కెజ్ రూపాయ్ మంజినె.

23 ఎజుమాని వన్నిజ్, “నమకం ఇడ్దెజ్ అట్టి నెగ్గి పణిమనిసి, నీను నెగెండె కిత్తి. యా కండెక్బాన్ నీను నమిదెజ్ అట్టి నని పణి నీను కిత్తి. అందెజె నిజీ నండో వన్నాజ్ ఒపజెప్ప. నీను వాజి నీ ఎజుమాని వెట సర్ల ఆజి మన్అ”, ఇజి వెహ్హాన్.

24 నస్తివలె ఉండ్రీ తాలంతు లొస్తికాన్ వాతాండ్రె, “బాబు నీను విత్తణ బాడిదాన్ కొయ్నికి, మరి ఉణున్ఇ బాడిదాన్ పంట కొయ్ని మూర్కతం మనికి ఇజి నాను నెస్త.

25 అందెజె నాను తియెల్ ఆజి బూమిదు గాంద కార్జి నీ డబ్బు డాప్త. ఇదిలో నీది, నీను లొస్అ”, ఇజి వెహ్హాన్.

26 అందెజె వన్నిజ్ సుడఃజి అయ ఎజుమాని, “బదకమాతి సెఇ పణిమన్ని, నాను విత్తణ బాడిదాన్ కొయ్నికాన్, ఉణున్ఇ బాడిదాన్ పంట కొయ్నికాన్ ఇజి నీను నెస్తి?

27 అపాజ నా డబ్బు వడ్డి సీని సవ్కారిజబాన్ నీను సీని మంజినిక ఇపాజ నాను వాతివెలె వడ్డి కుడుఃప్పి నా డబ్బు నజి దొహ్కాద్ మరి.

28 అయ ఉండ్రీ తాలంతు వన్నిబాణిజ్ లాగ్జి పది తాలందుజ్ మనివన్నిజ్ సీఅ.

29 నమిదెజ్ అట్టికాన్ ఎయెండ్రో, వన్నిజ్ మరి లావ్ దొహ్కె. వరిజ్ మరి నండో కల్లిజి మంజినె. నమ్మిదెజ్ అట్తణ వన్ని బాణిజ్, వన్నిజ్ కల్లితిమన్ని ఇజిరికబా లాగె ఆనాద్.

30 పణిదిజ్ రెఇ యా పణిమన్నిజ్ వెల్లి సీకటుదు విసీర్దు. అబ్బె పల్కు కొహ్కీఅడఃబాజి మంజినాద్.

మెండ గొరెజ్ని ఎలెటి గొరెజ్

31 నస్తివలె యేసు ఈహు వెహ్హాన్. “లోకుమరిసి ఆతి నాను నా గొప్ప గవ్ రమ్దాన్, నా విజు దూతెజ తోడుః అసి వన్నివెలె, రాజు వజ ఏలుబడిః కిదెజ్ దేవుణు మంజిని బాడిఃదు మంజిని గొప జాయ్దాన్, విజు దూతారిజ్ నావెట తోడు అసి వానివలె, రాజువజ ఏలుబడిః కిదెజ్ పరలోకమ్దు మంజిని గొప్ప జాయ్ మన్ని నా సింహాసనమ్దు బసి మంజిన.

32 నస్తివలె బూమి ముస్కు మని లోకుర్ విజెరె నా ఎద్రు కూడఃజి వానార్. గొర్రెజ్ మేప్పి గవుడుఃయెన్ ఎలిటి గొరెజాణిజ్ మెండ గొర్రెజ ఎర్లిసినిలెకెండ్ నాను లోకాజ్ ఒరెన్ ఒరెన్ వన్నిజ్ ఎర్లిస్సాలె.

33 నాను ఉణెర్పడఃక మెండ గొర్రెజ, డేబపడఃక ఎలిటి గొర్రెజ నిల్పాలె.

34 రాజు ఆతి నాను నా ఉణెర్ పడఃక మని వరిజ్ సుడఃజి, “నా బుబ్బాతి దేవుణు సిజిని దీవనమ్కు మంజి వన్నిజ్ సెందితికిదెరా, లోకం పుట్టి బాణిజ్ ఆసి దేవుణు మీ వందిజ్ తయార్ కితిమన్ని దేసం మీ సొంత కిజి మండ్రు.

35 ఎందానిజ్ ఇహిజ, నజి బజ కట్టిజ్ మీరు బోజనం సితిదెర్, ఏప్పి కట్టిజ్ ఏరు సితిదెర్, నాను ఆఇకాన్ ఆతిమహిజ్ నజి డగ్రు కితిదెర్.

36 నాను డుమ్డ ఆతిమహిజ్ నజి సొక్కెజ్ సితిదెర్. జబుదాన్ మహిజ్ నజి నెగెండ్ సుడఃతిదెర్, నాను జెలిదు మహివలె సుడఃదెజ్ వాతిదెర్, ఇజి వెహ్సాన్.

37 నస్తివలె దేవుణుదిజ్ లోజితిమహి సీతినిజాయిమన్నికార్ ఆతి వారు, “ప్రబువా, ఎస్తివలె నిజి బజదాన్ సుడఃతిజ్ నిజి బోజనం సితాప్? ఎస్తివలె ఏప్పి కట్టిజ్ మాపు నిజి ఏరు సితాప్?

38 ఎస్తివలె ఆఇకి ఆతిమహిజ్ సుడఃజి నిజి డగ్రు కితాప్? ఎస్తివలె డుమ్డ ఆతి మహిక సుడఃజి నిజి సొక్కెజ్ సితాప్?

39 ఎస్తివలె నీను జబుదాన్ మహిక, జెలిదు మహిక సుడఃజి నీ డగ్రు వాతాప్?”, ఇజి వన్నిజ్ వెన్బానార్లె.

40 నస్తివలె రాజుఆతి నాను, “నా తంబెరిజ ఆతివరి లోఇ ఇజిరికాన్ ఆతి ఒరెన్వన్నిజ్ మీరు ఇనిక కితిదెర్, అయాక మీరు నజి కిత్తిదెర్, ఇజి నాను నిజి నిజం వెహ్సాన్”, ఇజి వరిజ్ వెహ్సా.

41 నస్తివలె వాండ్రు డేబ్ర పడఃకాదు మని వరిజ్ సుడఃజి, “సయెప్ పొందితికిదెరా, నా డగ్రహాన్ సొండ్రు, సయితానుజ్ నీ వన్ని దూతర్ వందిజ్ తయార్ కితి మని ఎలాకాలం సిసు మంజిని బాడిడు సొండ్రు.

42 ఎందనిజ్ ఇహిజ, నాను బజ సాత, గాని మీరు నజి బోజనం సిఇతిదెర్. ఎహ్కా కట్టిజ్ ఉండెజ్ ఇనిక సిఇతిదెర్.

43 ఆఇకానాతి మహిజ్ మీరు నజి డగ్గు కిఇతిదెర్. డుమ్డ ఆతిమహిజ్ మీరు నజి సాక్కెజ్ సిఇతిదెర్. జబ్బుదాన్ మహివలె జెలిదు మహివలె మీరు నజి సుడెదెజ్ రెఇతిదెర్”, ఇజి వెహ్నా.

44 వారుబా వన్నిజ్, “ప్రబువా ఎస్తివలె నీను బజదాన్మహిక, ఎహ్కాదాన్మహిక, ఆఇకి ఆతి మహిక, డుమ్డ మహిక, జబ్బుదాన్మహిక, కయ్దు మహిక సుడెజి నిజి సాయం కివితాప్?”, ఇజి వెన్బానార్.

45 నస్తివలె నాను, “యా ఇజిరి వరి లొఇ ఒరెన్ వన్నిజ్ ఇనిక మీరు కిఇతిదెర్, అయాక నజిబా మీరు కిఇతిదెర్”, ఇజి వరిజ్ వెహ్నా.

46 నస్తివలె వారు ఎలాకాలం మంజిని సిక్నాదు సొనార్లె, గాని దేవుణుదిజ్ లొజితికార్ ఎల్లకాలం మంజిని బత్తుదు సొనార్.”

26

యేసుజ్ పడిఁవెండ కుట్ట ఆజినార్

1-2 యేసు యాకెజ్ విజు వెహ్తి వీజితి వెనుక వన్ని సిసూర్జ సుడెజి, “రుండి రోస్కు వెనుక పస్కు పండోయ్* వాజినాద్ ఇజి మీరు నెస్తిదెర్. నస్తివలె లోకు మరిసి ఆతి నాను సిలువ పొకె ఆదెజ్ ఇజి ఒపజెపె ఆనాలె”, ఇజి వరిజ్ వెహ్నాన్.

3 నస్తివలె పెరి పుజెరిజుని లోకురి పెద్దెల్త విజేరె, విజేరె విజు పుజెరిజు ముస్కు పెరి పుజెరి ఆతి కయవ ఇండ్రొ కూడెజి వాతార్.

* **26:1-2 26:1-2** యూదురు వరి అని గొగొరిజ్ దేవుణు అయుగుప్తు దేసమ్దు వెణిపణి కిజి మహిబాణిజ్ నండె పంటెజ్ ముజాల డిప్పిసి తత్తి దన్నిజ్ ఎత్తు కిజినికాదె పస్కు పండోయ్ పస్కు ఇహిజ డాట్టి సాహిక ఇహిజ సప్పికానాతి దేవుణు దూత, మెండగొరెది నల దారబంద్రమ్కాజ్ రాసె ఆతి మన్ని ఇల్కాజ్ డట్టి సాహి సమయమ్దిజ్ గుర్దిసినాద్. అయ ఇల్కా పుట్టి పెరి వన్నిజ్ దేవుణు దూత సమ్వితాన్ గాని మెండ గొరెది నల దారబంద్రమ్కాజ్ రాసెఇ అయగుప్తు దేసమ్ది వరి విజు ఇల్కాజ్ పుట్టి పెరి వరిజ్ విజేరిజ్ దేవుణు దూత సహ్నాన్. యా పండోయ్ విజు సమయమ్దిజ్ కినార్ యూదురు విజు దేసమ్కాజ్ పండోయ్ కిదెజ్ ఇజి యెరుసల్లేమ్దు కూడెజి వానార్ నిర్గమ 12.

4 యేసుజ్జ్ ఎలాగబా ఉపాయ్ కిజి అసి సప్తెజ్ ఇజి అబ్బె వారు ఉండ్రి ఆలోసనం కితార్.

5 “మాపు ఏలు వన్నిజ్ అస్తిజి లోకుర్ వెట గొడఃబ కిసార్లె, అందెజె యా పండొయ్దు పోసి”, ఇజి వారు వర్గితార్.

ఉండ్రి బోదెలె యేసు బురాదు వాసనం మన్ని నూనె వక్కినాద్.

6-7 యేసు బెతానియ ఇని నాటొ ముజాల కుస్టురోగమ్దాన్ మహి సీమోను ఇండ్రొ వాతిజ్, అబ్బె వాండ్రు బోజనమ్దిజ్ బస్తాన్. నస్తివలె ఉండ్రి బోదెలి నూన్నాజ్ పణుకుదాన్ తయార్ కిత్తి ఉండ్రి సీసాదు†, నండొ విలువమని, నండొ వాసనం మని నూనె ఉండ్రి పెరి సీస తత్తాదె వన్ని బుర్త ముస్సు వాక్తాద్.

8-9 సీసూర్ అక్క సుడఃజి కోపం ఆతారె, “ఎందనిజ్ యా ణిదిజ్రెఇ ణి? యాక నండొ డబ్బుదిజ్ పోర్సి, అయ డబ్బు బీదవరిజ్ సీదెజ్ ఆనాద్ గదె?”, ఇజి వెప్తార్.

10 యేసు అక్క నెస్తాండ్రె, “యా బోదెలి నా వందిజ్ ఉండ్రి నెగ్గి పణి కితాద్ మీరు ఎందనిజ్ దన్నిజ్ అర్ల కిజినిదెర్?”

11 బీదాదికార్ మీవెట ఎస్తివలెబా మంజినార్. గాని నాను ఎలాకాలం మీ వెట మన్ఎ.

12 నజీ మూస్సి వందిజ్ తయార్ కిత్తి లెకెండె యా బోదెలి యా నూనె నా ఒడొల్ ముస్సు వాక్తాద్.

13 యా బూమి ముస్సు ఎంబెబా యా దేవుణు ఏలుబడిః కిని వందిజ్ సువార్త సాటిస్సివెలె అది కితి యా పణి దన్నిజ్ ఎత్తుకిత్తి లెకెండె సాటిసి మంజినాద్లె”, ఇజి వెప్తాన్.

14-15 నస్తివలె పన్నెండు మణిసిర్ సీసూర్ లోఇ ఒరెన్ ఇస్కరియోతు యూద ఇనికాన్ పెరి పుజెరిజి డగ్రు సాహండ్రె, “నాను యేసుజ్ మిజి ఒపజెప్తిజి నజి ఇనిక సీనిదెర్?”, ఇజి వెన్బాతాన్. అందెజె వారు ముప్పయ్ వెండి రూపయ్జు తూస్తారె వన్నిజ్ సిత్తార్.

† 26:6-7 26:6-7 యా నూన్నాజ్ పణుకు పేరు అలబాస్థరు ఇజి, యా పణుకు నండొకరీదిక త్తొజ్జ్ మంజినాద్ యాక గిసి లోకుర్ పుసెజ్ తయార్ కిజినార్

16 అబ్బెణిజ్ అసి యూద యేసుజ్ వరిజ్ ఒవజెప్తెజ్ ఉండ్రె అవ్కాసం సుడఁజి మహాన్.

ప్రబు ఏర్పాటు కిత్తి బోజనం

17 పులాజ్ సిల్లి రొట్టెజ్ తయార్ కిని పస్కు పండోయ్ది మొదోహి దినమ్దు వన్ని సిసూర్ యేసు డగ్రు వాతారె, “పస్కు ఉండెజ్ నీ వందిజ్ మాపు ఎంబె తయార్ కిదెజ్, ఇజి నీను కోరిజిని?”, ఇజి వన్నిజ్ వెన్బాతార్.

18 వాండ్రు వరిజ్, “మీరు పట్టుమ్దు పలానివన్నిబాన్ సాన్ని, నా సమయం డగ్రు ఆతాద్. నా సిసూర్ వెట కూడఁజి నీ ఇండ్రో పస్కు పండోయ్ కిదెజ్ ఇజి బోదకినికాన్ వెప్పినాన్, ఇజి వన్నిజ్ వెప్తు”, ఇజి వరిజ్ వెప్తాన్.

19 వన్ని సిసూర్ సాన్ని యేసు వరిజ్ వెప్తి లెకెండెనె పస్కు పండోయ్దిజ్ తయార్ కిత్తార్.

20 పొద్దు ఆతివెలె వన్ని పన్నెండు మన్ని సిసూర్ వెట బోజనమ్దిజ్ బస్తాన్.

21 వారు బోజనం కిజి మహివలె వాండ్రు, “మీ లొఇ ఒరెన్ నజీ ఆఇవరి కీదు ఒవజెప్పాన్లె, ఇజి నాను మిజి నిజం వెప్పిన”, ఇజి వెప్తాన్.

22 వారు విజేరె నండో దుకం ఆజి ప్రతి ఒరెన్ ఒరెన్, “ప్రబువా, నిజమె నాను ఆవ గదె?”, ఇజి వన్నిజ్ వెన్బాతార్.

23 యేసు, “నావెట గినెదు కియు ముడుఁక్కికాన్ ఎయెండ్రో వాండ్రె నజీ ఒవజెప్పికాన్.

24 లోకుమరిసి ఆతి నా వందిజ్ దేవుణు మాటదు రాస్తిమహి లెకెండె నాను సానాలె, గాని లోకు మరిసి ఆతి నజీ ఎయెన్ ఒవజెప్పాండ్రో వన్నిజ్ కస్టమ్నె. వాండ్రు పుట్విండ మంజినిక ఇహిజ వన్నిజ్ ఎస్సానో బాగ మహాద్ మరి”, ఇజి వెప్తాన్.

25 వన్నిజ్ ఒవజెప్పి యూద, “బోదకినికి నాను ఆవ గదె?”, ఇజి వెన్బాతాన్. యేసు, “ఒబ నీనె”, ఇజి మర్జి వెప్తాన్.

యేసుజ్ ఒవజెప్తెజ్ యూద ఒవు కొడ్డినాన్.

26 వారు బోజనం కిజి మహిజ్ యేసు ఉండ్రీ రొట్టె అస్తాండ్రె దేవుణుదిజ్ వందనమ్కు వెప్పి, అయాక రుక్కి, వన్ని సిసూర్జు సితాండ్రె, “మీరు యాక లొసి తిండ్రు, యాక నా ఒడోల్”, ఇజి వరిజ్ వెప్తాన్.

27 మరి వాండ్రు గిన్న అసి దేవుణుదిజ్ వందనమ్కు వెప్పి, అయాక వరిజ్ సీజి, “దిన్ని లొఇ మనిక విజేరె ఉండు.

28 యా గిన్నాదు మన్నిక నా నల, నండొండారిజ్ వరి పాపమ్కు సెమిస్తెజ్ ఇజి కారిసిని నా నల. ఇక్కదె దేవుణు నా నలదాన్ కిజిని ఒవుమోనం.

29 నా బుబ్బాతి దేవుణు కిని ఏలుబడిడు మరి మీ వెట కొత్తాజ్ ఉణిదాక ద్రాక్కు పట్టు రసం మరి ఎసెజ్బా నాను ఉణ్ఎలె, ఇజి నాను మిజి వెప్పాన్”, ఇజి వెప్తాన్

30 మరి, ఉండ్రీ పాటః పార్తారె వారు ఒలివ మరెక్ మని గొరొన్ మున్సు సొహార్.

పేతురు వన్నిజ్ నెన్వి ఇజి వెప్తాన్లె ఇజి యేసు మూజాల వెప్పినాన్.

31 నస్తవలె యేసు వరిజ్ సుడోజి, “గొరెజ్ అడినివన్నిజ్ నాను కత్తాలె, గొరెజ్ మంద సెదరినె సొనెలె*, ఇజి దేవుణు మాటదు రాస్తి లెకెండ, యా పొదొయ్నె నా వందిజ్ నిల్దెజ్ అట్ఏండ మీరు విజిదెరె నజి డిసి సొనిదెర్లె.

32 గాని దేవుణు నజి మర్జి బత్కుదు నిక్తి వెనుక, మిజి ఇంక ముజాల గలీలయదు సొనాలె”, ఇజి వెప్తాన్.

33 అందెజె పేతురు, “విజేరె మీ వందిజ్ నిల్దెజ్ అట్ఏండ డిస్తి సొహిజ్బా, నాను ఎసెజ్బా నిజి డిసి సొన్ఎ”, ఇజి వన్నిజ్ వెప్తాన్.

‡ 26:30 26:30 మాములుగ కీర్తన 113-114. పస్కు పండొయ్దిజ్ బోజనం కిదెజ్ మొదొల్ని వెలె పార్వార్. 115-118 బోజనం కిత్తి వీజితిజ పార్జి మహార్. ☆ 26:31 26:31 జేకరి 13:7.

34 యేసు వన్నిజ్, “యా పొదొయ్ నె కొర్తు కెరెని ముజాల నీను, నజీ నెన్ ఎ ఇజి ముండ్రీ సుట్టు. నీను వెహ్విలె, ఇజి నాను నిజీ నిజం వెహ్విస”, ఇజి మర్జి వెహ్హాన్.

35 పేతురు వన్నిజ్, “నాను నీ వెట సాదెజ్ ఇహిజ్ బా గాని నిజీ నెన్ ఎ ఇజి ఎసెజ్ బా వెహ్ ఎ”, ఇజి వెహ్హాన్. మహి సిసూర్ బా అయాలెకెండె వెహ్హార్.

గెత్ నెమని టోట

36 నస్తివలె యేసు వన్ని సిసూర్ వెట గెత్ నెమని ఇని టోటాదు సాహాన్. వాండ్రు వరిజ్, “నాను అబె సొన్ని పార్దనం కిజి మర్జి వానిదాక ఇబ్బె బసి మండ్రు”, ఇజి వెహ్హాన్.

37 పేతురుని జెబెదయి మరిసిరిజ్ వన్నివెట ఒతాన్. వాండ్రు నండో దుకం ఆజి బాద ఆదెజ్ మొదొల్స్తాన్.

38 వాండ్రు వరిజ్, “నాను సాదెజ్ డగ్రు ఆతిలెకెండే మన్ను ఓరిస్తెజ్ అట్ ఇ నసా బాద నజీ కల్లిజినాద్. మీరు ఇబ్బెనె బసి నావెట తెలి మండ్రు”, ఇజి వెహ్హాన్.

39 యేసు అబ్బెణిజ్ కండెక్ దూరం సాహాండ్రె ముణుకుజ్ ఊర్జి, “నా బుబ్బు, నీను అట్టిజి యా కస్టమ్ కు నా బాణిజ్ లాగ్ అ. గాని నా ఇస్టం వజి ఆవద్, నీ ఇస్టం వజినె జర్గిపిద్”, ఇజి పార్దనం కితాన్.

40 వెనుక వాండ్రు సిసూర్ డగ్రు మర్జి వాతివెలె వారు నిద్ర కినిక సుడోజి, “ఉండ్రీ గంటబా నా వెట తెలి ఆజి మండ్రెజ్ మీరు అట్ ఇతిదెరా? ఇజి పేత్రుజ్ వెన్ బాతాన్.

41 “నయ్తాను మిజి పరిస కిజి తప్పదు సొన్ ఏండ పార్దనం కిజి తెలి మండ్రు. ఆత్మ తయారెన్ గాని ఒడోల్ సత్తు సిల్లెండ ఆజినాద్.”

42 మరి రుండి సుట్టు సొన్ని, “నా బుబ్బు, యా కస్టమ్ కు నా బాణిజ్ లాగ్ జె ఆవద్, నాను ఓరిస్తెజ్ వలె ఇహిజి నీను ఇస్టం ఆతి లెకెండే, అయావజినె జర్గిపిద్”, ఇజి పార్దనం కితాన్.

43 మరి వాండ్రు మర్జి వాతివెలె, వరి కణక రెపెజ్ బరుదాన్ మూగ్జి మహిజ్ వారు మరి నిద్ర కిజినిక సుడోతాన్.

44 వాండ్రు మర్జి సాహంద్రె మూండ్రె నుట్టుబ అయా మాటెజ్ నె వెప్పి పార్దనం కితాన్.

45 వెనుక వాండ్రు వన్ని సిసూర్ డగ్రు వాత్తాండ్రె వరిజ్ నుడేజి, “ఏలుబా మీరు నిద్ర కిజి రోమ్ జనిదెరా? ఇదిలో లోకుమరిసి ఆతి నజీ సెఇవరి కియుదు ఒపజెప్పి గడియ డగ్రు ఆతాద్.

46 ఇదిలో నజీ ఒపజెప్పికాన్ వాజినాన్, లెదు మాటు వరి వెట దసూల్ ఆదెజ్ సానాట్”, ఇజి వెప్టాన్.

యేసుజ్ అసి తొనాప్పినార్

47 వాండ్రు వర్గిజి మహివలె, పన్నెండు మణిసి సిసూర్ లోఇ ఒరెన్ యూద వాతాన్. పెరి పుజెరిజు, లోకురి పెద్దెల్జ పొక్తిమని మంద లోకుర్ కూడమకు, డుడ్కు అస్తారె వన్ని వెట వాతార్.

48 యేసుజ్ ఒపజెప్పికాన్, “నాను ఎయెరిజ్ ముదు కిజిననొ, వన్నిజ్ అస్తు”, ఇజి ఉండ్రె గుర్తు లెకెండ్ ముజాల వరిజ్ వెప్టా మహాన్.

49 యూద వెటనె యేసు డగ్రు వాతండ్రె, “బోదకినికి”, ఇజి వెప్టాండ్రె పొమ్జి వన్నిజ్ ముదు కితాన్.

50 యేసు వన్నిజ్, “కూలాయెన్, నీను ఇనిక కిదెజ్ వాతిదొ అక్క కిఅ”, ఇజి వెప్టాన్. నస్తివలె లోకుర్ ముజాల్ వాజి వన్ని ముస్కు అరసి వన్నిజ్ అస్తారె తొప్టార్.

51 అయావలెనె యేసు వెట మహికాన్ ఒరెన్ వన్ని కియు సాప్పి కుర్ల లాగితాండ్రె పెరి పుజెరిజ్ పణిమన్ని గిబ్బి తెవు కత్తాన్.

52 యేసు వన్నిజ్, “నీ కూడం మర్జి ఒరాదు ఇడేఅ, కుర్ల అస్సికార్ విజేరె కుర్లదానె సానార్.

53 నాను ఏలు నా బుబ్బెజ్ సాయం లొస్తిజి, నా బుబ్బి పన్నెండు గుంపుజ్ నయనమది వరిజ్ ఇంక లావ్ దూతెజి నా వందిజ్ పొక్వండ్రా? మీరు ఇనిక ఒడేబిజినిదెరె?

54 గాని నాను అయలెకెండ్ లొస్తిజి, యాలెకెండ్ నె ఇకెజ్ జర్ గిదెజ్ ఇజి దేవుణు మాటదు రాస్తి మహిక ఎలాగ పూర్తి ఆనాద్?

55 అయావలె యేసు మంద లోకురిజ్ సుడేజి, “నాను ఒరెన్ డోజి కినికాంత్రా? మీరు కుర్లజాణిజ్, కొణెజాణిజ్ నజీ అస్తైజ్ వాతిదెరా? విజు రోస్సు నాను దేవుణు గుడిఁదు బసి బోదిసి మహాగదె. అయావలె మీరు నజీ అస్ ఇతిదెర్.

56 ఎందనిజ్ ఇహిజ ముజాల దేవుణు వర్గితి మాటెజ్ ప్రవక్తరు రాస్తి మహికెజ్ అయాలెకెండ్ పూర్తి ఆదెజ్ యాకెజ్ విజు జర్గితె”, ఇజి వెప్తాన్. నస్తివలె వన్ని సిసూర్ విజెరె వన్నిజ్ డిఁస్తారె ఉహ్క సాహార్.

యేసు యూదురి కొర్దుదు

57 యేసుజ్ అస్తికార్ వన్నిజ్ విజు పుజేరిజ ముస్సు పెరి పుజెరి ఆతి కయప ఇండ్రొ తత్తార్. అబ్బె పెరి పుజేరిజు లోకురి పెదలుజు కూడిఁత వాత మహార్.

58 దినిజ్ ఆక్కర్ ఇనిక ఆనాదొ ఇజి నెస్తైజ్, పేతురు కండెక్ దూరమ్దాన్ వన్ని వెనుక సొన్ని విజు పుజెరిజ ముస్సు పెరి పుజెరి ఇలు అరజుదు కాప్ కిని వరి వెట బస్తాన్.

59 పెరి పుజెరిజు, సన్ హెద్రి సజంకీ ఇజి యూదురి కోర్టుదికార్ విజెరె యేసుజ్ సప్తైజ్ తగితి రుజుప్ వందిజ్ వన్ని ఎద్రు అబద్ధం సాక్యం వెప్పివరిజ్ రెబాజి మహార్.

60 వన్ని ఎద్రు అబద్ధం సాక్యం వెప్పికార్ నండొండార్ వాతార్ గాని వన్నిజ్ సప్తైజ్ తగ్గి ఇనికబా దొహ్కావతాద్.

61 కడెవేరిదు రిఎర్ ముజాల వాజి, “నాను దేవుణు గుడిఁదిజ్ అరప్పి మరి మూండ్రొ రోస్కాజ్ లోఇ దనిజ్ మరజి తొప్తైజ్ అట్ను ఇజి వాండ్రు వెప్తాన్”, ఇజి వారు వెప్తార్.

§ 26:59 26:59 సినహద్రిం సజం ఇహిజ 71 లోకుర్ మంజిని యూదురి పెరి కోర్టులెకెండ్ మహాద్ విజెరె పుజెరిజ ముస్సు పెరిపుజెరిఆతికాన్ మరి పెరి పుజెరి ఇనికాన్ ఇజిరి సజతిజ వందిజ్ తీర్పు తీరిసి మహార్. సన్ హద్రిం సజమ్దు అయ సమయమ్ది పెరి పుజెరి వన్ని ఇండ్రొణి మొగవారు, మహి ముకెలమాతి పుజెరి ఇండ్రొణికార్ దేవుణు గుడిఁ కాప్ కినివరి నెయ్యి ముజాల పెరి పుజెరిలెకెండ్ మహికార్ మంజనార్. యెరూసల్లెమ్దు మన్ని సన్ హద్రిం సజమ్దిజ్ నె పెరి సజతిజ వందిజ్ తీర్పు తీరిన్తైజ్ అతికారం మనాద్.

62 నస్తివలె విజు పుజెరిజ ముస్సు పెరి పుజెరి ఆతికాన్ నిజిత్తాండ్రె యేసుజ్, “నీను ఇనికబా మర్జి వెహ్ ఇదా? వీరు మీ ముస్సు వెహ్నిని యా మాటెజ్ ఇనికెజ్?”, ఇజి వెహ్హాన్.

63 గాని యేసు ఇనికబా వర్గివిండ జమ్న మహాన్. అందెజె విజు పుజెరిజ ముస్సు పెరి పుజెరి ఆతికాన్ వన్నిజ్ సుడెజి, “బత్తిజిని దేవుణుదిజ్ తోడు అసి నీ వెట ప్రమాణం కిజి నాను నిజి వెన్బాజిన, “నీను క్రీస్తు నా, దేవుణు మరిసినా? అహిజ నజి వెహ్ అ”, ఇజి వెహ్హాన్.

64 యేసు వన్నిజ్, “నీను వెహ్హిక నిజమె. గాని లోకుమరిసి ఆతి నాను, వాని గొప్ప అతికారం మన్ని కాలమ్దు దేవుణు ఉణెర్ పడెకాదు బసిమంజి ఆగాసమ్దాన్ మొసోపు ముస్సు వానిక మీరు సూణిదెర్ ఇజి నాను మిజి విజేరిజ్ నిజం వెహ్హాన్”, ఇజి వెహ్హాన్.

65 నస్తివలె విజు పుజెరిజ ముస్సు పెరి పుజెరి ఆతికాన్ నండొ కోపం ఆతండ్రె, వన్ని సొక్కెజ్ కిసె ఆజి, “వాండ్రు దేవుణుదిజ్ దూసిసి వర్గితాన్! మరి ఇంక సొక్సిరిజు అప్సరం సిల్లెద్. ఇదిలో వాండ్రు దేవుణుదిజ్ దూసిసి వర్గితిక మీరె వెహ్హిదెర్.

66 మీరు ఇనిక ఒడెబిజినిదెర్?”, ఇజి వరిజ్ వెహ్హాన్. అందెజె వారు”, వీండ్రు సావుదిజ్ తగ్గికాన్”, ఇజి వెహ్హాన్.

67-68 నస్తివలె వారు వన్ని మొకొమ్దు పూసి, ముటి అసి గుదితార్. సెగొండార్ కియుదాన్ డెయ్జి, “క్రీస్తు నిజి డెయ్తికాన్ ఎయెండ్రొ ఇజి మజి వెహ్ అ, నీను దేవుణు ప్రవక్తగదె?”, ఇజి వెహ్హాన్.

పేతురు యేసుజ్నెన్ ఏ ఇజి మూండ్రె సుటు వెహ్హాన్.

69 అయావలె వెల్లి అరజుదు పేతురు బస్తి మహిజ్ పణిమన్ని ఆతి ఉండ్రె బోదెలి వాతాదె, “నీనుబా గలీలయాదికాన్ యేసు వెట మహికి”, ఇజి వెహ్హాన్.

70 పేతురు, “నీను ఇనిక వర్గిజినిదొ నజి తెలివద్”, ఇజి బాన్మహి విజేరె ఎద్రు వెహ్హాన్.

71 వాండ్రు అబ్బెణిజ్ వెల్లిహి గవుని డగ్రు సొహిజ్, మరి ఉండ్రీ పణిమన్ని ఆతి బోదెలి వన్నిజ్ సుడఃజి, “వీండ్రు నజరేతుదికాన్ ఆతి యేసు వెట మహాన్”, ఇజి అబె మహివరిజ్ వెహ్లాద్.

72 వాండ్రు నాను వన్నివెట మండ్రెజ్ సిల్లెద్ ఇజి ప్రమాణం కిజి, “నాను వన్నిజ్ నెస్ఎ”, ఇజి వెహ్లాన్.

73 కండెక్టయం ఆతి వెనుక అబ్బె నిహిమహికార్ పేతురు డగ్రు వాజి, “నిజమె, నీనుబా వన్నివెట మహికి. నీను వర్గిని మాట విహిజానె తెలిజినాద్”, ఇజి వెహ్లార్.

74 నస్తివలె వన్నిజ్ వాండ్రె సయిప్సిబె ఆజి ప్రమాణం కిజి, “నాను వన్నిజ్ నెస్ఎ”, ఇజి వరిజ్ వెహ్లాన్. వెటనె కొరు కెరెతాద్.

75 నస్తివలె, “కొరు కెరెని ముజాల నజి నెస్ఎ ఇజి మూండ్రీ సుట్టు. నీను వెహ్లా”, ఇజి యేసు వన్నిజ్ వెహ్లా మాట ఎతు కితాండ్రె పేతురు వెల్లి సొహండ్రె గుండె కొతె ఆజి డటం అడఃబతాన్.

27

యూద, వన్నిజ్ వాండ్రె ఉరి ఆజినాన్

1 పెందాల, పెరి పుజెరిజుని లోకురి పెద్దెల్జ విజేరె యేసుజ్ సపిస్టెజ్ ఇజి ఉండ్రీ నిర్లెం కిబిస్టెజ్ ఇజి ఉండ్రె కుట్ర ఆతార్.

2 వారు వన్నిజ్ తొహ్తారె, రోమఅతికారి ఆతి పీలాతు డగ్రు తత్తారె వన్నిజ్ బవజెహ్లార్.

3 నస్తివలె వన్నిజ్ బవజెహ్లా యూద, వారు యేసుజ్ సపైజ్ ఇజి తీర్పు కితార్ ఇజి నెస్టాండ్రె, మన్నుదు నండో దుకం ఆజి అయ మువయవెండి రువయెజు పెరి పుజెరిజుని పెద్దెల్జ ఎద్రు మహ్త తత్తాన్.

4 “ఇని తప్ప సిలివన్నిజ్ బవజెహ్లానె నాను పాపం కిత”, ఇజి వాండ్రు వెహ్లాన్. “దనిజ్ నజి ఇని పొతు సిల్లెద్. అయాక నీ బాజిత”, ఇజి వారు వెహ్లార్.

5 అందెజె యూద అయ వెండి రూపయెజ్ దేవుణుగుడిః లోఱ వసిరీతాండ్రె సాహాన్. వెనుక సొన్ని వన్నిజ్ వాండ్రె ఉరి లాగె ఆతాన్.

6 పెరి పుజెరిజు అయ వెండి రూపయెజు పెహ్తారె, “ఇకెజ్ ఒరెన్ వన్నిజ్ సప్పి వందిజ్ సిత్తి డబ్బుజ్, అందెజె సంద పెటెదు అరీప్పిక దేవుణు రూలుదిజ్ పడిఃవద్”, ఇజి వర్గితార్.

7 వారు అయ డబుదాన్ ఆఇ దేసెమ్ది వరిజ్ మూస్తెజ్, కుమెరివన్ని మడిఃజ్ కొణాట్ ఇజి ఉండ్రె నిర్దెం కితార్.

8 అందెజె ఏలుదాక అయ మడిఃజు, “నల మడిఃజు’ ఇజి కూకె ఆజినాద్.

9-10 “దేవుణు నజి ఆడ్ర సిత్తిలెకెండ, ఇస్తాయేలు లోకుర్ వన్ని వందిజ్ విలువ లెకెండ సిత్తి ముప్పయ్ వెండి రూపయెజ్ వారు లాగితారె కుమెరి వన్ని బూమి కొండెజ్ సితార్”☆. ఇజి దేవుణు ముజాల ప్రవక్త ఆతి యిరిమ్మ్య వెట వర్గితక యా లెకెండ పూర్తి ఆతాద్.

యేసు పీలాతు ఎద్రు నిల్సినాన్

11 యాకెజ్ జరిగిజి మహివలె యేసు పెరి అతికారి ఆతి పీలాతు ఎద్రు నిల్సె మహాన్. నస్తవలె అతికారి ఆతి పీలాతు, “యూదురిజ్ రాజు ఆతికి నీనెనా?”, ఇజి వన్నిజ్ వెన్బాతాన్. “నిజమె, నీను వెహ్తి లెకెండనె”, ఇజి యేసు మర్జి వెహ్తాన్.

12 పెరి పుజెరిజు, పెద్దెల్జు వన్ని ముస్సు తపుజ్ మోప్పివెలె వాండ్రు ఇనికబా మర్జి వెహ్తాన్.

13 నస్తవలె పీలాతు, “వీరు నీ ముస్సు ఎసా తపుజ్ మోప్పినార్, యాకెజ్ విన్ఇతిదా?”, ఇజి వన్నిజ్ వెన్బాతాన్.

14 వాండ్రు వారు వెహ్తి మాటెజ్ఉండ్రె దనిజ్బా మర్జి ఇనికబా వెహ్తాన్. అందెజె అతికారి నండె బమ్మ ఆతాన్.

15 పన్కపండెయ్దిజ్ జెలిదు మన్నివరి లోఱ, లోకుర్ కోరజిని ఒరెన్ వన్నిజ్ విడుదల కిని అలవాటు అతికారిజ్ మనాద్.

16 అయావలె బరాబ ఇని ఒరెన్ మూర్కతం మన్ని అన్నయ వాండ్రుననికాన్ ఒరెన్ జెలిదు మహాన్.

☆ 27:9-10 27:9-10 జేకరి 11:12,13; యిర్మీయా 19:1-13; 32:6-9.

17 అందెజె లోకుర్ విజెరె కూడేజి వాతివెలె పిలాతు, “నాను ఎయెరిజ్ విడుదల కిదెజ్ ఇజి మీరు కోరిజినిదెర్? బరబ్బెనా, సిల్లిజు క్రీస్తు ఇజి కూకె ఆజిని యేసుజా?”, ఇజి వరిజ్ వెన్బాతార్.

18 వారు యేసు ముస్కు గోస ఆతారె వన్నిజ్ ఒపజెప్త మనార్ ఇజి వాండ్రు నెస్త మనాన్.

19 పిలాతు నాయం తీరిస్సి బాడిడు బస్తి మహివలె వన్ని ఆల్సి, “ఇని తప్పబా సిల్లి అయా నెగ్గివన్నిజ్ ఇనికబా కిదెజ్ నీను కూడేదెజ్ అవిద్. వన్ని వందిజ్ నేండ్రు ఉండ్రీ కలాదు నాను నండో బాద కల్లిత మన”, ఇజి వన్నిజ్ కబ్బురు పోక్తాద్.

20 పెరి పుజెరిజుని పెద్దెల్జ, బరబ్బెజ్ డిసి సీజి యేసుజ్ సప్తెజ్ ఇజి అతికారి ఒప్పిలెకెండ వెప్తాజ్ ఇజి లోకురిజ్ రేప్పి మహార్.

21 “యా రిఎర్ లోఇ ఎయెరిజ్ నాను డిస్సెజ్ ఇజి మీరు కోరిజినిదెర్?”, ఇజి అతికారి వరిజ్ వెన్బాతిజ్, “బరబ్బెజ్నె”, ఇజి వారు మర్జి వెప్తార్.

22 “అహిజు క్రీస్తు ఇజి కూకె ఆజిని యేసుజ్ నాను ఇనిక కిదెజ్?”, ఇజి వరిజ్ వెన్బాతిజ్ “వన్నిజ్ సిలువ పొక్అ”, ఇజి విజెరె వెప్తార్.

23 “ఎందానిజ్ వన్నిజ్ సిలువ పొక్తెజ్, వాండ్రు ఇని తప్ప పణి కిత్తాన్?”, ఇజి పిలాతు వరిజ్ వెప్తాజ్, “వన్నిజ్ సిలువ పొక్అ”, ఇజి మరి ఒదె వారు డేల్సి వెప్తార్.

24 గగోలినె లావ్ఆజినిక ఆవండ మరి ఇనికబా కిదెజ్ అట్ఎన్ ఇజి నెస్తాండ్రె పిలాతు, లోకుర్ విజెరె ఎద్దు ఏరు లోసో వన్ని కికు నోరబజి, “ఇని తప్పసిల్లి వన్ని నలదిజ్ నజీ ఇని సమందం సిల్లె, మిజినె సమందం మనాద్”, ఇజి వెప్తాన్.

25 అందెజె లోకుర్ విజెరె, “వన్ని నల మా ముస్కుని మా కొణోర్ ముస్కు మనీద్*”, ఇజి మర్జి వెప్తార్.

26 సస్తివలె వారు కోరితి లెకెండెనె వాండ్రు బరాబెజ్వరి వందిజ్డిసిస్త సితాన్. గాని యేసుజ్ కొర్డెజాణిజ్ డెయ్జి సిలువ పొక్తెజ్

* 27:25 27:25 వన్ని నల మా ముస్కుని మా కొణోర్ ముస్కు రపిద్ - తెలుగు

ఒపజెప్తాన్.

సయనమ్దికార్ యేసుజ్ వెక్కిసినార్.

27 నస్తివలె అతికారి సయనమ్దికార్ యేసుజ్ వారు బత్తిజిని ప్రిటోరియం ఇని ఇండ్రో ఒతారె, సయనమ్దికార్ విజేరె వన్ని సుటులం కూడితార్.

28 వారు వన్ని నీరి సొకెజ్ లాగితారె మరి ఉండ్రీ ఎరాని నీరి సొక వన్నిజ్ తొడుఃగిస్తాతార్.

29 వారు సాప్కాణిజ్ అటారె ఉండ్రీ టోపి తయార్ కిజి వన్ని బురాదు ఇట్టార్. ఉండ్రీ డుడు వన్ని ఉణిర్కియుదు అస్సిస్తారె వన్ని ఎద్రు మూణుకుజ్ ఉణిర్జి, “యూదురిజ్ రాజు ఆతికి గెలిస్ఆ”, ఇజి వెప్పి వన్నిజ్ వెక్కిస్తార్.

30 వన్ని ముస్సు పూసి, అయ డుడు లాగ్గి వన్ని బురాదు మరి మరి డెయ్తార్.

31 వన్నిజ్ వెక్కిసి వీజితి వెనుక వన్నిజ్ తొడుఃగిస్తి మహి నీరి సొక్క లాగితారె, వన్ని నీరి సొక్కెజ్ తొడిఃగిస్తారె సిలువ పొక్తెజ్ వారు వన్నిజ్ ఒత్తార్.

యేసు సిలువ పొకె ఆజినాన్

32 వారు సొన్ని మహివలె కురెనియ ఇని పట్టుమ్దికాన్ సీమోను ఇని ఒరెన్ వన్నిజ్ సుడఃతారె, సిలువ పిండఃదెజ్ వన్నిజ్ బలవంతం కిత్తార్.

33 బుర్ర పెణకి ఇని అర్దం ఆని పేరుమని గోల్గోత్త ఇని బాడిఃదు వాతార్.

34 అబె సేందు కలప్తి ద్రాస కడు వన్నిజ్ ఉండెజ్ సిత్తార్ గాని వాండ్రు కెప్తాన్,

35 వన్నిజ్ సిలువ పొక్తి వెనుక వన్ని సొక్కెజ్ ఎయెరిజ్ దొహ్కె ఇజి నెస్తెజ్ సీటిజ్ పొక్తారె వన్ని సొక్కెజ్ సీబె ఆతార్.

36 దన్ని వెనుక వారు అబ్బె బసి వన్నిజ్ కాప్కిజి మహార్.

37 “పిండ్రు యూదురిజ్ రాజు ఆతి యేసు”, ఇజి వాండ్రు కితి తపు రాసి వన్ని బురాదిజ్ ముస్సు ఇట్టార్.

38 వన్ని ఉణెర్ పడకాదు ఒరెన్ వన్నిజ్, వన్ని డేబ్ర పడకాదు ఒరెన్ వన్నిజ్ రిఎర్ డొజారిజ వన్ని వెట సిలువ పొక్తార్.

39-40 అయ సర్దు సొనికార్ విజేరె బుర్ర దుక్కి, “దేవుణు గుడిడిజ్ అర్ప్పి మూండ్రి దినమ్కాజ్ మర్జి తొప్పొకి, నీను దేవుణు మరిసి ఇహిజ నిజి నీనె రక్కిన్అ, సిలువదాన్ డిగ్జి రఅ”, ఇజి వన్నిజ్ పడిఎండ సెఇ మటెజ్ వెప్పి మహార్.

41 అయ లెకెండెనెన, పెరి పుజెరిజు, లోకురి పెద్దెల్జ, దేవుణు మోసెజ్ సీతి రూలుజ్ నెస్సిస్సికార్ విజేరె వన్నిజ్ వెక్కిస్తార్.

42 “వీండ్రు మహి వరిజ్ తప్పిస్తాన్, గాని వన్నిజ్ వాండ్రె తప్పె ఆదెజ్ అట్ఏతాన్. వాండ్రు ఇస్తాయేలుది రాజు ఇహాన్. ఏలు వాండ్రు సిలువ మున్సుహాన్ డిగితిజ వన్నిజ్ మాపు నమినాప్.

43 వాండ్రు దేవుణు మున్సు నమకం ఇట్టాన్. “నాను దేవుణు మరిసి” ఇజి వెప్తాన్. అందెజె దేవుణుదిజ్ వన్నిజ్ సిలువదాన్ రక్కిస్తాండ్రా, ఇజి మాటు సూణాట్ దేవుణు వన్నిజ్ తప్పిసీన్ ఇజి వారు వెప్తార్.

44 అయా లెకెండెనె వన్నివెట సిలువ పొకె ఆతి మని డొజారిజ్బా వన్నిజ్ వెక్కిస్తార్.

యేసు సిలువారు సాజినాన్

45 మదెనమ్దాన్ మూండ్రి గంటెజ్దాక దేసెం విజు సీకటి ఆతాద్.

46 డగ్రు మూండ్రి గంటెజ్ఆతివెలె యేసు, “ఏలి, ఏలి అమ సబక్తాని”, ఇజి నండొ డేల్లివెప్తాన్. “నా దేవుణు, నా దేవుణు నజీ ఎండనిజ్కెయు డిస్సి?”, ✱ ఇజి యా మాటదిజ్ అర్దం.

47 అబ్బె నిహి మహికార్ సెగొండార్ యా మాట విహరె, “వాండ్రు ఏలియెజ్ కూక్కినాన్”, ఇజి వెప్తార్.

48 వెటనె వరి లొఇ ఒరెన్ ఉహ్కొ సొన్సి దూది తత్తాండ్రె పులాని రసమ్దు ముడుక్కి యేసుజ్ ఉండెజ్ ఉండ్రె డుడుదాన్ వన్ని వెయ్దు అందిస్తాన్.

✱ 27:46 27:46 కీర్తన 22:1.

49 మహికార్”, ఇనిక కిమ, ఏలియ వాజి వన్నిజ్ తప్రిస్నాన్సు, నూణాట్”, ఇజి వెహ్టార్.

50 యేసు మరి డటం డేల్స్తాండ్రె పాణం డిస్తాన్.

51 అయ గడియోదునె దేవుణు గుడిఃదు మని తెర ముస్సుహాన్ అడ్లి దాక కింజితాదె రుండి ముకెజ్ ఆతె. బూమి కద్లితాద్. సటుజ్బదెజ్జ్ ఆతె.

52 దూకిజ్ రే ఆతెనె ముజాల సాతి మహి నీతి నిజాయితి మనికార్ నండొండార్ ఒడొల్దాన్ మర్జి నీజితార్.

53 వారు దూకిజాణిజ్ వెల్లి వాజి, యేసు సాతి వరిబాణిజ్ మర్జి నిజితి వెనుక దేవుణు వన్నివందిజ్ కేట కిత్తి పట్టుమ్దు+ సొన్ని నండొండారిజ్ తోరె ఆతార్.

54 సదాతిపతి‡ వెటయేసుజ్ కాప్కిజి మహికార్ బూమి కద్లినిక, మరి జర్గితికెజ్ విజు సుడొజి నండొ తియెల్ ఆతార్. “వీండ్రు, నిజమె దేవుణు మరిసినె”, ఇజి వెహ్టార్.

55 నండొండెక్ బోదెక్ కండెక్ దూరమ్దాన్ సుడొజి మహె. వారు యేసుజ్ అవ్సరం ఆతికెజ్ కిజి గలీలయదాన్ వన్నివెట వాతికెజ్.

56 వక్కా లోఇ మగ్గలెనె మరియాని, యాకోబు, యోసె ఇని వరి అయ్సి ఆతి మరియుని జెబెదాయి మరిసిరిజ్ అయ్సి బానె మహార్.

యేసుజ్ మూస్సిక

57-58 యేసుజ్ లోజిజి మనికానాతి అరిమతా ఇని పట్టుమ్దికాన్ యోసేపు ఇని ఒరెన్ ఆస్తి మన్నికాన్. పొద్దు ఆతివెలె, వాండ్రు పిలాతు డగ్గు సొహొండ్రె యేసు ఒడొల్ లొస్తాన్. యేసు ఒడొల్ వన్నిజ్ సీదెజ్ ఇజి పిలాతు ఆడ్ర సితాన్.

59 యోసేపు అయ ఒడొల్ లొస్తాండ్రె నెగ్గి తెలాని పాతెజాణిజ్ కి సుటిసి, సటుదిజ్ దొల్పిస్తి, వన్ని వందిజ్ తయార్ కితి మహి కొత్త దూకిదు ఇడొతాన్.

60 ఉండ్రీ గుండ్రాని సెప్ట పణకు సడిపిసి దూకిదిజ్ అడు కితాండ్రె సొహాన్.

† 27:53 27:53 యెరూసలేం. ‡ 27:54 27:54 సయ్నమ్ది వంద మణిసిరిజ్ నడిపిసికాన్. § 27:59 27:59 ఉండ్రీ రకం గొప్ప విలువాతి నునాజ్ మన్ని పాతెజ్.

61 మగ్గలెనె మరియాని మరి ఉండ్రీ మరియు అబ్బె దూకిదిజ్ ఎద్రు బస్తెమహె.

దూకిదిజ్ కాప్ కిజినార్.

62-63 మర్సనాండిజ్, ఇహిజ విస్త్రాంతిదినం వందిజ్ తయార్ ఆని దినం వెనుక, పెరి పుజెరిజుని, పరిసయరు పిలాతు డగ్గు కూడేజి వాతారె, “బాబు, అయ అబద్దం వెప్పొ మొసెం కితికాన్ బత్రితి మహివలె, “ముండ్రీ దినమ్కు ఆతి వెనుక నాను మర్జి నీజ్నాలె’ ఇజి వెప్తొ మహిక మజి ఎతు మనాద్.

64 అందెజె ముండ్రీ దినమ్కుదాక దూకిదిజ్ నెగెండ సుడేదెజ్ ఆడ్ర సిఅ. సిల్లిజ వన్ని సిసూర్ వాజి వన్నిజ్ పెర్జి బసి, వాండ్రు సాతి వరి బాణిజ్ మర్జి నిజితాన్, ఇజి లోకురిజ్ వెహ్నార్. ఆహె కితిజ కడెవెరిదిక మొదొహిదనిజ్ ఇంక మరి ఒదె మొసెం ఆనాద్”, ఇజి వెహ్నార్.

65 అందెజె పిలాతు, “కాప్ కినివరిజ్ ఒసి మీరు కియుదాన్ కిదెజ్ అట్టి లెకెండ దూకిదిజ్ జాగర్త కాప్ కిదు”, ఇజి వరిజ్ వెహ్నాన్.

66 వారు సొన్ని అయ దూకిదిజ్ నీలు పొకిస్తారె, జాగర్త సుడేదెజ్ కాప్ కిని వరిజ్ బ ఇడేతారె.

28

యేసు మర్జి నిజిజినాన్

1 విస్త్రాంతిదినం గడస్తి సొహి వెనుక, వారమ్దిజ్ మొదొహి దినమ్దు జాయ్ అజి మహివలె, మగ్గలెనె మరియాని మరి ఉండ్రీ మరియు దూకిదు సుడేదెజ్ సొహార్.

2 వెటనె బూమి కద్లితాద్. ఎందనిజ్ ఇహిజ పరలోకమ్దాన్ ఒరెన్ దేవుణు దూత డిగిత వాత్తాండ్రె అడు మహి పణుకు ఎర్లిసి దని ముస్సు బస్త మహాన్.

3 అయ దూత ఒడోల్ మిర్నిని జాయ్ లెకెండ మహాద్. వన్ని సొక్కెజ్ గాందులెకెండ తెలాజ్ మహె.

4 వన్నిజ్ సుడేజి కాప్ కినికార్ తియెల్ ఆతారె వణిక్కి వరి పాణం సొహి లెకెండ ఆత మహార్.

5 దేవుణు దూత అయ బోదెకాజ్ సుడఃజి, “మీరు తియెల్ ఆమాట్. సిలువ పొకె ఆతిమన్ని యేసుజ్ మీరు రెబాజినిదెర్ ఇజి నాను నెసిన.

6 వాండ్రు ఇబ్బె సిల్లెన్. వాండ్రు వెప్తా లెకెండెనె మర్జి నిజితాన్. రదు, వాండ్రు గూర్తిమహి బాడిః సుడఃదు.

7 మీరు బేగి సొన్ని వాండ్రు సాతి వరిబాణిజ్ మర్జి నిక్తాన్. వాండ్రు మిజి ఇంక ముజాల గలీలయ సొన్నినాన్. మీరు అబ్బె వన్నిజ్ దసూల్ ఆనిదెర్, ఇజి వన్ని సిసూరిజ్ వెప్తు. ఇదిలో యాక ఏలు నాను మిజి వెప్పిన ఇజి వరిజ్ వెప్తాన్.

8 అందెజె అవిక్ తియెల్ ఆజి గొప్ప సర్దదాన్ వన్ని సిసూర్జి యా మాటెజ్ వెప్తాజ్ ఉహ్కీ సాహె.

9 వెటనె యేసు వన్కా ఎర్దు తొరె ఆతాండ్రె, “మిజి నెగెండ మనిద్”, ఇజి వెప్తాన్. అవిక్ వన్ని డగ్రు వాజి పాదమ్కు అసి వన్నిజ్ పడ్గ్గి మాడిఃస్టె.

10 నస్తవలె యేసు, “మీరు తియెల్ ఆమాట్. మీరు సొన్ని నా కూలెజ వెట గలీలయదు సొండ్రు ఇజి వెప్తు. వారు అబె నజి దసూల్ ఆనార్లె”, ఇజి వనకాజ్ వెప్తాన్.

11 అవిక్ సొన్నిమహిజ్, దూకిదిజ్ కాప్కిజి మహికార్ సెగొండార్ పట్టుమ్దు సాహారె, జర్గితి సజతిజ్ విజు పెరి పుజెరిజ వెట వెప్తార్.

12-13 అందెజె వారు లోకురి పెద్దెల్జ వెట కూడఃజి వాతారె ఉండ్రీ ఆలోసనం కితార్. వారు అయ సయనమ్ది వరిజ్ నండొ డబ్బుజ్ సితారె, “మాపు నిద్ర కిజి మహివలె వన్ని సిసూర్ మదరెతు వాతారె వన్నిజ్ పెప్తా ఒతార్ ఇజి మీరు వెప్తు.

14 యా మాట అతికారి గిబ్బిదు సొహిజ మాపు వన్నివెట వర్గిజి మిజి ఇనికబా రెవండ సూణాప్లె”, ఇజి వరిజ్ వెప్తార్.

15 అందెజె అయ సయనమ్దికార్ డబ్బు అస్తారె వరిజ్ వెప్తావజనె కితార్. యా డొజకత ఏలుబా యూదురి లొఇ సాటె ఆజినె మంజినాద్.

16 పదకొండు మన్ని సిసూర్ యేసు వరిజ్ వెప్తా మన్ని గలీలయాది గొరొత్ సాహర్.

17 వారు వన్నిజ్ సుడఃతిజ్ వన్నిజ్ పొగ్డిజి మాడిఃస్తార్. గాని సెగొండార్ అనుమానం ఆతార్.

18 నస్తవలె యేసు వరి డగ్గు వాతండ్రె, “పరలోకమ్దుని బూమి ముస్సు విజు అతికారమ్కు దేవుణు నజీ సిత మనాన్.

19 అందెజె మీరు సొన్ని విజు జాతిజాణి వరిజ్ నా సిసూర్ కిదు. బుబ్బు పేరుదాన్, మరిన్ పేరుదాన్, దేవుణు ఆత్మ పేరుదాన్ వరిజ్ బాప్తీసం సీదు.

20 మరి నాను మిజి ఆగ్గు సితలెకెండ, నాను మిజి నెన్పిస్తి విజు వనకాజ్లోజిజి మండ్రెజ్ ఇజి వరిజ్ నెస్పిస్తు. ఇదిలో నాను యా లోకమ్ది ఆక్కర్ దాక ఎలాకాలం తవ్విండ మీవెట మంజిన”, ఇజి వరిజ్ వెప్తాన్.

CXV

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c